

فتيات أحبهن الجن

قصة حقيقية



جمال الحفني

"إلى مَنْ منحني الثبات في عالم مليء بالاهتزاز. إلى أبي"

عزيزي القارئ هذه المجموعة القصصية ليست نتاجاً لدار نشر، ولا تحمل أرقام إيداع رسمية، بل هي نبضٌ حر خرج من قلمي إليكم مباشرة. لقد اخترتُ أن تكون هذه الرحلة 'إلكترونية' بالكامل؛ لتتجاوز الحدود والمسافات، وتصل إلى قلب كل قارئ في أي مكان دون قيد أو عائق. غايتي هي المتعة، ودار نشري هي ذائقتكم

"لم تكن وصايا الجدات مجرد حكايا لترهيب الصغار، بل كانت دروعاً من صلب
أمام كيانات تتربص بنا في الزوايا المظلمة. حذرونا من إطالة النظر في المرايا،
ومن البكاء وحيدات في جوف الليل، ومن استحضار الأسماء التي لا تُنطق.. لكن
الفضول كان دائماً أقوى من الخوف

هنا، بين دفات هذه الأوراق، حكايا لفتيات لم يسمعن الوعيد، فصار الظل لهن
رفيقاً، والهمس في آذانهن قدراً. قصص عن 'العشق الأسود' الذي لا يعرف
الرحمة، حيث يصبح المحبوب سجاناً، والبيت مسكوناً بأنفاس لا نراها

اقرأ بتمهل، واستعد مما قد يشاركك أنفاسك الآن.. فبعض الأبواب إذا فُتحت، لا
تُغلق أبداً، وبعض العيون إذا عشقت، لا تترك فريستها حتى الموت"

"الحكاية الأولى"

لو سمعت قطط بتتخانق بالليل قدام باب شقتك بلاش تفتح الباب وتشوف فيه إيه, لإن واحد من أصحابي عمل كدا خلال فترة وجوده في سكن الدراسة وبعدها حصلت مواقف وتطورات مخيفة معاه ومع الثلاثة اللي ساكنين معاه.

صاحبني يونس في ليلة كان بيذاكر وسمع صوت قطط بتتخانق قدام باب الشقة, وكان وسط الخناقة بيسمع صوت قطة ليها نغمة معينة, ولما الموضوع اتكرر أكثر من يوم ولنفس القطة دي فتح الباب عشان يشوف فيه إيه, لقي قطنتين على السلام واقفين ورافعين جسمهم وذيولهم في وضع الاستعداد للخناق, بعد ما وقف كام ثانية ميز صوت القطة اللي كان يسمعها الأيام اللي فاتت, كانت قطة سودة عنيتها لونها أصفر وواضح إنها أضعف من القطة الصفراء اللي واقفة قدامها, كان باين عليها إنها بس بتبرد عليها

المواء عشان تثبتلها إنها مش خايفة, وكان واضح إنها مش هي اللي بتبدأ المشاكل كل يوم.

صاحبي فكر في الكلام دا خلال وقفته قدام باب الشقة وصعبت عليه, لكنه كان مضايق فرفع إيداه وزعق فيهم عشان يهربوا والقطة الصفراء هربت لكن السوداء فضلت واقفة مكانها متحفزة وخايفة لكن لما الصفراء هربت قللت من صوتها وبقت ملامحها وديعة وخايفة, صاحبي صعبت عليه ودخلها معاه الشقة.

الثلاثة اللي معاه معترضوش على اللي عمله بالعكس, كانوا هما كمان ياخدوا بالهم منها ويحطولها أكل قبل ما يخرجوا للكلية, اللي يشتريها تونة, واللي يشتريها لانشون, وعاشت معاهم أول كام يوم مفيش أي حاجه حصلت.

وفي يوم واحد فيهم رجع من الكلية قبلهم, كان تعبان وساب محاضرتين ورجع ينام, أول ما دخل البيت شاف القطعة واقفة في نص الصالة وبتبص عليه, نظراتها كانت مختلفة شوية لكن مركزش معاها, دخل خد دش وطلع وفي طريقه لأوضته شاف القطعة واقفة في نفس المكان اللي سابها فيه وبتبص عليه وبتلف راسها للمكان اللي بيتحرك فيه.

دخل ينام وبمجرد ما حط راسه على المخدة سمع صوت مواعين في المطبخ بتقع, ودي كانت أول مرة تحصل, قال في باله أكيد القطعة بتلعب, ومكانش قادر يقوم يشوف فيه إيه, قال في نفسه لما اصحى أو لما ييجوا من الكلية يبقى يعدلوا اللي حصل, بص في الساعة كانت اتنين الظهر وظبط المنبه على الساعة أربعة عشان ميناמש كثير ويعرف ينام بالليل.

السريـر بتاعه كان في مواجهة الصالة يعني شايف نص الصالة تقريبا, وقبل ما يروح في النوم لقي حاجه صغيرة خرجت تجري من الحمام ودخلت

تحت الطرابيزة اللي بيذاكروا عليها, عقله صحصح شوية وسأل نفسه إيه اللي خرج من الحمام دا؟ القطة حجمها أكبر من حجم الشيء اللي خرج, قال يمكن فار, لكن عقله مريحوش وقرر يقوم يشوف فيه إيه, وبمجرد ما رفع نص جسمه من السرير شاف فار خرج من تحت الطرابيزة اللي في الصالة وبيتحرك ببط ناحية الأوضة بتاعته, فار حجمه كبير عن الفيران العادية ورأسه راس إنسان أقرع.

صاحبي شهق من الخوف, وفضل يدوس على لسانه ويعض فيه عشان لو كان في حلم يصحى, لكن مفيش فائدة فضل صاحبي لأنه في الحقيقة مكانش بيحلم, وعينه فضلت مثبتة على الفار المرعب دا, وفجأة الفار جري ونط على السرير بتاعه, في اللحظة دي صاحبي حس بنفس أعراض الجاثوم اللي بيحبله وهو نايم, متكفف ومخنوق ولسانه مربوط بيحاول يصرخ ومش عارف ومرت عليه دقيقة أو أكثر وهو الصراع دا لحد ما بدأ بالتدريج يسيطر على جسمه ويقرا قرآن, وفضل قاعد مكانه ينتفض مش عارف يعمل إيه ولا يتصرف إزاي, كان مستني أصحابه يرجعوا من الكلية ينقذوه ويتونس بيهم أو يصحى من الكابوس المزعج دا.

صحابه رجعوا من الكلية وشافوه قاعد مكانه بيتنفض, عرقان وجسمه سخن وبهلولس, حاولوا يهدّوه ويشوفوا حصله إيه لكنه كان في حالة متسملوش بالكلام, وبمجرد ما شافهم حواليه اتظمن بوجودهم ونام, مخه خلاه ينام عشان يحميه من الحالة اللي هو فيها.

صحابه كملوا الليلة عادي, اللي راح يطبخ, واللي راح يذاكر, واللي نزل يشتري طلبات ناقصة للعشا, ولما خلّصوا حاولوا يصحّوه يتعشى معاهم لكن كان تعبان فقرروا يسيبوه يرتاح.

يونس كان متعود ينام آخر واحد فيهم, وفجأة سمع صوت القطة بتتخانق مرة ثاني قدام باب الشقة, كان ارتاح من الخناقات دي من بعد ما دخلها تعيش معاهم, وافتكر إنها خرجت من الباب ومحدث خد باله منها وفضلت

مستنيه قدام الباب عشان حد يفتحه تاني وبعدها جي قط بالصدفة واتخاقت
معاه, يونس راح فتح الباب وبص على مصدر الصوت لقاه جاي من تحت
نزل وهو يقول بسسس بصوت عالي عشان يخوف القطة اللي بتخاقت
معاهم, وبعد ما نزل وبقي في مواجهة شقق الدور اللي تحته شاف على
الدرابزين كيان أسود شبه البني آدم في هيئته لكن كله شعر ومش لابس
حاجه, كان قاعد على الدرابزين ورجله منزلهم ناحية ناحية السلالم
والأدوار اللي تحت, كان مبتسم ابتسامة استمتاع بالخوف اللي سببه ليونس
وبيهز راسه بهدوء ويحرك عنيه البيضاء الكبيره فوق وتحت وشمال ويمين
وفي ناحية يونس.

يونس شاف الحاجات دي في ثانية وبعدها جري طلع على السلالم فوق بعد
ما وقع مرتين من الخوف, لحد ما وصل لباب الشقة وقفله بقوة وجري راح
السريبر اترمى عليه واتغطى وضربات قلبه قوية جدا كإنه عايز يطلع من
مكانه.

مقدّرش يصحي اللي جمبه ولا كان قادر يتكلم, وفضل على الحال دا
يتنفّض في السرير لأكثر من ساعتين, بعدها بصوت واطي بدأ ينادى على
محمد اللي نايم في السرير اللي جمبه وصحاه وحواله اللي حصل معاه,
وكان باين من خوفه ونبرته إنه حقيقي فعلا.

محمد قام ووقف على باب الأوضة ونادى على سامح وكريم اللي كانوا في
الأوضة الثانية واللي فيها سامح اللي حصل معاه موقف الفار.

كريم جي وكان الوقت قَرَب على الفجر, وعرف اللي حصل مع يونس,
وربطوا حكاية يونس بالهيئة اللي شافوا فيها سامح بعد ما رجعوا من الكلية,
وبعد تفكير قرروا يتصلوا على عبدالرحمن, جارهم وصديقهم لكن في كلية
الأزهر ويسمعوا إنه يعرف في الحاجات دي والرقية وكدا.

عبد الرحمن جي في قرآن الفجر, وحكوله اللي حصل فقالهم أكيد القطة دي جن, كانوا كلهم قاعدين في غرفة يونس ومحمد وسايبين سامح نايم لوحده, عبد الرحمن بدأ يقرأ قرآن ويتمشى في الشقة والتلاتة بيتحركوا في ضهره من الخوف, وفضلوا ماشيين لحد ما دخلوا عند سامح وشافوا القطة واقفة فوق الدولاب الحديد الصغير جمبه وبتبص عليه.

عبد الرحمن بدأ يقرأ قرآن بصوت عالي وهو باصص للقطة ويهددها بكلمات بالفصحى وأدعية وحاجات كتير, لحد ما القطة شالت عنها من على سامح وبصت عليها بلا مبالاة ونطت من فوق الدولاب على الأرض وخرجت من الأوضة وهي يتمشي بالراحة كإن اللي بيعملوه دا مش فارق معاها وراحت ناحية الباب اللي مقفول وخرجت منه واختفت, ومن بعدها محصلش حاجة ثاني.

انتهت

"الحكاية الثانية"

جدتي لما نقلت للبيت الجديد مكانتش تعرف إنه مسكون, كانت هي وجدي وأمي وخالتي كانوا صغيرين, جدي نقل للشغل الجديد في محافظة الفيوم, كان شغال غفير على "شونه" اللي هي بيخزنوا فيها الحبوب.

الكلام دا زمان جدا قبل ما الإضاءة تدخل البيوت, والبيت اللي استأجره جدي كان بيت قديم وكانت الناس عارفه اللي فيه عشان كدا محدش سكنه, إيجاره قليل, وكان صاحب البيت اسمه "قنديل"

ولإن ظروف شغل جدي كانت تخليه أوقات كثير يبات بره البيت فكانت جدتي تبات لوحدها مع أمي وخالتي, ومن أول ما سكنوا بيت بدأت تحصل معاها حاجات مرعبة لكنها مكانتش بتخاف, ومكانتش بتحكي عشان الأطفال اللي معاها ميخافوش, وكمان عشان مش معاهم فلوس يروحوا بيت غير دا لإن ظروف جدي كانت صعبة ومع إن البيت إيجاره رخيص إلا ان جدي كان الإيجار ببيتر اكم عليه وبيدفع كل شهرين أو ثلاثه.

البدايات اللي حصلت مع جدتي كانت خفيفة, يعني مثلا كانت وهي بتطبخ قدام "الوابور" لما تسيب الأكل وتقوم تعمل حاجه ثاني كانت ترجع تلاقي النار اتطففت, في الأول كانت تفتكر إن الهوا مثلا هو اللي طفاه لكن مع تكرار الحركة دي بدأت تحس إن فيه حاجه مش طبيعية بتحصل, لإن كمان أحيانا كانت اللمة الغاز اللي في نص السلم بتتطفي لوحدها وكانت تنزل تولعها مرتين أو ثلاثة في كل ليلة.

لحد ما أول موقف رعب حصل معاها, كان الوقت ليل بعد العشا وكنا احنا نايمين وهي جمبنا فسمعت صوت الحمار بينهق تحت, عرفت إن جدي رجع لأنه كان بيروح الشغل وييجي بالحمار, لكن لما الصوت استمر وجدي مطلعش السلم أو نادى عليها كالعادة قامت راحت ناحية السلم وبصت تحت تشوف فيه إيه؟

وعلى ضوء اللمبة الغاز اللي في نص السلم لما بصت تحت مشافتش الحمار, شافتنا أمي شايله خالتي على كتفها وبيتنططا ويلعبوا وهما الاتنين باصين عليها فوق, نظرتهم كانت كلها تحدي يعني لو مبتخافيش انزلي, جدتي اتصدمت ورجعت بجسمها لورا, وراحت تستعيذ بالله من الشيطان الرجيم ورجعت لأمي وخالتي الحقييين اللي نايمين في الأوضة وقعدت جمبهم وهي بتستغفر.

تاني يوم كانت بتحكي مع جارتها وهما فوق السطح كالعادة لحد ما جدتي
سألت جارتها وقالتلها هو البيت دا فيه حاجه؟

جارتها فهمت سؤالها لكن محبتش تقولها الحقيقة عشان متخافش يعني وكدا,
لكن لما جدتي أصرت وحلفت جارتني تقولها اللي تعرفه عن البيت راحت
قالتلها إن البيت دا زمان ماتت فيه أم قنديل, وقعت في بير السلم من الدور
الثالث ومخدتش غيرها, وماتت في المكان اللي بيربطوا فيه الحمار حاليا.

بعدها أمي قالتلي إنها كانت أحيانا تسمع جدتي وهي بتقول وبعدين يا أم
قنديل؟

ربنا يسامحك يا أم قنديل

ماشي يا أم قنديل

معايا عيال صغيرين يا أم قنديل

ولما أمي تسأل جدتي مين أم قنديل دي اللي بتكلمها على طول كانت جدتي
تقول لأمي دي واحدة صاحبتني وأنا بحب أتكلم معاها, كانت جدتي تقول

للغريته كذا عشان تبطل الحركات اللي بتعملها دي أو تحس إن جدتي لو حدها ومعها بنات صغيرين لكن أم قنديل كانت تغيب وترجع تعمل في جدتي مقلب تاني.

ومن المواقف المربعة برضو اللي حصلت مع جدتي لما كانت في البيت تحت بتضنّفه وكذا وفي عز الظهر فجأة رجلها ثبتت في الأرض كأن حد ماسكهم وفقدت السيطرة على جسمها كله وحست إن حد رمى عليها جردل مليون عطر ميتين، ريحة قوية جدا وألم رهيب في الجسم وشلل في الحركة، حتى لسانها كانت بتحاول تحركه وتقول أي حاجه لكن كان زي المربوط، وبعد دقائق بدأت إحساسها برجلها وجسمها يرجعوا طبيعي تاني ولسانها بدأ يتفكّ واحدة واحدة وراحت تقرا اللي تحفظه من القرآن لحد ما رجلها اتفكت وطلعت تجري للدور الثاني عشان تطمن على بناتها وهي منهارة وبتبكي.

وأصعب موقف واللي خلا جدتي تحكي لجدي على اللي حصل وبسيبوا البيت نهائي بلا رجعة, لما كانت بتعمل عشا دسم ليلة الخميس, كانت مشغولة بالبصل والتوم واللحمة والشوربة والتوم كان قليل فطلعت السطح تجيب ربطة من اللي مشمساهم فوق, ولما نزلت ودخلت المطبخ شافت أم قنديل لأول مرة, كانت قاعدة قدام الوابور على الكرسي الخشب الصغير وماسكة الملعقة كأنها بتطبخ, ست عجوزة لابسة أسود وشعرها أبيض ومنكوش وأول ما حسنت بجدي واقفة وراها قدام المطبخ راحت بصت عليها وقالتلها بز عيق " مش عايزاكوا هنا, سيبوا البيت"

جدتي صرخت بأعلى صوتها ووقعت على الأرض وهي في قمة الرعب وسابت الطبخ وراحت لأمي وخالتي وقررت إن دي آخر ليلة ليها في البيت.

في الليلة دي كان جدي راجع مبسوط لإنها الليلة الوحيدة تقريبا اللي بياتها في البيت, في العادة بيبات في النهار, دخل البيت وهو راكب الحمار

وبيدندن والدنيا ضلمة فجأة أم قنديل طلعتله من ركن وقالتله بصوت مرعب
"فين الإيجار يا عبد الستار؟"

الحمار كمان اتخض وبقى يعمل حركات بجسمه وجدي وقع من عليه وهو
مرعوب, وطلع يجري على فوق وينادي على جدتي وهو بيقول قالتلي فين
الإيجار يا عبد الستار.

هو كان عارف إن البيت مش طبيعي وكانت بتحصل معاه حاجات زي
جدتي كدا بس مكانش بيقولها عشان متخافش.
وتاني يوم الصبح لموا عز الهم وسابوا البيت.

انتهت

"الحكاية الثالثة"

قصة حقيقية حكّتها إحدى المتابعات وأنا ضفت عليها.

يا ترى لو العفريت اللي بيطلعك في البيت ويخوفك هو عفريت أبوك
هتعمل إيه؟

قصة حقيقية وصلتني من يومين وكانت أغرب قصة قريتها في حياتي كلها,
عقلي مكانش مستوعب أحداثها لكن فيه تفسير ممكن يكون منطقي هكتبه
في الآخر خالص.

يلا نبدأ..

أحنا أسرة مكونة من خمس أفراد, أب وأم وثلاث أطفال, والدي كان
معروف بالشهامة والجدعة, وبيخدم الكل والكل بيحبه, وفي يوم حصلت
خناقة بين اتنين بالأسلحة البيضاء ووالدي دخل بينهم عشان يحجّز وكدا
وللأسف وسط الخناقة وبدون قصد واحد فيهم ضربة بالسكينة ومخدش
غيرها, وقع من طوله وعلى ما نقلوه للمستشفى كان مات.

المستشفى كانت قريبة من البيت, شارعين بالكثير, وأصحاب الخناقة
مكانوش يعرفوا والذي شخصيا ويعرفوا بيته عشان يبلغونا, الاتنين هربوا,
ووالدي يومها مرجعش البيت ومكناش عارفين حصله إيه.

تاني يوم فيه دكتور بالصدفة اتعرف على والذي لإن الدكتور دا كان جارنا,
ووصل لرقم تليفون أمي واتصل بيها وقالها تيجي المستشفى عشان عايزها
ضروري, أمي راحت المستشفى وهي مش عارفه فيه إيه, الدكتور خدها
وراح بيها للمكان اللي فيه جثة أبويا عشان تتعرف عليه, أمي ست طيبة
كانت فاكراه نايم أو تعبان فقالت للدكتور إنهم بيدوروا عليه من امبارح
ومش عارفين يوصلوله, هو هيخرج امتى؟ قالها للأسف هو مش هيخرج,
لأنه مات.

أمي راحت تصرخ وتبكي وهي منهارة من شدة الصدمة, وفي المستشفى
حاولوا يخففوا عنها وطلبوا منها تروح تجيب الكفن وهما هيكملولها
الإجراءات والأوراق عشان تاخذ الجثة.

أمي راحت جابت كفن وفي الطريق اتصلت بأهل والدي بلغتهم وفعلا الكل جي, المستشفى كانت كلها صراخ وبكا خلال تغسيل الجثة وتكفينها وبعد ما خلصوا وقبل ما الأهل يستلموا الجثة كان فيه أمر من النيابة بتشريحها لوجود شبهة جنائية وإنه ممكن يكون مقصود بقتل مش مجرد حادث, شالوا الكفن بالدم اللي فيه وأمي عشان ست طيبة خدته معاها البيت لإن عرّفوها إن إجراءات التشريح ممكن تاخذ يوم أو يومين..

وبمجرد الكفن ما دخل البيت والرعب بدأ..

خلال يومين التشريح جات الشرطة بالليل خدت أمي وأخويا الكبير عشان يحققوا معاهم ويشوفوا هل أبويا له أعداء سابقين وكذا والإجراءات اللي بتحصل, وسابونا أنا وأخويا الصغير في البيت وللأسف كنا في نفس الأوضة اللي كان فيها الكفن واحنا أصلا أطفال صغيرين ومش عارفين حاجه, وأهل والدي والناس كلها مشغولين باللي حاصل ومحدث افكرنا,

وفجأة شوفت الكفن وهو بيتحرك من مكانه ويقع على الأرض وبدأ يتشكل في هيئة جثة نائمة على الأرض متغطية بالكفن وبقع الدم الحمرا موجودة عليه.

أنا وأخويا الصغير مسكنا بعض واحنا متجمدين من الرعب ومش عارفين نعمل إيه ولا نصرخ نقول إيه, وفجأة بقينا نسمع صوت جاي من الكفن, صوت ناس بنتخاق وتشتم بعض, وصوت رياح, وأصوات كثير مش فakraها من الخوف, لحد ما باب الشقة خبط واحنا خوفنا أكثر لكن الصوت اللي جاي من ناحية الكفن سكت, وسمعنا حد بيدخل من باب الشقة والحمد لله كانت جارتنا وجات خدتنا نقعد معاها عشان منقعدش لوحدها وقالتلنا إن أمي وأخويا هيباتوا في النيابة وهي جات تاخذنا.

تاني يوم أبويا اتدفن والعزا خلص ورجعنا لحياتنا الطبيعية, لكن البيت مبقاش طبيعي, بالليل لما قررنا ننام وقفلنا النور ومع آخر لمبة اتقفلت سمعنا صوت زعيق وناس بنتخاق مع بعض جاي من المطبخ, أمي قامت

فتحت النور راح الصوت اختفى، ولما رجعت قفلته ثاني الصوت رجع من جديد، وشوفنا شبح أبويا وهو متغطي بالكفن بتاعه اللي فيه دم واقف جمب باب الأوضة ومسند على الحيط، وراحت أمي تزعق فيه وتقوله متخوفش العيال، العيال هتحصلهم حاجة وقالتلنا ناموا انتي وانا هفضل صاحبة جمبكم.

أمي كانت مفزوعة بس مش عايزه تبين خوفها عشان احنا كمان منخافش أكثر ماحنا خايفين، وافتكرت الكفن اللي جابته ونسيت ترميه وعرفت إن هو السبب في كل اللي بيحصل دا.

وبدأ الصوت يطلع من ثاني والكفن والجنّة ظهرها ثاني جمب الباب وقتها أخويا الصغير انفجر من الصراخ والبكا وأمي هي كمان بكت وراحت تقول لشبح أبويا حرام عليك بتعمل في العيال كدا ليه، ابعد عننا لا تاذينا ولا ناذيك.

وفضلت تتشاهد واحنا مستخبين وراها من الرعب وهي بتبص عليه وتقول
بصوت عالي الله أكبر الله أكبر, واحنا وراها بنبكي, فضلنا على الحال دا
لحد قرب الفجر.

عم عادل كان رايح يفتح الجامع وفي الطريق سمع صوتنا وصوت أمي
وظلعلنا وفتح الباب بالقوة ودخل وهو بيقول فيه إيه, أمي قالتله الحقنا
عفريته بيطلعلنا وبيخوف العيال, عم عادل راح يقرأ قرآن ويقول أذكرك
بصوت عالي وقال لأمي هاتي العيال وتعالوا عندي في البيت مش هينفع
تقعدوا هنا تاني.

خرجنا الفجر مع عم عادل وروحنا بيته وقعدنا مع مراته وأمي تلطم على
وشها وبتقول نروح فين ونعمل إيه؟ وبقت تكلم أبويا وهي بتبكي وبتقول
بتعمل فينا كدا إيه؟

طلع النهار والناس دخلوا بيتنا وخذوا الكفن وحرقوه بالنار, وكان فيه بيت صغير في الشارع صاحبه مش ساكنه, خدناه وسكننا فيه, وبعد فترة سبنا المنطقة كلها وسكننا في منطقة تاني ولحد دلوقتي مرجعناش بيتنا ولا حد سكن فيه بعد الكلام اللي اتقال عليه.

انتهت.

قصة حقيقية..

"الحكاية الرابعة"

ريم لما رجعت من المستشفى كانت إيديها بتترعش وهي شايله الكيس الأسود اللي جواه هدموم أخوها وعليه الدم بتاعه, ريحة الدم كانت لسه

طالعة من القماش, ثقيلة, خانقة, حطت الكيس تحت السرير وبعدها بأيام سمعت خبر وفاة اخوها, ومن بعدها بدأت تحصل مواقف مرعبة في الشقة.

الحكاية بدأت لما ريم "مرات خالي" عرفت إن أخوها عمل حادثة موتسيكل, ونقلوه للمستشفى وحالته كانت خطيرة, كان قريب جدا منها, وأكثر واحد بتحبه في أخواتها.

وقتها كانت حامل في التاسع وجالها خبر وفاته قبل ولادتها بأيام, كانت أيام صعبة عليها وعلى أسرتها, وراحت تقضي أيام النفاس عند أهلها, وأنا بقيت أهتم بخالي وشقته خصوصا إننا كلنا ساكنين في عمارة واحدة.

كان أحيانا خالي لما بييجي عند جدتي اسمعه بيحكيلها عن حاجات غريبة بتحصل معاه في الشقة, أوقات مثلا كان يسيب الراديو شغال على إذاعة القرآن وينزل الشغل ولما يرجع يلاقي الفيشة متشاله.

النور كان يسيبه شغال ولما يرجع يلاقيه مطفي.

جدتي كانت تقوله يمكن بتتنسى أو تهيئات لكنه كان بيحلفلها بكل الأيمان إنه كان معتقد كدا في البداية وبدأ يركز في الموضوع بخصوص الراديو والنور وبرضو لما كان يرجع كان يلاقيهم مقفولين.

خالي كان بيقضي معظم الوقت معانا وببيروح شقته للنوم بس, ولما عرفنا إن مراته جايه بالليل جدتي خدتنني الصبح ورحنا شقة خالي نروقها وهي تطبخ وكدا عشان لما ييجوا تكون كل حاجه مترتبة.

أول ما دخلت الشقة مع جدتي شعري كله وقف وحسيت بخوف رهيب
ومكنتش فاهمه السبب, هي دخلت المطبخ على طول وسمعتها بتقول
شوفي لو فيه أي كوبايات أو أطباق في الأوض هاتيها عشان اغسلهم,
مشيت ناحية أوضة النوم بخطوات هادية وكان نور الصالة كاشف جزء
بسيط منها اللي فيها التسريحة, وأنا داخله عيني جات على المرايا بتاعتها
وشوفت في الانعكاس حد نايم على السرير, ظل إنسان لونه أسود, رجليا
اتثبتت من الخوف وناديت على جدتي وأنا بجري ناحية المطبخ وقولتله فيه
حد نايم على السرير.

جدتي اتترفت وقالتلي فين دا, مفيش حد في الشقة غيرنا, مصدقنتيش
وراحت هي تشوف الكوبايات والأطباق ولما راحت ناحية أوضة النوم وأنا
ماشيه وراها فتحت النور ومكانش فيه حد.

السرير فاضي تمام يعني مفيش مثلا مخده في النص ممكن تعمل الظل
الاسود دا أو بطانية أو أي حاجه.

خلصنا تنضيف واليوم عدا وبالليل مرات خالي جات هي والنونو وقعدنا في الصالة, ولما دخلت الأوضة تترتاح بمجرد بس ما دخلت النونو بكى بصوت عالي جدا جدا ومرضيش يسكت راحت جدتي قالتلها ترجع بيه الصالة تاني يمكن يسكت.

ومن المواقف برضو اللي حصلت كان خالي الثاني ساكن تحت خالي اللي بحكي عنه تاني, كان سهران في الصالة وشاف في البلكونة بطانية نازلة من شقة خالي, كانت البطانية بتطلع وتنزل إن حد بيحركها, هو افكر إن خالي بيعمل فيه مقلب وكدا, راح اتصل بيه وقاله ياعم بطل مقالب الدنيا ليل ومش ناقصين, لكن صوت خالي كان نايم وقاله مقالب إيه الساعة اتنين بالليل! احنا نايمين.

خالي مصدقوش وراح البلكونة يشوف البطانية ملقاش لا بطانية ولا حتى ملابس منتشرة على حبال الغسيل!

لحد ما في يوم جدتي راحت شقة خالي ومكانش حد فيها, كانت هتتضفها كالعادة ومكانش حد معاها غير هي بس, كانت بتكنس جنب السرير وشافت كيس أسود فنزلت تفتحه تشوف فيه حاجه مهمة ولا ترميه, فتحت الكيس وحطت إديها فيه, إيدها دخلت تحت خالص ومجابتش قعر الكيس, دخلت إيدها لحد كوها وكنفها لكن الكيس كان زي ما يكون ملوش نهاية أو مفتوح على عالم ثاني محدش يعرفه, وفجأة الكيس اتسحب منها لتحت السرير لكن كانت ماسكاه كويس, وبدأت يتشد منها وهي تشد فيها لبره لحد ما بكل قوتها شدته واترمى من إيدها للخلف وظهرت منه هدم اخو مرات خالي.

جدتي دمها نشف من الموقف وبسرعة اتصلت بخالي وقالته يجيب شيخ عشان يقرأ على الهدوم دي ويحرقوها, وفعلا بعد ساعات خالي جي ومعه شيخ وقرأ على الهدوم وأول ما بدؤوا يحرقوها مرات خالي حست باللي

بيحصل فاتصلت بخالي وحكالها على اللي عملوه, راحت انهارات وقعدت
تعيط لإنها كدا مش هتشوف أخوها ثاني, وعرفنا منها بعدين إنه كان
يحصل معاها حاجات بس مكانتش بتحكيلنا, هي كانت فاهمه إن أخوها
بيعمل كدا عشان يفضل معاها لأنهم متعلقين ببعض, ومش عايز يمشي
ويسيبها, ولحد دلوقتي هي تعبانة.

انتهت

"الحكاية الخامسة"

تخيّل لما جن يحاول يتجوز إنسية وأهلها يرفضوا بيعمل إيه؟

الكلام دا حصل سنة 1992, لما واحد اتقدم لخالتي وجدي رفض, الشخص دا مصدقش إنه ممكن يترفض وحاول بيعت ناس وكدا لكن جدي برضو رفض, ولإننا عايشين في أرياف والجهل عايش وسطنا, قرر الشخص دا يعمل عمل لخالتي, عشان يوقف حالها ومحدث يتجوزها.

وفي ليلة بعد ما جدي وجدتي وخالاتي خلصوا عشا, فجأة خالتي دي حسست بصداع وألم شديد في جسمها ووقعت على الأرض, حاولوا يشوفوا فيها إيه وفجأة صوتها اتحول لصوت راجل خشن, مش كدا وبس, خالاتي كمان صوتهم اتغير زيها, وبقي جدي وخالي واقفين مش مستوعبين الموقف.

الحمد لله جدي حافظ لكتاب الله وخالي كمان, راحوا يقرأوا وخالتي واخواتها بدؤوا يجروا في البيت ويعملوا حركات غريبة بعيونهم وجسمهم, وأغرب حاجه عملوها إنهم كانوا بيطلعوا على الحيط بصوابعهم ورجلهم

عادي, ليلة كانت مرعبة وبعدين الجن زي ما يكون حب يتفاهم مع جدي,
وقفت خالتي قدامه وجمبها خالاتي ساكتين وبدأت تتكلم بصوته, قال لجدي
إن اسمه "علي" وعاوز يتجوز خالتي وينزل بيها تحت الأرض, وكل
الفلوس والذهب اللي جدي يطلبه هيكون تحت أمره, لكن جدي رفض.

الجن قاله هخلي عيلتك أكبر وأقوى عائلة في البلد, لكن جدي رفض.

بعدها بدأ صوت الجن يتحول لصوت بنت غير صوت خالتي, بدأت تحكي
لجدي إنها متجوزه علي من زمان وعاشه معاه تحت الأرض, كانت
بتحاول تطمئه عشان يسيب بنته, لكن جدي برضو رفض وبعدها البنت دي
دخلت في موجة عياط وغيرة لأنها ملقتش حد يوقف جمبها زي جدي ما
عمل وحكت لجدي حكايتها إنها يتيمة ومقطوعة من شجرة وحاجات غريبة
كدا مش فاكراها..

ومن بعدها بدأت خالتي تدخل في دوامات صرع, وخوف, وتشنّج, وشيوخ
كثير بتيجي وتروح على البيت بدون فايذة.

خالتي لمدة خمس شهور مبتعدش دقيقة لوحدها, سواء نايمة أو صاحية
لازم حد معاها, حتى لما بتدخل الحمام لازم يكون حد معاها.

لحد ما في يوم لقوا شيخ كويس جدا وبدأ معاها العلاج وكان جايب نتيجة,
العلاج طبعا مبيكونش في يوم وليلة لكن كان هو الشيخ دا صح والعلاج
هيكون على إيده بسبب النتائج اللي حققها مع حالة خالتي.

وفي يوم تعبت بالليل بعد الساعة واحدة, والحالة اللي فيها مش بتروح غير
لما الشيخ يكون موجود ويقرا عليها, خدها خالي وجدي بالعربية وقرروا

يروح للشيخ البيت, شوارعنا في الريف بالليل بتكون ضلمة أو إضاءتها قليلة, وفجأة الجن اللي اسمه علي دا ظهر لهم وحاول يخليهم يعملوا حادثة أو يتقلبوا في التربة.

خالي بصعوبة سيطر على العربية ووقفها على جنب وبدأ جدي وخالي يقرأوا القرآن والجن معاهم يزاول فيهم, وخالتي راحت تصرخ وتستغيث بيهم وتقولهم ببعدوه عنها لأنه هياذيها ومش هياخلي حد يتجوزها وهياخليها هي نفسها غير قابلة للزواج وتهديدات كتير طول الليل من الساعة اتنين لحد آذان الفجر وبعدين اختفى وقدرنا يوصلوا للشيخ ويعملوا تحصين, وزى ما قولتلخوا لمدة خمس شهور لحد ما الشيخ دا عالجاها تماما وينهي الموضوع بشرط إنها تحافظ على الصلاة في وقتها والأذكار وكمان تلبس سلسلة ذهب مكتوبة عليها آية الكرسي وتفضل معلقاها في رقبته متقلعهاش أبدا.

كل الحاجات دي أنا مكتنتش أعرفها, عرفتھا بعد ما بدأت تحصل معايا أنا
شخصيا حاجات غريبة وبدؤوا يربطوها ببعض.

أنا كطبعي بنت بتحب الرومانسية وبتشوف الأفلام والمسلسلات, التركي
والهندي, وبقرا روايات رومانسية وكنت زي أي بنت بحلم بالعالم دا
وأتمنى أكون مكان البطلة, لحد ما في يوم بدأ يظهرلي شخص في المنام,
وبمرور الوقت بقيت بجري على النوم عشان اشوفه, وعشت معاہ فترة
كبيرة في الحلم, كنت بروح العالم الآخر معاہ واشوف قصورهم وحياتهم,
كانت أحلام جميلة مفیهاش رعب.

الرعب بدأ لما اتجوزت..

الجن اللي كان معايا وبيظهرلي دايمًا في الأحلام عرض عليا يتجوزني,
قالى إنه هيجي البيت عندنا على هيئة بشري ويطلبني من أبويا عادي,
وهيجيب كمان معاه أهله وقرايبه, ومحدث هيعرف الحقيقة غيري أنا, أهلي
هيفضلوا مقتنعين إنه متجوزة جوازة طبيعية مهما طال الوقت أو مهما
زارونا, لكنى رفضت.

رفضت لإنى كنت خايفة من المغامرة, أنا رحت معاه مرات كتير بيته
وشوفت حياتهم وعيشتهم لكنى محبتش أغامر.

اتجوزت, وبدأت تحصل مشاكل بينى وبين جوزي من أول أسبوع لحد ما
اتعودنا نعيش في هم ونكد, وفي يوم عرفت إنى حامل, وفي ليلة من شهور
الحمل الأولى كنت لوحدي في البيت وجوزي مش موجود, وفجأة الباب
اتفتح وأنا نائمة على السرير ودخلوا عليا اتنين لابسين ملابس سودة طويلة
ومداريين شعرهم معرفش إذا كانوا رجاله ولا ستات, واحد جي على يميني

والتاني على شمالي وانا مكاني على السرير مش عارفة اتكلم ولا انطق من الصدمة.

مسكوني وشلّوا حركتي, وفجأة خلت من الباب واحدة عجوزة شكلها بشع جدا ومخيفة جدا جدا, ماشيه بتتسند على عصاية وفي عنيه كره شديد ليا, ركبت جمبي على السرير وفضلت تعمل حركات بإديها فوق بطني, وتحرك صوباعها وتنغزه في بطني في كذا ناحية وبتقول هنزلها مش هخليها تكمل, وقتها كنت بصرخ وبستنغيث ومحدث سامعني لحد ما افتكرت القرآن وقرأت آية الكرسي بصعوبة وبعدين سابوني ومشبوا وآخر حاجه شوفتها عنيه لما بصتلي قبل ما تخرج من الباب وبتقولي هتعيثي أيام سودة طالما دماغك ناشفه.

حصلني نزيف بعدها والدكاترة معرفتش سببه, حالة بنتي كانت مستقرة لكن معرفوش سبب النزيف دا, وعرفت بعدها إن معمولي سحر تسليط على الحمل عشان ميكملش.

كمان من الحاجات الثانية اللي لا يمكن أنساها لما كنت حامل بابني في الشهر الرابع, وقتها جوزي رجع البيت وحصلت خناقة كبيرة بينا, كانت هتوصل للضرب فقولتله طب ابني اللي في بطني هيتأذي, قال مش عايزك لا انتي ولا ابنك, وفي نفس اللحظة حسيتي بسخونية رهيبة في جسمي وتكسير مش طبيعي وفجأة صوتي اتغير بقى صوت راجل, كَلَمْ جوزي وقاله لو حصلها حاجه كلكوا هتموتوا هنا, ورميته بإيدي مسافة أكثر من متر وقع على الأرض ورحت المطبخ جري وأنا مش متحكممة في جسمي ولا في قوتي اللي اتغيرت, مسكت أنبوبة البوتاجاز الثقيلة بإيد واحدة رفعتها وهددت جوزي إنه لو عمل حاجه تاني مصيره هيكون الموت, وفي خلال الحالة الهستيرية دي اللي أنا فيها وقعت وأغمى عليا.

صحيت من النوم بعد ثلاث أيام لقيت نفسي في بيت أبويا وأنا مش عارفة جيت هنا إزاى؟

لكن اللي فاكراه خلال نومي إني كنت بمشي في القرية بملايس البيت
بتاعتي, وفجأة ظهر قدامي جيش كبير من الجيوش القديمة اللي بشوفها في
التليفزيون, الجيش كان عبارة عن ثلاث فرق وكل فرقة ليها قائد.

قائد منهم وكان أبشعهم منظر وهيئة سمعته بيقول للفرقة بتاعته لازم تترمي
في التربة وتموت فيها زي ما هو مطلوب مننا.

لكن قائد تاني عارض رأييه وكان وسيم شويه سمعته بيقول لا, لازم
نرجعها له زي ما احنا مأمورين.

أما القائد الأخير قال احنا نرجعها بيت أبوها.

لما فوقت أبويا قالي إنه لقاني قدام البيت من ثلاث أيام وجابلي شيوخ وعرفت إن الناس اللي أنا عايشه وسطهم عاملين لي أعمال كتير وحياتي داخلة في بعضها, بين أعمال وجن عاشق وكوابيس وتعب نفسي وجسدي, ناس كتير اتأذت بسببي لإنهم أذوني, الجن اللي معايا كان بياذيههم أذى غير طبيعي, أحيانا كنت بحس بالذنب وأحيانا لا, لكن إحساسي بالذنب كان هو المسيطر عليا.. حصلت حاجات كتير كمان بعدها مش عارفة إذا كان ينفع أقولها ولا لا؟

كانت بتجيلي تهديدات من الجن إنهم كلموا والدي وحذروه من رجوعي لبيت جوزي تاني, ومكنتش عارفه إذا كانت التهديدات دي حقيقية ولا هما مش عايزين أرجع لجوزي تاني, كنت بننقل بيت جوزي شويه وبيت أبويا شويه, وكل يوم مع معالج جديد, لحد ما سمعت من واحد من المعالجين إنني مطلوبة كقربان في البيت اللي فيه أهل جوزي, كانوا بيبحثوا عن آثار أو

حاجه زي كدا مش عارفه, ومش عارفه إذا كان جوزي عارف ولا لا, لإنه لما سمع بالحكاية دي راح خدني وأجرنا شقة وبعدنا عن البيت اللي فيه أهله.

بعد ما ولدت ابني أهل جوزي معترفوش بيه وقالوا دا مش ابننا دا ابن الجن, ولعبوا في عقل جوزي لدرجة إنه صدقهم, وصدق إن دا مش ابنه, خصوصا إنه لما كان يقرب منه ويشوفه كان يقول إن عين الطفل بتتحول من الابيض للأحمر وساعات الأسود القاتم, لدرجة إنه كان بيحاول يتخلص منه.

لحد ما في يوم خالتي اقترحت علينا نجيب ناس معينة من القاهرة, معروفين بقوتهم في عالم الجن ومشهورين, وفعلا كان واضح عليهم الخبرة والقوة في العالم دا, أنا مش بحكي بالتفصيل لكن معرفكوا قصتي بشكل عام.

العجيب إن الجماعة دول كانوا بيعلموني إزاي اتكلم مع الجن واتعامل معاه, اتعلمت حاجات كتير لكن للأسف عرفت بعدين إنهم جايين لهدف معين وهو تحقيق رغبة أهل جوزي, مش عشان علاجي.

بدأت قوتي تزيد في المجال دا وفيه ناس معارفي وأصحابي عالجتهم, حتى السحرة والدجالين اللي في قريتي كانوا تلاته, بطلوا يعملوا أعمال تاني للناس, منهم واحد كان عامل عمل لصاحبتني بشلل في الإيد والعمل دا وقفته أنا وارتد عليه ولما إيده اتشلت الناس عرفت في البلد إنه هو اللي بيعمل أعمال.

لكن بعدين عرفت إن الناس اللي جايين دول مكانش هدفهم يعالجوني بالمعنى الحرفي يعني, كانوا عايزين يستخدموني, ولما شافوني بساعد الناس حذروني إني مينفعش أعمل كدا غير لو دخلت العالم بتاعهم بجد, اللي هو اتعلم الطلاسمة واكتبها, وأنفذ الطلبات اللي يطلبوها مني الخدم

الجديد اللي هيكونوا معايا, لكني خوفت, أكيد طلباتهم هيكون من ضمنها حاجات شر وأنا مش عاوزه حد يتأذي بسببي, نفسي ممكن تضعف في يوم من الأيام وأنا خايفة من دا, دا غير أن بدأت تجيلي تهديدات إنني لو استمريت في موضوع العلاج دا هتأذي في أولادي فقررت أبعد عن الطريق دا.

وعرفت إن الحال اللي أنا فيه دا بسبب اتنين, خالتي وعمي, اكتر اتنين أدوني, يمكن بسبب غيرتهم مني لإنني دخلت كلية من كليات القمة وكان فاضي سنتين واتخرج وهما أولادهم مش متعلمين كويس أو داخليين كليات عادية.

بعدها اتعرفت على معالج ثاني, قالني هعالجك بالقرآن بس, وكان قوي فعلا لدرجة إن خلّاني أزور الأماكن والقصور بتاعة الجن وأنا صاحبة بعد ما كنت أزورها مع الجن اللي معايا وأنا نايمه, وأنا لحد دلوقتي في المشاكل

دي, مع العلم إن عندي 31 سنة والحاجات دي بتحصل معايا من وأنا
عمرى 16 سنة.

إغراءات كتير بتتعرض عليا لحد دلوقتي, بالقوة والمال, إني بس أدخل
العالم بتاعهم واتعلم الطلاسم والأعمال وأنا الحمد لله لحد دلوقتي رافضة
وخايفه في يوم من الأيام نفسي تضعف وأوافق.

حابه بس أنصح الأهل شوية نصايح ياريت يعملوا بيها:

ياريت الأب والأم يقربوا من أولادهم ويصدقوهم لما يحكولهم حاجات شبه
اللى بتحصل معايا, وميقولوش الكتب والروايات هتلتبس دماغكم.

وبلاش يقولوا دا ممكن من العقل الباطن وكل دي أو هام, أنا لو حد صدقني
من البداية يمكن مكانش كل دا حصلي.

القصة انتهت لحد هنا, لكن حكاية البننت دي لسه مستمرة, ياريت تدعولها
بالتببات والصلااح ومنه الأذى عنها.

انتهت

قصة حقيقية.

"الحكاية السادسة"

وأنا صغيرة كان فيه جن بينام بين رجلينا, كان على هيئة قط أبيض لونه جميل جدا وشكله مبهج لأقصى حد, بدأ يظهر لي بعد ما والدتي انفصلت عن أبويا وبقيت أنا وهي عايشين لوحدهما وأخويا وأبويا عايشين لوحدهم.

والدتي معاها حطة أرض ورث, مبنية دور أول بس بدون سقف, يعني فقط
حيطان, وغرفة النوم والمطبخ بس اللي فيهم سقف بدائي كدا, أما باقي
البيت مفتوح للسما.

سكنا في البيت دا لوحدها أنا وهي, وكنت اسمع إن البيت دا زمان كان
عبارة عن ترعة واتردمت وسمعت كمان إن حصل فيها حوادث زي اللي
بتحصل زمان دي, إن مثلا طفل يغرق فيها, أو أهل البلد تصحى تلاقى
جثة مرمية فيها لإن كان عليها تار والحاجات اللي كانت بتحصل زمان
وكدا يعني.

كنت في الليل أسمع صوت طفل صغير ببيكي, صوت طفل حديث الولادة
عمره يوم, ببقى حاسه إنه قاعد بره باب غرفة النوم اللي نايمين فيها أنا
وأمي, الكلام دا كان بيحصل بالليل بعد الساعة واحدة تقريبا.

بكون خائفة جدا وبخاف أصحي والدتي لأن شخصيتها صعبة جدا, وخصوصا كمان إن صوت الطفل دا بيظهر ويختفي فكنت أخاف أصحبها فالصوت يختفي ومتصدقنيش وتعنفني, ببقى أوقات هموت وأروح الحمام لكن بخاف وبستنى لحد أذان الفجر لأن دا الوقت اللي الصوت بيختفي فيه.

بمرور الوقت الصوت بدأ يتختفي تدريجيا وبدأت وأنا نائمة أحس بحاجه ناعمه تحت رجلي, ولما اصحى اشوفها ألاقها القطة اللي قولتلوكوا عليها في البداية وبعدين تختفي..

مكانش فيه مفر غير إني أحكي لأمي على كل حاجه, وقد كان.

أمي بعدها راحت لشيخ وقالته عن اللي بيحصل معايا فقالها حاولي تبني البيت وتصبوا الدور الاول وتسكنوا فوق وبلاش تسكنوا تحت يعني, وإن شاء الله الحاجات دي بمرور الوقت هتروح لوحدها, وفعلا ربنا سهل لوالدتي ماديا وبنينا البيت وسكنا في الدور الأول.

لكن طول الفترة دي وأنا في البيت بكون حاسه إنني مش لوحدي, كان فيه حد معايا, حاسه بوجوده لكن مش شايفاه, ولأن شخصية أمي صعبة فكانت بتمنعني إنني أخرج مثلا أو تبقى ليا صديقات وكدا فكانت بعد طول الوقت لوحدي في البيت, أخلص مدرسة وارجع البيت, بقيت شخصية انطوائية مليش أصدقاء طول فترة طفولتي.

لحد ما كبرت واتجوزت وخلفت الحمد لله, وفي يوم جوزي اتخانق مع والدته وحلف طلاق إنه يسيب البيت وقد كان, ورحنا شقة قديمة كان وارثها عن أبوه.

شقة مفياهاش كهربا ولا أي حابه يعني مكانتش جاهزة للسكن, وبسبب ظروفه شغله البعيد قرر إنه يمشي ويسيبني أنا والولاد فقولتله مينفعش أبقى لوحدي في شقة زي كدا مفياهاش إنارة ورحنا قعدت عند والدته يومين كان خالهم جي كهربائي وظبط الكهرباء للشقة وركبها لمبات وكدا وكل حابه.

وفي اليوم اللي رجعت فيه وأول ما دخلت الشقة أنا والأولاد الكهرباء كلها ضربت في بعض وولعت لدرجة إن الكهربائي لما جي مرة ثانية يحصلها مكانش لاقى تفسير للي حصل دا.

بدأت الحاجات الغربية تحسلي تاني لما نقلت للشقة دي, يعني مثلا أنا من عادتي بحب التنظيف والترويق والغسيل بالليل, فكنت أحياناً لما اقعـد على

الكنبة استريح شويه كنت بشوف الكنبة اللي قصادي القطن بتاعها نازل
لتحت كإن حد قاعد عليها بس مبيكونش فيه حد قاعد, فاهمين قصدي؟

أوقات كمان لما بكون بغسل في الحمام بحس إن فيه إيد في البانيو بتحاول
تشدني, أو حاجه بتجذبني زي المغناطيس فكنت بخرج واستعيذ بالله من
الشيطان الرجيم واهدى شويه وارجع ثاني.

كان دايما عندي إحساس إن فيه حد بيبص عليا ويراقبني, حكيت لأمي على
كل حاجه ولما الموضوع اتطور خدتنني وللأسف رحنا لواحد ست من اللي
بيعملوا أعمال وكدا, ولما قربت من البيت شوفته لأول مرة, شوفت خيال
الجن اللي بيزاولني وبيعمل معايا كل الحاجات دي كإنه واقف على باب
البيت وبيبص عليا وبيتريق إن الست دي مش هتعرف تساعدني ولا تعملي
حاجه.

كانت ست كبيرة جدا وعجوزة وشكلها مخيف, قالتلي هاتي حاجه من
أطرك فقلعتها الحجاب اللي لابساه, مسكته وراحت توشوشه بصوت واطي
وتقول كلمات مش مفهومة وحاجات كدا زي اللي بشوفها في الأفلام ولقيتها
بعدين بتقولي أصلك إنتي اللي أدنيه الأول عشان رميتي مياه سخنة في
الحمام فقولتها كلام كذب أنا مرميتش مياه سخنة في الحمام قبل كدا نهائي
وشديت أمي من إيدها وقولتها يلا بينا من هنا عشان البيت دا كله شياطين
وجن, كنت شايفه خيالاتهم ومن وسطهم الجن اللي معايا دا.

أمي مجاتش معايا فسببتها وخرجت استنيتها بره ولما طلعت قالتلي على
أغرب حاجه ممكن أعملها في حياتي.

طقس كدا عشان الجن دا بيعد عني, إني اجيب زبادي وجميها شمعة وشوية
عيش وحاجات كدا مش مهم أقولها من النجاسات واحطهم في المكان اللي
بحس الجن دا موجود فيه, وبعدين اوطي كدا في وضع بين الركوع

والسجود واطلب منه إنه يبعد عني وميأذنيش ولا يآذي عيالي, واسيب كل حاجه مكانها وتاني يوم ابص عليها لو لقيت الزبادي اتاكلت بيقى كدا قبل الطقس بتاعي, لكن لو لقيت الزبادي مقلوب بيقى كدا رفضه.

الكلام دا مدخلش دماغي وحسيت هيبقى ذنب كبير لو عملت كدا, لكن للأسف بسبب الحاجات اللي شوفتها اضطريت اعمل اللي قالت عليه الست دي وربنا يسامحني, وتاني يوم لقيت الزبادي مقلوب يعني كدا اترفض, ندمت كثير واستغفرت كثير.

بدأت تحصل مشاكل بيني وبين جوزي, مشاكل بدون سبب, نفور وخلافات, وجوزي بطبعه عصبي, جنبنا شيوخ تحاول تلاقي حل للي بيحصل معنا لحد ما ربنا كرمنا بواحد ابن حلال.

عرفت منه إن الجن اللي معايا مرافقتي, يعني مفيش نوع من أنواع المس,
لكن مرافقتي دايمًا ومعايا في كل مكان اتواجد فيه, عرفت الكلام دا بعد ما
واحد ابن حلال حكالي اللي عندي, هو عطار عادي لكن عنده علم
بالموراثيات والروحانيات وكدا, جاب نوع من أنواع المسك "مراته هي
اللي عامله التركيبه" وقال لي ادهني منه بين صوباعين من صوباعي وقرأ
آيات معينة وعرف كل حاجه, وقال لي لازم أكون دايمًا على وضوء وأحافظ
على ورد من القرآن يوميًا, لازم كل يوم جزء, والحمد لله اتعافيت كثير
بسبب المواظبة على القرآن لكن الجن كان ملازمي وحاسه بيه لكن بدون
أذى.

قولتلکوا إني نقلت مع جوزي في بيت هو وارثه, البيت مش متشطب قوي
يعني, يمكن الشقة اللي احنا ساكنين فيها في الدور التالت هي اللي متشطبة
إلى حد ما, فكان المطبخ الأساسي في الدور الأرضي والأكل بيكون في
الشقة فوق, وفي مرة حسيت إن الجن دا معايا في المطبخ فحببت أتواصل
معه واعمّل زي ما بشوف في الأفلام وكدا, قولتلّه لو انت موجود
وسامعني, افتح شباك المطبخ, كان وقتها الشباك الهوا قفله من بره ومفیش
حاجه ممكن تفتحه من جوه غير إيدي, مفیش يعني هوا جوا هيخليه يفتح
تاني لبرا, وفي اللحظة اللي خلصت فيها الجملة الشباك اتفتح.

في اللحظة دي لفيت عشان أجري من المطبخ, وفي اللحظة اللي لفيت فيها
حسيتّه واقف قدامي بالظبط, حسيت بحرارته وقشعرة جسمي وشعري,
ولولا ستر ربنا كان ممكن يحصل مس في اللحظة دي لكن ربنا سترها.

حصلت شوية مواقف كمان في الدور الأرضي دا, اللي فيه الصالة اللي
مش بطيقها وفيه كمان أوضة كدا برضو مش برتاح لها.

في يوم قررت أنزل الصالة وأقرأ قرآن, سورة البقرة لأنني جربتتها كثير
وحافظت عليها وعرفت فوائدها, نزلت وقعدت وسط الصالة وبدأت أقرأ,
وبعد دقائق من القراءة فيه إيد خفيه اتمدت من ناحية الشمال ومسكت لساني
عشان أوقف قراءة, دا موقف مستحيل انساه.

كمان من المواقف الثانية لما أحيانا بعدي ناحية الأوضة اللي مش برتاح لها
بحس بإيد مسكت طرف كم العباية بتاعتي وشدتها, إيدي بتترفع لفوق معاها
مش مجرد أوهام يعني, اروح ساحبه إيدي وأقوله بس طيب عشان مبحبش
الهزار في الحاجات دي.

ومن الحاجات الغريبة برضو كنت حامل في ابني وفي الشهر السادس,
وكانت فيا قوة غير عادية المفروض متكونش عند واحده في الشهر دا,

كنت بنصف البيت كله من تحت لفوق بدون تعب, وغسيل وترتيب
وحاجات كثير, لكن كنت حاسه إن فيه حاجة غلط, وفي يوم بحكي لجوزي
وسبحان الله ربنا هداه كدا من أول مرة وقال لي نروح نكشف ونظمن.

مش هتصدقوني لو قولتلوكوا إن الدكتور كشف عليا وعرف إن الطفل ميت
من 40 يوم, وخلال الفترة دي محصلش أي نزيف ولا تسمم, كيس المياه
تمام وكل حاجة تمام, الدكتور نفسه استغرب واعتبرها من الحاجات النادرة
اللي بتحصل, طبعا عملت عملية ونزلت الطفل وحصلت مضاعفات ثاني
كدا إني مش هخلف ثاني, والحمد لله.

وبعدها كنت بسمع صوت طفل رضيع ببيكي بره الشقة لدرجة إني كنت
بشك في أولادي إن حد فيهم غايب عني, كنت بعدّهم واتأكد من العدد وهما
حواليا وبرضو اسمع صوت الطفل اللي ببيكي بره.

العطار اللي حكيتلكوا عنه علمني بعض الآيات وقالني لما تيجي تنامي
وجوزك مش معاكى خلى عيالك حواليكى أو نامى فى أوضتهم, متبقّش
لوحذك, وعلمني اقرأ آيات فى أركان الأوضة الأربعة وآيات كمان على
الباب فى المدخل وقالني تعملي كدا لما تخلصي كل حاجه وتكوني ناوية
تنامي ومش هتطلعني من الأوضة تاني.

وفعلا كنت بعمل كدا, وكنت بسمع الجن دا وهو بيخبط على باب أوضة
نومي, أو بيعمل حاجات يخليني أقوم أفتح الأوضة عشان اشوف إيه
بيحصل بره, لكن مكنتش بخرج, بكون عارفه إنه هو وبكون عارفه إنه
غاضب جدا وعازي يدخل لكن الآيات مانعاه, لحد ما فى يوم وقفت
وصرّخت وأنا بقوله والله لو ما سكّت وبطلت عمايلك دا لافضل اقرأ قرآن
لحد ما تتحرق.

وفي يوم برضو من الأيام اللي كان جوزي بايت فيها بره في الشغل سمعت صوت مفتاح في باب الشقة وهو بيحاول يفتحها, اترددت إذا كان دا جوزي ولا لعبة من الأعياب الجن اللي معايا, مسكت التليفون واتصلت بجوزي وسألته انت فين؟ قالي هيكون فين, في الشغل طبعا, ليه حصل حاجه؟ قولتله لا أصل سامعه مفتاح في باب الشقة برا, اتريق وقالي مفيش حاجه نامي وبطلتي تهياؤات.

لحد ما في يوم كان جوزي معايا على السرير ونفس الحركة دي اكررت تاني, وهو سمعها وقالي دا حرامي بره ولا إيه؟ قولتله مش حرامي, دا اللي حكيتاك عنه قبل كذا ومصدقتنيش, قام وخرج من الأوضة وراح ناحية باب الشقة وهو بيقول مين؟ ومازال صوت المفتاح بيلعب في كالون الباب وأنا اقول له خلاص مفيش حاجه تعالا نرجع, جوزي فتح الباب مسافه سنتي واحد وفي نفس اللحظة إيدي اتمدت على الباب وقفلته بقوة وقعدت اقرا قرآن ومن بعدها الصوت اختفى, وجوزي صدّقني.

والمرعب إن في نفس اللحظة اللي قفلت فيها الباب وقرأت قرآن لقينا ابننا
اللي عنده 3 سنين خارج من أوضته وماسك الراديو وفيه إذاعة القرآن
الكريم, جسمنا اتنفض وحسينا إن ربنا بعتلنا ابني بالقرآن عشان يحميننا.

بس كدا ودي حكايتي, كفاية لحد هنا, لسه بتحصل معايا مواقف من وقت
للتاني, بس خلاص اتعودت, وواظبت على الصلاة والقرآن والحمد لله

انتهت

"الحكاية السابعة"

مكنتش أعرف إن الأماكن السياحية ممكن يكون فيها جن أو يحصل فيها مواقف مع البحارة وطقم الباخرة, ويحكوها مع بعض عادي كأنها ذكريات.

بعد ما خلصت دراسة في مجال السياحة والفنادق رحت اشتغلت ريسبشن في باخرة سياحية, المدير كان يعرف عمي وسهّلي الإجراءات وكدا وعملولي مقابلة ونجحت فيها واستلمت شغل بعد أسبوع.

المهم دا كله كان مجرد بداية بس للي علوز أحكيهولكوا وعشان تتخيلوا الأجواء معايا الباخرة دي كانت شغالة الأقصر أسوان على مدار الأسبوع, وفيه 3 أدوار كباين للزباين ودورين تحت كباين للستاف ومطعم, لما كنت بقعد لوحدي بالليل لإنني ماسك شغل ليلي كنت بحبّ خد لفة في الباخرة وأنا جديد عشان أحفظها وكدا وطبعا كانت فيه كباين مش مسكونه فيبسيبوها مفتوحة لكن من غير إضاءة, الممر بس اللي بيكون مضاء وبصراحة كان

منظر الغرف ونورها مطفي وحش جدا ومخيف في نفس الوقت زي ما تكون مقابر أو أشباح نايمة مش عايزه حد يصحبها أوقات وأنا بمر يكون حاسس إن فيه حد ورايا أو إن في أي وقت ممكن يطلعلي شبح من أي غرفة فجأة ومعرفش أعمل إيه ساعتها, لكن كنت أوقات بتغلب على خوفاي وأدخل أي غرفة اشغل النور بتاعها واقف فيها ثواني وبعدين أطفئه وأخرج تاني عشان أثبت لنفسني اني مش خايف لكن كان شعور الخوف بيلازمني دايمًا وأنا بمر في الممرات اللي بين الغرف على قد ماهو شعور مش لطيف لكن كنت بحب أعيشه من وقت للتاني وخصوصًا إن روايات وأفلام الرعب مبقوش يخوفوني.

وفي يوم من الأيام واحنا بنتغدى كان معايا عبد اللاه فرد الأمن والشيف يحيي على طرابيزة واحدة بنتكلم في حاجات عادية ومختلفة ومرة واحدة غيرت دفة الحديث وقولتلهم الواحد مش عارف ليه بيخاف وهو ماشي في الممرات اللي بين الغرف؟

عبد الله ويحيي بصوا لبعضهم كذا من غير ميتركلموا وبصوا عليا تاني
راح يحيي سألني بتحس بايه يعني؟ قولتله مش عارف ببقى خايف كذا
وبحس إنني متراقب وحاجات غريبة، عبد الله قال وهو باصص في الطبق
بتاعه مانت بتكون متراقب فعلا!.. فيه كاميرات مراقبة في كل مكان في
الباخرة.

وانفجروا الإثنين من الضحك، الغريب إن الجملة متضحكش قوي يعني
لكن يحيي ضحك جامد وأنا ابتسمت ابتسامة كذا عشان مكسفوش، لكني
أصريت على كلامي وقلت والله بكلمكوا بجد انتوا مبتحسوش بكدا يعني ولا
إيه؟ أه صح انت يا شيف يحيي مبتلفش كثير وانت يا عبد الله تقريبا
مبتحسش وضحكت أنا ويحيي بس.

راح عبد الله وقف الأكل في بقه وبصلي وقال مين قالك إنني مبحسش أنا
بس مش عايز أحكلك عشان ممكن يكون قلبك رهيف وتسبب المكان وأنا
مصدقك إن حد جي لأنك قبل متيجي كنت ببقى أمن وريسبشن بالليل لحد
ما الريسبشن يطلع علي الصبح.

قلته بتحدي احكي لي وأوعدك إني هفضل في المكان حتى لو غرقتي نفسها
طلعت مسكونة، سكت شويه وأكل معلقة رز وقال لي لا مش للدرجادي لكن
هنخلص أكل وأحكيك واحنا بنشربلنا سجارتين مع بعض مع الشاي.

بعد ما خلصنا غدا كان فاضل حوالي نص ساعة من وقت الراحة ونرجع
الشغل تاني، كان واضح إن فرد الأمن نسي الموضوع اللي اتكلمنا فيه على
الغدا دا اللي اتضحلي وكان باين التيه على ملامحه، قالتة بدون مقدمات ها
محكتليش يعني!

قالي ياخي بتفكرني ليه الواحد ما بيصدق إنه ينسى انتوا بتمشوا ومش
بيفضل هنا حد غيري

كلامه كان جديد بالنسبالي ودا لإنني ساعتها كنت لسه يادوب مكملتش شهر
وأكيد فيه حاجات كتير معرفهاش عن الباخرة وخصوصا في الفترة اللي
الناس بتكون واخده فيها أجازة.

قلتلته بتعجب وهو أنت بتفضل هنا لوحذك لما الناس بتنزل أجازة؟ .. حتى
لو كان يعني ما الدنيا تمام اهي وزى الفل، كنت بحاول انرفزه بجهلي
عشان يجيب كل اللي عنده ونجحت في كدا فعلا لما لقيت جملتي الأخيرة
خلته يصرخ في وشي ويقول تمام ايه الكهرباء بتفصل طول اليوم ومش
بتشتغل غير ساعتين ثلاثه بس عشان المواتير والتكييف، الباخرة كلها
بتشتغل بالغاز وبمجرد الناس بتنزل بيفصلوا الكهرباء عشان يوفروا.

طب ويحصل إيه في الضلمه؟

ومديت كلمتي الأخيرة على قد ما أقدر

قالي لما جيت هنا جديد مكنتش بخاف بالعكس أنا ياما سمعت عن حكايات وشوفت مواقف والحمد لله الحاجات دي قوت قلبي مضعفتوش، شفت حاجات بعيني ولازمت شيوخ في جلسات العلاج وشفت 100 طريقة

وطريقة لإخراج الجن من جسم الشخص الملبوس وكل شيخ وله طريقته لكن لما جيت هنا كنت زي مانت بتقول كدا بالظبط لما أمشي في الممرات لوحدي أحس ان فيه حد معايا مراقبني أو ماشي ورايا، الكلام دا بيحصل والنور مظفي اللي كنت بتخاف وهو بيحصل معاك والنور شغال بس كانت فيه حاجه غريبة بتحصل معايا دايما، سكت شويه وطلع سيجارة ادهالي واخذ هو سيجارة وبعد ما ولعها وسحب منها نفس وكمل، فيه ممر كل ما اعدي فيه الاقي شعر ايديا وراسي وجسمي يوقف دا غير الخنقة وصعوبة التنفس اللي كنت بحس بيه ودي طبعا من علامات وجود جن في المكان، قبل ما يكمل كلامه قاطعته بسرعة وسألته أي ممر تقصد؟

كان باين الفضول والحماسة على نبرة صوتي وكأنني هروح اتمشى في الممر دا دلوقتي لكن الحقيقة والصراحة كنت عايز أعرفه عشان ممشيش

فيه تاني أبدا لأن بالتأكيد لو مشيت فيه عقلي هيبدا يصورلي حاجات حتى لو مش بتحصل.

سحب نفس طويل من سيجارته وقال لي لا مش مهم تعرفه المهم سألت الشيخ رزق صاحبي.. شاب صغير في السن كذا بس ايه واخذ صيت وسمعه حاجة بالصلاة على النبي. وحكيته على كل اللي بحس بيه بالتفصيل قالي بص اللحظة اللي شعر راسك وجسمك يقفوا فيها وقف ومتحركش وخذ نفس عميق كذا وانفخ صدرك وخش الغرف اللي حواليك وبين نفسك إنك مش خايف وشوف ايه الغرفة اللي هتلاقي فيها شئ غريب مثلا حاجه جديدة حاجه مش مكانها حاجة مقلوبة على الأرض.

قاطعته وأنا بقول ها وعملت ايه؟.. قلتها له والفضول بلغ عندي أعلى مراحل، قالي عملت زي نا قالي الشيخ رزق بالظبط وفتشت في الاربع غرف اللي كانوا حواليا وبالفعل لقيت في غرفه منهم كيس اسود محطوط جمب السرير قربت منه والخوف بيزيد عندي أكثر وأكثر كان ورحت اشيل

الكيس من مكانه عشان اشوف فيه ايه لقيته ثقيل جدا والخوف خلاه يقع من ايدي جربت تاني بس بدون فائدة, أخيرا قولت بسم الله بصوت مسموع ورفعت الكيس عارف لقيت فيه ايه؟ مستناش أسأله وكمل، لقيت فيه هدم واحد ست هدم لونها اسود كدا وريحتها زفره جدا مش عارف ان كانت نسيتهم ولا حكايتها ايه المهم اتصلت بالشيخ رزق وحكيلته على كل حاجة وقالى أنا جايك وبالفعل جي واخذ مني الكيس ومقولكش بقى على اللي حصل بعدها

بس مكانش معايا.. كان مع حد تاني مشي وساب الباخرة بسبب الموضوع دا.

طب وايه اللي حصل مع الشيف يحيي؟ -

بصلي كدا وكأنه بيفكر يقولي ولا لا وأخيرا بص في ساعته وقال وقت الراحة بتاعنا خلص يلا بينا نطلع على الريسبشن عشان انت عارف المدير وكمان عشان متأخرش على جون عشان تبدله وينزل هو كمان يتغدي،

النص ساعة خلصت فعلا وللأسف، طلعت بدلت مستر جون واللي نزل هو
كمان يتغدى وفضل عبد اللاه فرد الأمن جمبي بيرتب شوية أوراق
وتقاريره والخاصين بوصول الباخرة لكوم امبو.

طبعا كنا بنرسي في كوم امبو لمدة تنتراوح بين 3 ساعات و 4 ساعات
يكون خلالهم كل مرشد أخذ الفوج بتاعه عشان يزوروا المعبد، الأفواج كلها
بترجع والشمس بتكون رحبت بيهم بطريققتها لإن الكل بيكون وشه محمر
بسبب درجة حرارتها.

نسيت موضوع الشيف يحيى لانشغالي بشوية مهام بعملها في الفترة دي
وبتتلخص في طباعة شوية أوراق على الورد والاكسيل وحطي الحلو
أحمد فضولي لان اليوم دا ولأول مرة المدير يطلب كشف بجميع عمال
الباخرة من بحارة وصيانة وريسبشن وحسابات والشيفات وأي حد متواجد

على الباخرة بصورة مستمرة، الكشف أخذ مني وقت مش قليل وبصراحة
شغلني عن عبد اللاه لإنني كنت ناوي ازهقه من كتر الأسئلة.

وقت العشاء نزلت وكان آخر زبون بيخرج من المطعم، بحب أكون أول
واحد ينزل من الاستاف عشان أخذ أكثر من نوع من الحلويات لأنها أكثر
حاجة بتخلص بسرعة، ومن حسن حظي إن أول واحد خرج من المطبخ
وجي قعد معايا على نفس الطرابيزة كان الشيف يحيى، سلم عليا وقعد ياكل
وهو حاطط الفون بتاعه قدامه وبينقل بصره بينه وبين طبق الأكل من وقت
للتاني وكان شكله متابع حاجه مهمة.

حاولت أكسر الصمت اللي بينا فاتتنحنت وقلت، هو ليه عبد اللاه مرضيش
يحكيالي اللي حصل معاك وحكالي اللي حصل معاه بس؟

شال عينه من على الفون وهو مستغرب أو بيحاول يفكر في قصدي وقال
مش فاهم،

تقصّد ايه؟

قلّته حوار العفاريّ اللي اتكلّمنا فيه وكدا، ابتسم وقال يااه أنت لسه فاكّر؟ قلّته أكيد.. أنا بحب النوعية دي جدا من القصص والحكايات، قالي هو مرضيش يحكيك لإنّي طلبت منه ميقولش اللي حصل معنا لحد ومنتكّم على الموضوع عشان الدنيا تفضل سايرة دي أرزاق ناس ومش عايزين نكون السبب في قطعها.

ابتسمت عشان اتشجع شويه وقلت يعني من الآخر أنت حابب تحكي ولا لا؟

ضحك وهو بيرجع ظهره على الكرسي لورا وقال بص يا سيدي باختصار أنا ساكن جنب منطقة المراسي ومتعود لما المركب توقف آجي أقعد مع عبد اللاه شويه، ساعتين تلاته وممكن أجيب غدا معايا من البيت ونيجي نتغدى سوا وفي يوم جيت هنا بعد صلاة العشا كدا وطبعا الدنيا كانت كحل وكنت قايله من قبلها إنّي جاي لكن للأسف لما جيت ملقيتوش، رنيت عليه أكثر من مرة مردش وفي الآخر قرّرت أدخل اشوفه جوا يمكن يكون نام أو ناسي تليفونه صامت زي عوايده ومش سامع الرنات اللي رنيتها عليه.

دخلت عند مكتب الاستقبال وناديت عليه كام مرة لكن مفيش رد لحد ما قررت امشي، لكن وأنا في حيرتي بين إني امشي أو اقعد استناه كمان شويه يمكن يكون في الحمام ولا حاجه سمعته بينادي عليا من الدور الثاني فوق، قتلته ايوه تعالا ، قالي لا اطلع هنا عايزك، ردبت وقلت كسلان والله انزل تعالا نقعد على المرسى بره، قالي تعالا بس هوريك حاجه، استسلمت وطلعتله، كل ما انادي عليه ميردش غير بعد كل ثلاث اربع مرات ويقول تعالا أنا هنا، مشيت على صوته لحد ما لقيت نفسي قدام الغرفة اللي صوته جاي منها، قتلته بتعمل ايه عندك؟ بمجرد ما نطقت الجملة دي ولقيت قميصي بيتشد لداخل الاوضة، الموبايل في ايدي ومشغل الكشف وموجه قدامي لكن مفيش أي إيد ماسكاني زي ما تكون الإيد اللي ماسكاني مخفية وعمال تشد فيها للداخل وبقوة، ذهلت بصراحة الموقف كان مخيف ومرعب جدا وحاولت ارجع بجسمي لورا واحاول أشد القميص مفيش فائدة وفجأة التليفون وقع مني والدنيا من بعده بقت كحل ولقيت جسمي بعد ثواني مرمي جوه الكابينة وبابها اتقفل من ورايا، قاطعته وقتله ها وحصل ايه؟ قالي مش فاكر كتير لأن أغمى عليا بعدها بس قبلها كنت حاسس بخيالات

لناس كثير موجودة في الأوضة وصوت شبه صوت القطط كذا بس مكتوم
ودرجة الحرارة كانت عالية جدا حواليا.

الشفيف يحيى كان ماهر جدا في القص لدرجة إنني اتخيلت نفسي مكانه
وعشت كل لحظة عاشها ولقيت نفسي بسأله ها وبعدين حصل إيه؟

قال صحيت ولقيت نفسي في الغرفة بتاعتي في الباخرة واتنين عمال بتوع
الصيانة والبحرية واقفين حواليا بيحاولوا يفوقوني اللي ماسك برفان واللي
ماسك بصلة واللي بيعض في صباغي ولما صحيت وسألوني عن اللي
حصل قلتلهم مش عارف لأنني كنت فعلا مش عارف لكن افكرت كل حاجه
بعدها بساعتين تلاته وحكيته لعبد اللاه اللي كان الوحيد اللي موجود معايا،
مردش عليا ولا علق بأي كلمة وساب الغرفة ومشى وغاب عني وقت مش
فاكره قد إيه لاني نمت بعدها على طول، بعدين لقيت بيصحيني وهوا
مبسوط جدا وبيقولي خلاص خلاص كل شئ انتهى إن شاء الله ولما سألته
عن قصده حكالي على كل حاجه عن شعوره بالخوف في ممر معين من
الممرات وهوا ببشيك علي الباخرة وعن مكالمته للشيخ رزق والكيس

الاسود اللي لقاه في الغرفة والشيخ رزق جي واخده منه وأخيرا قال لي إن
الشيخ رزق هيعرف كل حاجه ان شاء الله ويبلغنا بكل جديد

أنا سكت شويه وقلت طب والشيخ رزق رد عليکوا بعدها على طول ولا
قالکوا لازم آجي أشوف الغرفة كام مرة وهاتولي بخور وجريدة خضره
طولها شبر وأربع بوصات والكلام دا

ابتسم الشيف يحيى وقال " لا الشيخ رزق اتصل على عبد اللاه بالليل وأنا
كنت معاه لإنني نويت أقضي ليلتي في الباخرة لإنني مكنتش قادر اتحرك
جسمي كله كان ثقيل جدا ومتخدر زي ما اكون واخذ بنج، المهم الشيخ
رزق جابلنا الحكاية كلها من بدايتها لنهايتها، بص يا سيدي قالنا إن من
أسبوع كان عندنا جست هولندي وكان فيهم واحد بيحب الصيد جدا
وبيقضي ساعات على الباخرة بيصيد واللي بيطلعه كان بيديه لأي حد من

العمال أو البحرية مكانش بياكله، المهم في مره الصنارة بتاعته شبكت في كيس أسود ولما طلعتها وشاف الكيس ومحتوياته رماه تاني في البحر وكمل صيد عادي اما اللي مش عادي بقى إنه لما خلص صيد ونزل للغرفة بتاعته لقي الكيس دا محطوط جمب السرير بتاعه بكل محتوياته اللي شافها قبل كدا، الموضوع كان غريب فعلا وحاول يقنع نفسه إنه جابه معاه ممكن يكون نسي من تأثير الخمره اللي شربها امبارح وزود فيها، مسك الكيس ورماه في البحر تاني وغير هدومه وخرج عشان كانت عنده زيارة لمعبد ادفو ولما رجع من الزيارة واتغدى ودخل الغرفة يرتاح لقي الكيس دا محطوط في الدولااب بتاعه.

الموضوع بقى أغرب وأعجب لكن صاحبنا بدأت تحصل معاه هلاوس بالليل وأصوات داخل غرفته وحاجات مرعبة وخاف يبلغ الأمن أو الإدارة أحسن بلبس المشكلة هو لإن الكل عارف ولعه بالصيد وأكد الحاجه دي جايه من النهر عشان ريحة الزفارة طالعه منها، المهم صاحبنا كنسل إقامته وسافر بلده قبل انتهاء رحلته بيومين ومقالش لأي حد عن اللي حصل معاه دا وطبعاً محدش له حق يسأله لأنها حرية شخصية زي ما انت عارف.

سكت يحيى وكأنه بيقولي ان الحكاية خلصت لحد كدا لكن انا كان عندي سؤال أخير مهم وهو ايه سر الكيس دا ولما سألتهوله بص لفوق كدا كأنه بيفتكر وقال بعدم اهتمام " تقريبا كان حد راصد عليه أو طلع جن من واحد وخلاه في الهدوم دي وبعدين رماها في النهر منه لله " خلصنا أكل وانا ساكت ودماعي عماله تفكر وتحلل كل اللي حصل وبتخيل نفسي إني لو كنت مكان السائح دا أو مكان الشيف يحيى كنت هتصرف إزاي أو احس بإيه ، خلصنا ورحت بعدها الغرفة بتاعتي أغسل إيدي ولما غسلتها ورحت أجيب الفوطة من على السرير شفت آخر حاجة ممكن أتوقعها ، كيس اسود تحته بقعة مياه محطوط فوق السرير بتاعي.

انتهي

"الحكاية الثامنة"

بنت بتقول إنها حامل في جن بسبب دجال نصّاب, ومش عارفه تسقطه من
بطنها إزاي؟

واحدة متجوزة ومعاها أولاد وحصلت مشاكل بينها وبين زوجها أدت
للطلاق, ولإن زوجها مكانش مهتم بأولادها على حسب كلامها, يعني لا

بيشوفهم في الأعياد ولا بيدفعلمهم مصاريف المدارس ولو دفعها بيبكون متأخر وبالعافية كمان, لحد ما سمعت عن واحد روحاني ومشهور جدا على الفيس وعلى قنوات التليفزيون وقررت تستعين بيه.

راحت بيته وكانت بتتردد عليه وبدأ يعملها جلسات وطقوس من الطقوس اللي بيعملوها, وتقريبا خلال الفترة دي الست عجبتة ودخلت دماغه, وفي مرة من المرات صحيت لقت نفسها نايمة جمبه بدون هدوم ولما سألتة على اللي حصل قالها الجن هو اللي عمل معاها كدا عشان يحل لها مشكلتها وإنها حاليا مراته, مرات الدجال.

بنقول إنها كانت تحت تأثيره وكأنه رابطها بشيء محدش يعرف يفكّه غيره, واستمرت على الحال دا معاه 10 أيام وبعدين قدرت تهرب وترجع على بيت أهلها.

البنّت تعبت جدا وكانت مرميه على السرير محدش يعرف مالها أو فيها إيه,
دكاترة تيجي وشيوخ كمان بيجوا لحد ما حالتها اتحسنّت شوية لكن خلال
الفترة دي كان بيحاول يسيطر على اللي حواليا ويخليهم يأنوا نفسهم,
والدتها, وابنها, وأصحابها اللي حواليتها بيحاول يساعدوها, كان بيعمل كذا
عشان ترجعله ويقدر يسيطر عليها من تاني.

بعدها عرفت إنها حامل منه, راحت المستشفى تعمل سونار لكن بطنها
فاضية, على الرغم من كل المؤشرات بتقول إنها حامل, كشف الحمل,
والتحاليل وكل حاجة تثبت كذا, الدكتور لما احتار معاها قالها ترجع تاني
بعد أسبوعين ويعملوا سونار مرة تاني, وفي كل مرة كان بيبان إن مفيش
حاجة في بطنها مع إن التحليلات بتقول إن فيه, دا اللي خلاها تكره اليوم
اللي راحت فيه للدجال دا وطلبت منه الطلاق كذا مرة لكنه كان رافض
وكان بيهددها إنه معاه صور ليها وفيديوهات وهي معاه وهددها بيهم لو

مرجعتلوش هينشرهم على الانترنت ويفضحها لكنها رفضت واتمسكت
بقرارها لحد ما طلقها في التلفون على حسب كلامها.

وفضلت شهر وهي بتحاول تسقط اللي في بطنها مع إن الدكاتره مش
عارفين هو إيه لكنها خدت كل الأدوية اللي بتساعد على التسقيط, سواء
برشام أو غيره.

القصة حقيقية وغريبة وعجيبة في نفس الوقت, ومواقع كتير عملت مقابلات
معاها وكانت بتحذر الستات إن ميغلطوش نفس غلطتها, لأن الشخص دا
هي عرفت إنه معملش كدا معاها بس لا, فيه بنات كتير غيرها متجوزين
وغير متجوزين عمل معاها كدا وكلهم ساكتين عشان خايفين من الفضيحة,
لكن هي اللي قررت متسكتش ومخافتش من الفضايح وكان كل همها إنها
تفصح الدجال النصّاب دا.

لما سألوها ليه راحتله من البداية, هل عشان موضوع جلب الحبيب وتخلي زوجها يرجعلها من تاني, قالت لا طبعا مكانش كدا ومبررتش ليه من الأساس راحت للدجال.

الموضوع مش داخل دماغي لأن ستات كتير لما بتروح لدجالين أو سحرة بيكونوا عارفين من جواهرم إنهم هيقدموا تنازلات وهيكونوا تحت تأثير الشخص دا واللي هيقولهم عليه هيعملوه,

فملوش لزوم من الأول إنهم يروحوا, وبعدين يتفاجئوا باللي هيحصل معاهم, الدجال أو النصاب حتى لو قرر يعمل معاها حاجه بدون رضاها والموضوع هيوصل للاغتصاب فهو عارف إنها مش هتروح تبغ عنه وتفضح نفسها إنها راحتله من البداية, هي أكيد راحتله عشان تعمل شئ لا قانوني ولا أخلاقي, دا غير إن فيه بنات وستات بيقدموا تنازلات كبيرة وبيعملوا كل حاجه برضاهم في سبيل إنهم يوصلوا للي عاوزينه.

قصص كثير مشابهة لقصة البنت دي حصلت في بلاد عربية كثير زي مصر وتونس والمغرب وغيرهم, ولو حابين اعمل حلقات عن الدجالين دول وقصصهم وإزاي خدعوا ضحاياهم قولولي في التعليقات تحت.

صاحب جوزي كان بيستنى جوزي ينزل من البيت وييجي, الموضوع بيكون غصب عني, زي الاغتصاب وأكثر, بيبقى متحكم فيا وأنا مسلوبة الإرادة, بس أنا مش خاينة زي ما ممكن تكونوا افكرتوا, هو بيبجي بروحه مش بجسمه.

الموضوع له علاقة بالإسقاط النجمي, أو الدجل والشعوذة مش عارفه, وقبل ما ناس تقول إن اللي بيحصل دا أو هام وتخاريف, ياريت تقروا قصتي واحكموا بنفسكوا إذا كان اللي بيحصل دا حقيقي ولا مجرد خيالات وتخاريف.

بس مش عارفة ابدأ منين, ابدأ من زمان وأنا عندي 7 سنين؟

ولا أبدأ من بعد ما اتجوزت بسنة؟

أنا هحكي وانتوا ركزوا لإنني مبعرفش احكي بترتيب, بعد ما اتجوزت بسنة بدأت أحس إن فيه حد معايا في الشقة, دايما مبيكونش لوحدي, جوزي بينزل الشغل الساعة تسعة مثلا وبيرجع متأخر حوالي الساعة خمسة, وكل الوقت دا وأنا في الشقة لوحدي, والمفروض إنني مخافش, لكن كنت بخاف.

كان دايما بيجيلي إحساس إن فيه حد قاعد معايا, ولما اتحرك بحس بظل ماشي ورايا وساعات بستجمع شجاعتي وأبص ورايا بسرعة لكن مش بلاقي حاجه, مع إنني متأكدة إن بيكون فيه, أحيانا بيكون فيه شعر صغير في إيدي بحس بيه بيوقف من الخوف.

كنت بخاف ادخل غرفة نومي لإنني بكون عارفة اللي هيحصل, مجرد بس
ما بطلع على السرير بحس زي ما يكون حيطه وقعت فوق.

طبعا هتفتكروا إنه جاثوم, هو آه جاثوم وفي الأول كان عادي, لكن من بعد
ما صاحب جوزي دا شافني الموضوع مبقاش عادي.

بقى جاثوم ومعاه تجاوزات جنسية, ولما بصحى من النوم بلاقي علامات
زرقة في أماكن متفرقة من جسمي من ضمنهم أماكن حساسة!

أنا وجوزي دايما بنتخانق في البيت, على أقل الأسباب, بتكون مشكلة
صغيرة جدا وفجأة تكبر وتكبر لدرجة إنني بروح بيت أهلي, ويمكن الأيام

اللي قضيتها في بيت أهلي بعد الجواز أكثر من الأيام اللي قضيتها في بيت جوزي.

يوم الخميس هو اليوم المشؤوم بالنسبالي, بروح أنا وجوزي عند حماتي ونتعشى ونسهر هناك في جو عائلي لطيف, ولما بننزل ونتمشى على أول الشارع عشان نركب توكتوك مثلا, بنعدي على دكان العطار صاحب جوزي واللي كل المشاكل بتحصل بسببه.

بيتلكك بأي حجة وييجي يوقف معنا لحد ما نوقف توكتوك مثلا, هو علاقته بجوزي قوية جدا, بيتقابلوا أحيانا يوميا ولو متقابلوش بيتكلموا في التلفون.

في الأول كانت نظراته ليا عادية, لكن بعدين بقت نظراته متغيرة, بتبقى زي الشهوة أو الطمع, والحاجات دي احنا الستات بنحس بيها جدا وبنعرف ببراعة تفكير الشخص اللي قدامنا بمجرد ما نحلل نظرته لينا.

برجع البيت يوم الخميس بالليل, والجاثوم يبيجي بعد ما ننام, ببقى حاسة بجوزي جمبي وهو بيتقلب, والجاثوم معايا بيتحسس أماكن حساسة في جسمي كأنه جوزي بالظبط, ممارسة علاقة بس بشكل اغتصاب.

ولما حاولت اربط بين اللي بيحصل ويوم الخميس بالذات بدأت أشك في صاحب جوزي, لأن لما الموضوع اكرر, ومبقاش بس جاثوم, بقى جنس وكدمات زرقية, اتكلمت مع جوزي عشان يشوفلي شيخ أو راقى يرفيني يعني ويعرف إيه اللي فيا دا وبيحصلي.

جوزي حكى لصاحبه, العطار اللي أنا شاكه فيه أساسا, صاحبه دا سكت شويه وقاله إن مراتك عندها جن عاشق من وهيا صغيرة ولما بتنام بيحصل

معاها كذا كذا, وبتلاقي بقع وكدمات لما تصحى في أماكن كذا وكذا في جسمها.

ووصف كل اللي بيحصل معايا بالظبط وأنا صغيرة وكمان وأنا كبيرة,
عشان كذا مش بقول عليه عطار, بقول عليه ساحر وبتعرفوا السبب بعدين.

وأنا عندي 7 سنين, الشقة اللي كنت قاعدة فيها مع بابا وماما كانت العمارة
مبنية فوق مقابر قديمة, فالناس بنت مسجد وفوق المسجد دا بنت شقق واحنا
كنا ساكنين في شقة فيهم.

حمامات المسجد بتحصل فيه مواقف رعب لناس كتير وانتشهرت بكدا,
خصوصا الناس اللي كانت بتيجي قبل صلاة الفجر وكدا.

وأنا طفلة كنت بكون قاعدة في الأوضة وبلعب مثلا وفجأة أشوف حد
غريب لابس أبيض وطويل وبيتمشى في الطرقة اللي فيها المطبخ والحمام.

أو أحيانا اسمع ماما بتنادي عليا ولما اروحها تقولي لا مناديتش عليكي.

برضو في مرة كنت نائمة على الكنبه في أوضة الجلوس وفجأة حد خبط
على كتفي من ورا, زي ما يكون حد نايم ورايا يعني وعازني أبص عليه,
بس مكانش فيه حد ورايا ولما بصيت ولقيت الحيطه بس قومت جريت
عليهم وحكيت لهم لكن مصدقونيش.

وبحس بموت القريبين مني من قبل ما اعرف إنهم ماتوا, أمي مثلا كانت
تعبانة وجاتلها أزمة قلبية وقصور في الشريان التاجي, وفي يوم وقفة العيد
كانت بتتنصف وكدا وفجأة تعبت وجاتلها الأزمة وفي الحالة دي بابا بيلحقها
بحقنة معينة يعني لكنه معرفش لإن الشرايين كانت هربانه من دراعها

فخدها وطلع يجري بيها على المستشفى وأنا واقفة في البلكونة ببص عليهم
وبعد ما غابوا بشوية فيه صوت همس في ودني وقالى أمك
هتومت..هتومت.. وبعد شوية نفس الصوت همس في ودني وقالى أمك
ماتت.

رحت أعيط وأصوت وأنادي على البيت اللي قصادتنا كانت فيه خالت بابا,
لحد ما جات وهدتني وبعد شوية شوفنا بابا طالع على السلم وصوته مخنوق
وطلب منها تجبله بطانية عشان يغطي أمي بيها ولما سألته فيه إيه قالها إن
امي ماتت.

كمان جدتي كان عندها مرض كذا في لسانها, حساسية بتخلي اللسان يورم
ويطلع بره البق ومكانش له علاج, طبعا اللسان بيورم ويبسد الحلق والتنفس
وهي كانت بتعاني طبعا, لا تعرف تاكل ولا تشرب ولا حتى تتنفس,
الأعراض دي بتحصل مرة كل شهر فاتعودنا يعني على الموضوع.

وفي يوم موتها كان عندها نفس الأعراض وأنا كنت نائمة على السرير
قدامها وسهرنا بالليل وبعد ما نمت بشوية صحيت بصيت عليها لقيتها
بتبصلي وبتعاني, كنت عايز اقوم اروحلها لكن جسمي كان ثقيل جدا
ومقدرتش اتحرك وسمعت نفس الصوت بيقولي سيبك منها ونامي, هي
خلاص هتموت, فعلا رحت في النوم وبعدها بدقايق سمعت صراخ أمي.

عرفت إن صاحب جوزي هو اللي بيجي وأنا لوحدي, مش مجرد جن
عاشق ولا جاثوم زي ماهو متعارف عليه, بيجيلي عن طريق الإسقاط
النجمي, دجالين كتير بيعرفوا يعملوا كذا ويعرفوا يزوروا بيت الضحية
وهما قاعدين في مكانهم, وهقولكوا عرفت واناكدت إزاي مع تتابع
الأحداث.

الموضوع سيكون زي الاغتصاب, ويبستمر خمس دقائق تقريبا, خلالهم
بحاول اقرا قرآن أو أدعية لكن بدون فائدة, جسمي سيكون متكثف ومليش
سلطة على أي عضو فيه, غير بس لساني وبرضو بدون فائدة.

قررت إنني احكي لجوزي على التطورات اللي حصلت دي, وهو بدوره بدأ
يكلم ناس ويسألها, ومنهم اللي قال إن دي أعراض جن عاشق ولازم تنام
على وضوء ومتنساش الأذكار, ومنهم اللي قال إن الجن العاشق دا معاها
من وهي صغيرة يعني من قبل الجواز, ومن الحاجات اللي بيعملها الجن
العاشق إنه بيحاول يبوظ أي علاقة بتدخل فيها البنات, سواء جواز أو
خطوبة, بيحاول يفشكها من البداية ولو اتجوزت بيحاول يخرب عليها
ويعمل مشاكل بينها وبين جوزها ومش هيرتاح غير لما يحصل طلاق.

بقيت بمجرد ما اقعد على كرسي أو على الأرض أو أمدد على السرير
أحس بكيان كذا يرميني ويكتفني ويبدأ يعمل معايا العلاقة, بدأ يجيلي انهيار
عصبي, الموضوع بقى كل يوم وكمان حوالي خمس مرات أو أكثر, كنت
ملتزمة بالصلاة ولما ورد من القرآن وبقوم الليل واقول تسبيحات وبدون
فايدة, مجرد ما اقوم من على المصلايه واروح للسرير أو الكنبه اتكتف
ويحصل زي ما قولتلكوا لحد ما بقيت بخاف اقعد أو أنام, لإنني طول منا
واقفة مبيحصلش حاجه.

الموضوع اتطور وبقي يحصل وانا صاحبة, عيني مفتحة يعني مش نائمة
زي الأول, بس اقعد في أي مكان فجأة اتكتف وتحصل العلاقة كاملة, علاقة
زي راجل ومراته بالظبط لدرجة إنني بلاقي حاجات في هدومي بعد ما
بيخلص.

الفرق بينه وبين جوزي إن جوزي يكون شايفاه لكن دا مبيكونش شايفاه.

وخلال العلاقة كنت بسمع صوت أنفاس قريبة من ودني, أنفاس حارة وبدأ يتكلم في ودني وكان صوت العطار صاحب جوزي, وخلال العلاقة كان بيحاول يقولي كلام حلو زي أي راجل وست مع بعض, كان بيقولني أنا بحبك ومقدرش استغنى عنك ومش هسيبك والكلام دا, وأنا بفضل اقوله حرام, مينفعش, واترجاه لكن بدون فائدة, كان يقولي مش هسيبك وهكون معاك على طول بس متقاومنيش, أنا فعلا مبكونش بقاومة لإنني مبكونش عندي سيطرة على جسمي, ببقى متكلفة.

أحيانا بكون في المطبخ بغسل أو بطبخ, أحس بكيان واقف ورا ضهري, مش بشوفه, لكن بحس بحرارة وبحس بيه كيان أسود طويل, ولما اخاف وأفكر اخرج من المطبخ أو أجري اروح أي مكان كنت بسمع في عقلي بيقولني متخافيش أنا جمبك, بحبك ومش عايزك تهربي مني أو تخافي وبيحاول يطمني على قد ما يقدر.

شهرين على الحال دا وجوزي كل شويه يكلم ناس ويقولوله على حاجات
اعملها وبعملها وبرضو بدون فايده, يقولولي حطي مسك بين صوابك
وبخط.

جوزي يجييلي ورق شجر والناس تقوله تحط الورق دا في مياه كثير وتقرأ
عليه قرآن وتستحمي منه وتشيل شوية في التلاجة وتشرب منه وكنت بعمل
كدا وبرضو بدون فايده.

وبمرور الوقت بدأت تحصل مشاكل بيني وبين جوزي لأتفه الأسباب
والموضوع يكبر واروح بيت أبويا وأرجع وأروح بيت أبويا ثاني, ولما
حكيت لأهلي على اللي بيحصل معايا راح أبويا كلم اتنين يعرفهم وليهم في
العلاج الروحاني, واحد منهم قال لأبويا إن دي أعراض جن عاشق وفيه
جن مع بنتك ويحصل معاها كذا وقال كل حاجه بالظبط, ولازم اقعد
معاها وتكون لينا جلسات مع بعض, وفعلا بابا خد منهم معاها هما الاتنين

وفي اليوم اللي جايين فيه قولت لبابا إنهم مش هيبجوا وفعلا محدش منهم جي.

كان أي حد يسمع بحكايتي ويحدد ميعاد بيجي فيه سواء وأنا في بيت جوزي أو وأنا في بيت أبويا مكانش بيبجي في الميعاد, كلهم بلا استثناء.

أمي كمان كلمت شيخ مشهور ومعروف بفك الحاجات دي وليه صيت في البلد عندنا, وحددت معاه ميعاد وقال إنه جاي وبرضو مجاش, أمي كلمته ثاني راح اعتذر وقالها مريت بطروف شخصية واعتذر وحدد ميعاد ثاني وبرضو في الميعاد مجاش ولما حاولنا نتواصل معاه معرفناش نوصله.

علاقتي بزوجي اتدهورت لحد ما قررنا الانفصال, وبعد ما انفصلنا وبعدت عن بيت جوزي بقيت أحسن جدا, وحالتي اتحسننت واللي كان بيحصل معايا

توقف تماما, لكن كان بيحي مرة أو اتنين قبل البريود وباقي الشهر عادي
جدا ومفيش حاجة.

كنت فاكرة إن كدا حالتي اتحسننت لكن للأسف لا ..

جوزي قالي اروح اقعد مع صاحبه العطار في المحل بتاعه واحكيه اللي
بيحصل معايا كنت مستغربة ازاي يقولي كدا خصوصا بعد ما عرف اللي
بيعمله صاحبه دا معايا, ومكنتش مصدقة لإننا قبلها بشهرين مكناش بنروح
عند حماتي عشان نتجنب العطار اللي على ناصية شارعهم يشوفني.

وفعلا نزلت وحمايا جي معايا بس قعد على كرسي بعيد عننا, في الشارع
واحنا قعدنا في الشارع, العطار جي قعد قصادي وبدأت أحكيه اللي
بيحصل وهو بيسمع وكان باين عليه إنه فرحان إني رحتله, كأنه هو اللي
انتصر في النهاية.

جاء كرسي وقعد قدامي وبدأ يبصلي ويركز معايا لدرجة إني اتكسفت
وبدأت أبص يميني وشمال عشان اتجنب نظرتة في عنيا, ولما سألتة عن
رأيه في اللي جوزي قالهوله قالي جوزك مقاليش أي حاجه, وأنا كنت
عارفه إنه عارف بس بيكذب.

وفجأة وخلال ماحنا بنتكلم حسيت بتشنج في جسمي واتكتفت, وكمان حسيت
إن فيه اتنين قاعدين ورايا ومكتفيني وواحد واقف ورا ضهري وبيخنقني.

بعدين عرفت إنه وقتها كان بيعزّم عليا عشان يربطني بيه أكثر وخلال ما كل دا بيحصل وأنا مش مسيطرة على جسمي فجأة صباغي الصغير نزل دم بدون سبب ومن بعدها بدأت أسيطر على جسمي من ثاني ولما حكيت الكلام دا للمعالجة اللي عمتي جابتهالي قالتلي آه وقتها كان بيعزم عليكى وانتى ربنا نجاكي لما الدم دا نزل, لأن بمجرد نزول الدم كل اللي كان بيحصل يفسد.

وقالتلي كمان إن العطار دا وقتها هو اللي كان متحكم في جوزك وهو اللي خلّاه يقولك تنزليه تحت, وفعلا جوزي أوقات كنت بحس إنه مش في وعيه خصوصا بعد ما حصلت شوية حاجات كدا بيني وبينه قبل الطلاق, حكيكوا عنها.

مثلا في يوم كان سهران مع صاحبه ورجع البيت, وأنا من عادتي إنى دايما بشغل الشاشة فى الصالون قرآن وكدا, قبلها بدقايق كنت واقفة قدام المراية

بالصدفة وفجأة حابه سودة وقفت في وشي زي الظل كدا والرؤية انعدمت
عني لمدة ثواني وسمعت حد بيقولي أنا هبعد جوزك عنك, المفروض
متكونيش معاه وتكوني معايا أنا بس لإنني بحبك أكثر منه وهفضل ملازمك
على طول, أنا ابتسمت بسخرية عشان أغيظه أكثر ومركزتش في كلامه.

بعدها بدقايق جوزي جي وقعد في الصالة والشاشة شغالة قرآن وبعد دقيقة
يمكن أو أكثر الشاشة فصلت, النور الأحمر شغال لكن مفيش صورة, كنت
وقتها خرجت وقعدت معاه وبتكلم واللييلة حلوة.

لقيته فجأة اتعصب وقال إنتي بوظتي الشاشة, انتي بتخربي وتبوظي كل
حابه, قولتله لا انت دخلت وكانت شغالة قدامك وأنا بعيد عنها, قالي لا أنا
من وقت ما دخلت وهي مش شغالة, ولما حسيته هيتعصب أكثر بدأت أهديه
بعد ما عرفت إنه غصب عنه ووقفت وأنا بتكلم معاه بهدوء عشان أشوف
الشاشة وقفت ليه ورحت ناحية الأسلاك اللي فيها منها ورا وبمجرد ما
بصيت فجأة لثواني الرؤية انعدمت بعد ما شوفت ظل خرج من ناحية

الشمال ووقف قدامي نفس اللي حصل قدام المراية وقال مش قولتلك مش هخليه يقربلك وابعده عنك, وبالفعل ليلتها اتخانقنا وكل واحد فينا نام في غرفة لوحده.

رحت عند أهلي وعمتي كلمتلي معالجة وبدأت تديني جلسات وكدا وفي ليلة وأنا نايمة لوحدي, والدنيا ضلمة حسيت بظل أسود واقف قدامي, كان هو العطار, نزل بدماعه كدا وقرب مني وباسني في شفافي واختفى, أنا مكنتش نايمة ومتأكدة من كدا وبعد ما فوقت حسيت فعلا إن كان فيه حاجه حقيقية على شفافي ولما حكيت للمعالجة قالتلي أه هو اللي جي وعمل كدا فعلا لكن متخافيش ولا تبيني إنك خايفة.

طول منا بعيد عن جوزي كانت كل حاجه طبيعية ومفيش مشاكل إلا تحرشات قليلة كدا قبل البريود بكام يوم, وفي فترة كدا قررنا أنا وجوزي

نرجع لبعض ثاني مع إن كل اللي حواليا كانوا معترضين وبمجرد ما بدأنا في الإجراءات بدأت المشاكل ترجعلي من ثاني.

خصوصا بعد ما كتبنا الكتاب, كنا كل ما نفكر ننقل في شقة جديدة أو ناخذ خطوة في حياتنا تحصل مشاكل تفرکش كل حاجة.

كنت بتعاقب بمجرد ما أفكر إني أرجله ثاني, حتى لما كنا بنخرج مع بعض بمجرد ما يقرب مني كنت بحس بوجع شديد في جسمي لدرجة إني مكننش بطيق جوزي ولا بحب يقرب مني, والخروجه تبوظ.

بس كان عندي حاجة مش طبيعية بتحصل معايا إني بتتبأ باللي بيحصل قبل ما يحصل, حاجة تهمسلي في ودي وتقوللي عليه.

حتى قبل ما اتخطب كنت عارفة إنني هتخطب وهتجوز وفي الآخر هنفصل
عن جوزي وحياتي الزوجية مش هتكمل على خير.

المعالجة قالتلي إن ربنا مديني خدمة, وإن الخدمة دي بتكون قوية في وقت
قوتي وضعيفة وقت ضعفي, وقالتلي أقوىها إزاي, بالصلاة والعبادة وكدا
وفعلا بكون حاسه بيهها وحاسه براحة أحياناً كإني محمية كدا وطلبت مني
مقولش عليها لحد وإلا هتروح مني.

وفي مرة كنت قاعدة عند عمتي أنا وبنتي وكان عندها صاحببتها وبنتها,
وفجأة عمتي قالت إن شنطتها ضاعت وحاطه فيها فلوس كتير وكدا وقالتلي
يمكن بنتك هي اللي ضيعتها, أنا وقتها اتعصبت جداً بس كنت حاسه إن دا
مقلب أو حوار عامليته بهزار مثلاً, متكلمتش معاهم ودخلت أوضتها وأنا
متنرفزة جداً وبدأت أتكلم وازعق وقولت للفراغ كدا أنا عارفة إنكوا اخدتوا
الفلوس, الفلوس لازم ترجعوها بأمر الله, وبقيت أقرأ قرآن وازعق واقول

كلام كثير وشاورت على السرير وقولتلهم الفلوس ترجع في المكان دا بأمر
الله.

وبعدين قولت لعمتي ادخلي دوري ثاني, ووالله العظيم عمتي دخلت ودورت
ولقت الفلوس بين ملل السرير وفي نفس المكان اللي شاورت عليه وأنا
بزعق.

وبس هي دي حكايتي, وهي دي المواقف اللي حصلت وبتحصل معايا من
وقت للتاني, فيه حاجات كثير ثانوية بتحصل بس مش لازم يعني أحكيها,
أنا قولت على المهم بس.

انتهت

"الحكاية التاسعة"

كنت خايفه ادخل الحمام لاني كنت عارفه إنه مستنيني جوه, وعلى الرغم من اني قعدت سنة كاملة مدخلش الحمام بالليل إلا إنه قدر يسيطر عليا ويخليني ادخله الحمام واقعد معاه بالساعات ويخليني أعمل حاجات عمري ما كنت متخيلة اني أعملها.

الحكاية بدأت من وأنا عندي 8 سنين, احنا ساكنين في بيت عائلة, وعمي ساكن في الدور اللي تحتنا وكنت دايمًا اقعد مع أولاد وبنات عمي ونلعب مع بعض, كانوا هما أصحابي واللي بقضي معاهم اليوم كله, لحد ما في يوم بنت عمي قالتلي إنه فيه واحد من نفس عمرنا كدا أمه ضربته وحبسته في الحمام ولما فتحت الحمام بعد فترة ملقتش ابنها.

القصة دي خوفتني جدا وشبه عملتلي تروما, ببقى دايمًا خايفة وأنا لوحدي, وكمان كنت بخاف ادخل الحمام وخصوصًا بالليل, والموضوع دا استمر لمدة سنة, حتى بالليل كنت بخاف أنام لوحدي ولو حبيت أنام كنت اروح

عند أوضة ماما وبابا وأنام قدامها, كنت بحس بالأمان في المكان دا وكنت بنام بسرعة.

الموضوع اتحول لخوف مش بس وأنا صاحبة, حتى لما بنام كنت بحلم بكوابيس, وأكثر كابوس كان بيتكرر إن أمي حبستني في الحمام وحصل معايا نفس القصة اللي حصلت مع الواد اللي أمه حبسته.

حتى أولاد وبنات عمي لما كنت بلعب معاهم مكانوش بيبحبوني, مثلا يشدونني من شعري, يشيلوني مع بعض ويرموني, مع إني كنت طيبة خالص ومبعملش أي حاجة تضايقهم, ولو مثلا اشتريت حاجة كانوا ياخذوها مني, لحد بمرور الوقت بعدت عنهم خالص وبقيت أقعد في أوضتي لوحدي والعب مع نفسي, وبدأت أحس إن حد بيلعب معايا.

كنت بقعد بالساعات مع إني في الأول كنت بخاف اقعد لوحدي, لكن بعدين
بقيت أعشق حاجه اسمها وحده, حتى أمي لما كانت تقولي إنها هتنزل تروح
مشوار وهتقفل عليا كنت بفرح جدا إني هقعد في البيت لوحدي, ومكنتش
عارفة السبب.

حتى لما كبرت نفس الإحساس دا موجود عندي, بحس حد معايا دايمًا,
برجع من الشغل احكيه اللي حصل معايا وتفصيل يومي, بفضفضله وأقول
كل حاجه تخصني, وأنا مش عارفة هو إيه ولا بتكلم مع مين, بس ببقى
حاسه إنه معايا.

بعدها بقيت أحس بميول غريب ناحية الحمام, بقيت أحب اقعد فيه, واقف
قدام المرايا بالساعات, اتكلم واضحك واغني, وسوري يعني بكون من غير
هدوم.

والأسوأ في فترة المراهقة، كنت بدخل الحمام والاقى نفسي لا إراديا بقلع
كل هدمي واعمل حاجات وحشه، أنا معرفش عرفتها إزاي، يعني مثلا
عمري ما شوفت أفلام أو مواقع من اللي يخلوني أعمل كدا بس كنت بلاقي
نفسى بعمل كدا لا إراديا، كإن فيه حاجه مسيطرة عليا.

أنا شكلي جميل جدا وشعري طويل وجسمي متناسق، لدرجة إن ماما كانت
تقولني متخليش البنات يشوفوا شعرك.

وفجأة وأنا على الحال دا بقي يغمى عليا وأنا في الحمام، وبابا شال المرايا
اللي جوه، ورحت لشيوخ وبقى بديني حاجات كدا احطها في مياه وقال
أستحمى بيها بس أنا مهتمتش لحد ما في يوم حصلي موقف كدا وبدأت
أصرخ وطلبت من ماما تقص شعري ومرتحتش غير لما قصتهولي فعلا
وبقي عند وداني كدا.

موقف ثاني برضو حصل وأنا في سن المراهقة, ماما ضربتني فسببت البيت
وسافرت لمحافظة تانية بيني وبينها حوالي 8 ساعات وأنا معرفش عملت
كدا إزاي؟

وقتها البلد اتقلبت عليا وقرابيننا راحوا يدوروا في كل حته لحد ما وصلولي
والناس قالت إن حالتي مش طبيعية ولازم نوديهها لشيخ يشوفها.

الشيخ قالهم بنتكم ممسوسة ولا تقرب من ربنا وتواظب على الصلاة وكدا,
وناس ثاني قالت إنني مريضة نفسية والمفروض اروح لدكتور يعالجني,
لكن كنت بحس إن أهلي مش مهتمين بيا, حتى بابا كان يقولني إنتي شكلك
مجنونة وهتتعيبينا.

خذت فترة لوحدي بعيدة عن الناس كلها, ولما بدأت أقرب من أصحابي
وأعمل صداقات كنت بلاقيهم يبعدوا عني بدون مبرر, مع إني والله عمري
ما أذيت حد منهم ولا جرحته بكلمة, حتى لو قربت من شخص وحببته
ألاقيه برضو بعد عني بدون سبب.

فبدأت ارجع للمرايا تاني, اقعد على كرسي التسيريحة بتاعتي واقعد اكل
المرايا بالساعات وادخل في خيالاتي اللي برسمها لنفسي, ولما أمي تشوفني
وتسألني بتكلمي مين مكنتش برد عليها.

حتى أخواتي الصغيرين لما كانوا ييجوا ويشوفوني كانوا يضحكوا ويقولوا
اختنا مجنونة.

برتاح جدا وأنا قدام المرايا, ولما بكون مضايقة بفضفض وأعيط وارتاح
وأكلهما وأحس إن حد بيسمعني ويرد عليا ومتقبلني ومش بيبعد عني زي
الباقيين, بروحله في أي وقت بيكون موجود ومستعد يسمعني ويساعدني.

بقيت برضو أعرف الحاجة قبل ما تحصل خصوصا الناس اللي هتموت
وغيرها من الحاجات اللي بحلم بيها وتتحقق في الحقيقة, مثلا عمي قبل ما
يموت بيوم حلمت إنه كان لابس أبيض وببسلم على العائلة كلها, حتى
المواقف اللي بتحصل معايا في الشغل ببقى شايفها في الحلم قبلها بيوم.

عمتي ساكنة قريبة مننا ولما سمعت عن اللي بيحصلي جات وأخذت حاجه
من هومي وراحت بيها لشيخ عشان تشوف إيه مشكلتي قالها مفيش حاجه,
لكنها مقتنعتش وقالتلي هاخذك واروح بيكي لشيخ ثاني, بس أنا اللي رافضة
ومش متقبلة لا شيوخ ولا علاج ولا أي حاجه ومش عارفة أعمل إيه؟

"الحكاية العاشرة"

جوزي اتجوزني عشان يقدمني قربان للجن عشان يوافق ويفتح مقبرة أثرية, وكنت أنا اللي هكون القربان.

اتجوزت وعمرى 14 سنة زواج تقليدى عادى من ابن خالة أمى, وبعد ما كملت أربع شهور بدأت أحس بحاجات غريبة بتحصى وتحصل حواليا لحد ما بدأت أحكى لزوجى وأهله لكنهم اتهموني بالجنون, كنت بشوف حاجات مرعبة بتحصل فى البيت, وحتى لو نمت كنت بحلم بكوابيس, ومع تكذيبهم ليا ولحكاياتى بدأت مقولش اللي بيحصل لكن دخلت فى مرحلة اكتئاب شديد, وكمان وقتها كنت حامل.

الغريب إن أهل جوزي عندهم برود غير طبيعي, لما كنت احكيلهم, مكانش ببيان عليهم الدهشة مثلا أو حتى الاستغراب, كانوا يسمعون حكاياتي ويهزوا راسهم وميعملوش حاجة, لدرجة إنني شكيت فيهم وفي اللي بيحصل حواليا.

لحد ما في يوم رحت لأهلي وحكيت لأبويا اللي بيحصل معايا, خاف عليا جدا وقرر ياخذني لشيوخ من معارفه يطمئن عليا, ووقتها اتفاجأنا من الحكايات والمعلومات اللي قالها لنا واللي أنا نفسي كنتي مغيبة عنها ومفكرتش فيها.

كانت فيه أوضة كدا معينة في البيت وأهل جوزي كانوا بينقبوا عن الآثار فيها, وكانت دايمًا مقفولة ومش مسموحلي أدخلها, والقربان اللي هيتقدم للشيطان اللي جواها كنت أنا.

الشيخ السفلي اللي كان بيتابع عملية الحفر كان بيعمل كل الطقوس عليا أنا, وأنا مغيبة, جوزي كان بيخدرني وبيحضروا الجن على جسمي, ودا السبب اللي خلاني أحلم بكوابيس دايما وأشوف جن وحاجات بتتحرك في البيت لوحدها ومكانوش بيصدقوني لما أحكيلهم, لدرجة إني انا نفسي قولت يمكن تهيوأت وبتحصل مع ناس كتير ومش لازم أكبر الموضوع.

والشيخ قالنا كمان إن الجن طلب دم مني, فالدجال السفلي قطع جزء من صباع إيدي الصغير وبعدها لما فوقت لقيت نفسي على السرير وجوزي جمبي ولما شوفت إيدي متضمة وسألت حصل إيه جوزي بص في عيني وقال بكل حب وخوف إني قطعت جزء من صباعي وأنا في المطبخ وأغمى عليا فاضطر ياخذني للمستشفى وعملولي اللازم.

وقتها رجعنا من عند الشيخ دا وأبويا مش لاقى كلمات مناسبة يواسيني بيها
لكن كنت شايقة ملامح وشه كلها حزن وأسى, ومن يومها مرجعتش لبيت
جوزي تاني وطلبت الطلاق.

لكن مشكلتي فضلت مستمرة, كوابيس في النوم ومواقف مرعبة في اليقظة,
كنت بشوف عالم الجن كإني واحدة منهم ومنفعتش معايا كل المهدئات
والمسكنات.

والدي كان كل فترة ياخدني لشيخ استمر معاه يومين وفي اليوم الثالث
يموت, في الأول كنت فاكراه إنها مجرد صدفة لكن لما اتكررت ثلاث
مرات عرفت إن الموضوع خطير وأنا في مشكلة كبيرة.

كنت بخاف على الناس اللي هروحلها لإنني عارفة مصيرهم هيكون إيه,
وكنت برفض واقول لأبويا لأ لكنه كان يصبر, ومع ذلك بمجرد ما نروح

لشيخ وقبل ما ندخل عنده يروح يقول للتابع بتاعه يطردنا بره, والدي كان بينصدم من رفض المعالجين لينا لكن أنا اتعايشت مع الأمر عشان محسش بتأنيب الضمير.

وبعد فترة في المحاكم قدرت اطلق من جوزي وبعدها سمعت إنه مات في حادثة عجيبة ملهاش تفسير.

مشكلتي متحلتش وبقيت عايشة حياتي كلها بعمل حاجات مش بكون عايزه أعملها, ومبقاش عندي القدرة للسيطرة على جسمي وأمي هي اللي اهتمت برعاية بنتي.

انتهت

"الحكاية الحادية عشرة"

حصلت معايا في المقابر حادثة ومعجزة في نفس الوقت, الموضوع مكانش تهيئات لإنني أختي كانت معايا وشافت كل اللي هحكيهولكوا دلوقت.

القصة حصلت زمان كنت متجوزة ابن عمتي وعندني وقتها 16 سنة,
وأختي كان عندها 14 سنة وكانت تيجي تزورني كل فترة وتقضي اليوم
معايا من أوله لآخره.

وفي يوم جات الصبح وقعدت معايا فقولتلها يلا ننزل السوق نجيب شوية
طلبات, السوق مكانش بعيد قوي عن البيت, حوالي نص ساعة أو اقل
مشي, والسوق دا كانت جمبه المقابر.

الجو كان صيف ولما وصلنا كانت الساعة جات 12 وفي وسط ما احنا في
السوق وبنتكلم أختي سألتني عن المقابر واتكلما شوية فقولتلها تعرفي إن

عمتك (مرات جوزي) مدفونة في المقابر دي, قالتلي طب إيه رأيك نروح
نزورها تعرفي القبر بتاعها؟

قولتلها أه لإني جيت مع زوجي كام مرة قبل كدا, وقررنا ندخل المقابر,
الدنيا ضهر وونس ومفیش حد هيكون فيها يعني, والسوق جمبنا والناس
رايحه جايه فمفیش حاجه تخوف.

دخلت أنا وهي ومشينا شوية وأنا بحاول اتعرف على قبر عمتي, لكن
للأسف معرفتوش, المقابر كلها كانت شبه بعضها, وفجأة حسيت اننا توهنا
وقررنا نرجع تاني لكن للأسف معرفناش, كل ما نمشي ألاقى إننا ماشيين
في نفس المكان كأننا في دايرة مفرغة ومعرفناش نطلع.

بدأنا نخاف ونتوتر, واختي قالت تعالي نمشي للآخر أكيد هنلاقي باب خلفي
للمقابر ويأريت ما مشينا, لإننا بدأنا نشوف قبور مفتوحة وعظام ميتين
وهياكل عظمية منها اللي موجود على باب القبر ومنها اللي في نص

الطريق, أختي بدأت تعيط وأنا معرفتش أتصرّف إزاي وفجأة شوفنا حوش فيه كلاب نايمه ومتحوط بسلك, الكلاب كانت ضخمة الواحد منهم في حجم الحمار, كنت عارف إن دول مش كلاب, دول عفاريت, أنا نجمي خفيف وبحس بالحاجات دي بسرعة جدا وبعرفها, حظيت إيدي على بق أختي عشان تسكت وقولتها الكلاب دي لو صحيت هتاكلنا أنا وانتي.

وربنا سترها وعدينا من منطقة الكلاب دي, وفجأة شوفنا اتنين رجالة ماشيين قدامنا, معرفش ظهروا امتى وإزاي؟

فرحنا جدا إننا لقينا ونس في المقابر وسط الموقف اللي احنا فيه, وفضلنا ماشيين وراهم لحد ما وصلنا قدام باب المقابر وفجأة اختفوا, فرحتنا بالباب خلطنا منركزش في اللي حصل, كان كل همنا نخرج من المقابر, ولما رجعنا وحكيّا لأمي قائلنا دول وارد المقابر من الجن الطيب وظهرولكوا عشان يرشدوكوا للباب, ومن وقتها مدخلتش المقابر دي تاني.

وفي يوم برضو وأنا صغيرة كانت بتجيلنا واحدة تساعد أمي في أمور البيت وكانت بتجيب معاها بنتها اللي من نفس سني, وكانوا ساكنين آخر الشارع بتاعنا, اليوم دا أنا كنت قاعدة تحت قدام البيت وشوفت البنّت دي وهي داخلّة بيتنا وبتزق مع مامتها إنها عايزة فلوس تشتري جاز عشان تعمل شاي, أمها شددت معاها في الكلام راحت البنّت خرجت الشارع وبقت تمسك طين وترمي على أمها, لحد ما أمها طلعتها الفلوس ورمتهالها وقالتهالها خدي انشاله تولعي في نفسك.

البنّت خدت الفلوس ومشت وبعدها بشوية شوفت واحد جارنا جي بيجري وبيقولنا انتوا قاعدين وماجدة ولعت في نفسها, وقتها كان جاي ياخذ لحاف ويلحقها بيه وفعلا لحقها وراحوا بيبها المستشفى لكن اتوفت هناك.

ومن بعدها بكام يوم بدأت تحصل مواقف غريبة في العمارة عندنا.

مثلا نسمع أصوات قطط بتتخانق مع بعض, أو عواء ذئب مثلا, وكلاب وحيوانات مختلفة.

النور مثلا كان بيشتغل ويطفئ لوحده بدون سبب!

وفي مرة برضو أنا شوفت ماجدة وهي داخلة الشقة بتاعتنا ولايسة فستان عروسة ومعها بنات كتير ماشيين حوالها, فضلت ماشية في الشقة لحد ما طلعت على الحيط والسقف عادي جدا وأنا وقتها نايمة مع اخواتي حاولت اصحيهم عشان يشوفوا لكن مكانوش بيصحوا, ولما حكيت لأمي الصبح قالتلي يمكن بتحلمي.

أمي برضو في يوم وهي في غرفتها شافت كلب كبير داخل عليها وكان جمبها كوباية مياه راحتها رمته بيها والكلب مشي واختفى وأمي

افتكرت إنها بتحلم لكن المياه كانت موجودة على الأرض فعلا يعني مكانش حلم.

تحت العمارة بتاعتنا فيه مخازن وكدا, وناس كتير من اللي كانت تيجي بالليل تاخذ حاجات من المخازن قالوا إنهم كانوا يشوفوا ماجدة وهي واقفة تحت وبتغني وبتنادي عليهم بأسمائهم, قطط وكلاب تحت البيت وأطفال كنت أشوفهم في الحمام بتاعنا.

لحد ما جبنا شيخ وبعد ما قرا وكدا قالنا هي مرتبطة بالمكان دا ومش عايزه تسبيه, وفضلنا على الحال دا كام شهر وبالتدريج بدأت الحوادث تقل تقل لحد ما اختفت خالص.

انتهت

"الحكاية الثانية عشرة"

القصة اللي هتقراها دلوقتى ممكن تكون صعبة التصديق وممكن متدخلش عقل, لكنها قصة حقيقية فعلا حصلت مع طالب خلال فترة إقامته في السكن الجامعي, القصة استمرت على مدار 6 شهور والمفروض صعب توصل للزمن دا لكن استمرت والمفروض كان صدفة بحتة ولولا الصدفة كانت هتستمر لأكثر من كدا.

انا أسمي وليد, طالب جامعي في السنة الأولى, بعد ما التنسيق بعنتي لجامعة بعيدة عن المحافظة اللي أنا فيها قدمت أوراقى للالتحاق بسكن الجامعة بناء على طلب والدي لأنه كان يظن السكن خارج الجامعة ممكن يتسبب في انحرافي عن مسار التعليم ومصادقة أصدقاء السوء وغيرها من الأسباب.

مش مهم اقول تفاصيل الجامعة بتاعتي, بس اعرفوا إن عددنا في الفرقة الأولى كان قليل لأنها جامعة مرموقة جدا, وسكن الجامعة كان نصيف جدا على غير العادة بسبب اللي كنت اسمعه عن السكن الجامعي والزحمة اللي فيه وقلة النظافة وغيره

المبنى ضخم جدا وهادي جدا جدا, رحت قبل بداية الدراسة بيومين عشان ارتب نفسي واعرف المكان واتعود عليه, رحت الجامعة وقابلت المشرف وهناك سجل اسمي وسلمني المفتاح اللي عليه رقم الغرفة وقالي شوية بنود حافظهم وكان واضح إنهم بيرددهم, زي المحافظة على النظافة وغيرها من الحاجات المعروفة من حيث السلوك والانضباط وغيرهم.

رحت السكن, مبنى ضخم وهادي جدا, استقبلني البواب على الباب ومسالنيش كثير لما شاف الشنطة اللي في إيدي, كان باين عليا إني طالب

جديد, سألته عن رقم الغرفة بتاعتي قالى الدور الثالث ورجع يكمل كتابة في دفتر كبير قدامه بعد ما سألني عن اسمي والسنة الدراسية وبعدين سابني ادخل.

كان واضح إن فيه طلاب وصلوا قبلي وكان باين عليهم إنهم في السنة الأولى زيي, لإنهم كانوا بيتعرفوا على بعض ومستغربين المكان وكانوا بيتمشوا كأنهم بيتعرفوا على سكنهم الجديد.

وصلت للغرفة بتاعتي وفتحت الباب, اتفاجأت إن فيه واحد جوه, نظراته اتثبتت عليا بمجرد ما دخلت, قولت السلام عليكم, وبعد لحظات رد عليا السلام ببرود جدا كأنه مكانش عاوز.

الغرفة كبيرة جدا ومقسومة نصين قد بعض بالظبط, كل نصف فيه سرير
وجمبه دولاب صغير وفي الركن فيه مكتب متوسط الحجم, وبين كل نصف
والثاني فيه صالة صغيرة فيها كرسيين قصاد بعض وبينهم طرابيزة كلها
من الزجاج تقريبا.

اتشغلت بترتيب الدولاب وفرش السرير بدون ما اتكلم مع اللي ساكن معايا,
ولا هو حاول يكلمني, لحد ما العصر أذن, رحت الحمام اتوضيت وطلعت
المصلاة بتاعتي لكن مكنتش اعرف القبلة, فروحت للي ساكن معايا وكان
قاعد مكانه في الصلاة متحركش, سألته عن القبلة وشاورلي بإيده على
مكانها وبصيت عليه ثواني وكنت مستغرب هو بيعمل إيه بقعدته دي, يعني
لا ماسك تليفون ولا بيقرا كتاب, قاعد وباصص قدامه وبس.

صليت وطلعت قعدت في الصلاة في محاولة لكسر الغموض, اللي بيني
وبينه, سألته عن اسمه واتكلمنا شوية كلمات قليلة عرفت منها إنه في سنة

رابعة, واسمه هشام, وساكن في نفس الأوضة من 3 سنين مبيحبش يغيرها
أو يمشي منها.

طول فترة إقامتي معاه كان كلامنا قليل جدا, وتقريبا مشوققوش بياكل ولا
بيشرب قبل كدا, دايم لما اصحى ألاقيه صاحي, بيظهر ويختفي فجأة.

لا عمره كلمني عن أهله ولا عن نفسه ولا عن أي حاجه, كنا بنتكلم في
موضوعات عامة, وأحيانا لما كنت اكلمه عن المستقبل وخططه وكدا كان
يبان على وشه الضيق والحزن ولما أسأله مالك يقولي مفيش عادي.

في مرة كنا قاعدين بنتكلم بعد العشا وسمعت صوت قطتين بيتخانقوا مع
بعض بره كعادة كل يوم ولما قولتله صوتهم مز عج وبيضايقني, قال مش

هتسمعهم تاني وفعلًا صوتهم سكت في نفس اللحظة وبعدين مسمعتش
صوتهم في أي يوم تاني.

وفي مرة برضو كنت بحلم بجاثوم وبعافر معاه في النوم ولقيته جي
صحاني ولحقني منه ومن فرحتي بإنه صحاني نسيت أسأله عرفت إزاي إن
معايا جاثوم أو أسأله جيت صحيتني ليه؟

في مرة رجعت من المحاضرات وناديت عليه كالعادة لكني مسمعتش
صوته, دورت عليه ملقيتوش فقولت يمكن خرج, دخلت الحمام ولما طلعت
لقيته قاعد في الصلاة, سألته فينك دورت عليك قال لي كنت في السرير بتاعي
وأنا متأكد إنني مشوفتوش.

وغيرها من الحاجات الغريبة والمريبة اللي بتحصل بيّنًا, لحد ما في يوم
كنت اتعودت على الباب وبقيت اقعد معاه وهو كمان بدأ يحب قعدتي معاه

ويحكيلي عن شبابه وحياته وأولاده, كنت بقعد مع البواب أكثر من قعدتي مع هشام لأنه كان قليل الكلام, وفي يوم وسط كلامي مع البواب سألته عن هشام اللي ساكن معايا, وبدأت احكيه إن الشخص دا غريب ومش عارف إيه, لقينته بيقولي انت محدش ساكن معاك.

قولتله لا, فيه واحد ساكن معايا من أول يوم جيت فيه هنا, واسمه هشام وكملت كلام وحكاوي عن طبعه الغامض والغريب وإني مشوفتوش قبل كدا بياكل ولا يصلي, البواب سابني اتكلم ودخل جاب الدفتر بتاعه وفتحه قدامي, قالي اهو شوف محدش ساكن معاك اسمه هشام.

صعقت في البداية لكن بعدين قولت يمكن البواب مسجله في غرفة تاني وكدا, وأنا احلف وهو يحلف بس كان بيبیتسم وسط الحلفان, لحد ما قولتله طب تعالا معايا وشوف بنفسك, قالي لا ملوش لزوم, قولتله والله لنتيجي معايا, اتململ في البداية لكن قام غصب عنه ورحنا للغرفة بتاعتي وفتحتها

ودخلنا مع بعض وكانت المفاجأة, مفيش هشام, سريره فاضي, لا عليه ملايه ولا المخده عليها كيس مخدة, الدولاب فاضي, كل حاجه تبين إن مفيش حد ساكن في النص دا من الغرفة.

البواب قالي تعالا نقعد تحت, خدني وانا مصدوم ومش عارف اتكلم ولا اقول حاجه, ولما نزلنا حكالي موضوع هشام إنه مات مقتول في الغرفة دي بسبب مشكلة حصلت معاه هو وطالب ثاني وحتى الطالب مكانش قصده يقتله, ومن يومها الغرفة مقفولة.

ولما المشرف عطاك المفتاح وقابلتك أول يوم استغربت ازاي المشرف عمل كذا؟ لكن واضح انه كان مشغول وقتها ومعرفش إنه بيديك مفتاح الغرفة اللي اتقتل فيها واحد من 3 سنين, وأنا لما لقيتك نازل طالع معندكش أي مشكلة قولت يبقى مفيش حاجه حصلت معاك والموضوع عدا طبعي.

تخليلوا 6 شهور عايش مع هشام ومفيش هشام ولا حاجه.

قصة حقيقية

انتهت

"الحكاية الثانية عشرة"

أنا مولودة ومعايا قبيلة من الجن, وكنت بصحى من النوم ألاقي ذهب وفلوس تحت المخدة, بصوا كل حاجة عني أو تخصني مكانتش طبيعية من قبل ما أتولد , جايز ان الكلام دا يكون أوفر بالنسبة لأي حد هيقراه, لكن هي دي الحقيقة فعلا وهدأ من الأول خالص وتحديدًا من قبل ما أتولد بشهر ونص أو شهرين, أمي شافت في المنام شيخ كبير في السن لبسه كله أبيض, شعره وشعر دقنه كل حاجه فيه كانت أبيض, كان واقف في نص أوضة نومها قدام السرير بالظبط, طبعا كانت نائمة ومش قادرة تتحرك , قالها " جملة واحدة بس " بنتك هتكون مباركة

أمي صحيت بعد ما الشيخ قال جملته واختفي من بعدها, ما استنتش لما الصبح يصبح وصحت أبويا في وقتها وحكتله اللي شافته في الحلم ولما احتار ومعرفش يرد عليها قالها أكيد دا حلم عادي لأنك بتفكري كتير في اللي في بطنك وشاغل بالك, ممكن يكون عقلك الباطن حب يريحك ويصور لك حلم وحد يطمنك فيه أنها بنت وطبعا أمي صدقت الكلام دا أو حاولت تصدقه لأنها من الناس اللي بتقلق جدا وبتشغل دماغها بالتفكير في مشاكل غيرها كأنها مشاكلها وبيبان عليها الأرق والإجهاد دايمًا

الغريب بقى ان قبل ولادتي بأسبوع الحلم دا أكرر أكثر من مرة, نفس
الحلم بتفاصيله لدرجة ان أمي حفظته بتفاصيله وهيئة الرجل والجملة اللي
هيقولها وهيقول امتي وهيختفي امتي وهي كمان هتصحى امتي وهكذا
وبالمثل قالت لأبأبا عن حلمها المتكرر ومحدث فيهم عرف يلاقي تفسير للي
. بيحصل

في اليوم الموعود يوم ولادتي العيلة كلها فرحت وجاءت البيت عشان تهني
وتبارك واتضح بعدين ان العيلة مش لوحدها بس اللي فرحت لأن في نفس
اليوم بالليل وبعد الكل ما مشي أمي وأبوي سمعوا أصوات زغاريد في البيت
. كله مع ان مكانش فيه حد غيرهم

كل شئ بعد كدا بقى طبيعي لحد ما بقى عندي 7 سنين تقريبا وبدأت أشوف
ظواهر وحاجات غريبة حواليا, يعني مثلا لما أكون بلعب في الأوضة
لوحدي كنت أشوف ناس قصيرين ملمومين حواليا, في البداية كنت أخاف
منهم واهرب واروح لأمي أستخبى فيها, بعدين بدأت أتعود علي وجودهم,
أجسامهم كانت بيضة كدا زي لون النجوم منهم اللي لابس أحمر واللي

لايس أخضر, واحد واحد منهم كان يقولي السلام عليكم ولما ارد عليه السلام يختفي, وهكذا يختفوا بالتدريج بس آخر واحد فيهم كان مختلف عنهم شويه, عينيه كانوا مدورين ومناخيرة صغيرة جدا جدا مقارنة بوجهه, عرفت بعدين أن دا القائد بتاعهم وان كل دول عشيرة من الجن المسلم . ساكنين معنا في البيت

كل الحاجات دي متعتيرش رعب بالنسبالي, الرعب الحقيقي بدأ وانا عندي " 18 سنة وتحديدا لما اتخطبت , نسيت صحيح أعرفكوا بإسمي " رفف

في يوم الخطوبة كنا أنا وخطيبي زي أي اتنين مخطوبين بنتعشى مع بعض في أوضتي والناس كلها بره, كنا ندردش شويه ونضحك شويه وفجأة خطيبي قام زي الملسوع وفضل يبص حواليه زي المجنون ولما سألته مالك قالي والله فيه حد ضربني علي قفايا من ثواني بس, بعد شويه هدي لإنني طبعاً حاكياله من الأول علي كل حاجة وهو كان متمسك بيا لأبعد الحدود, الليلية كانت جميلة جدا ومفيهاش حاجة غريبة غير الموقف دا بس, مشيوا المعازيم وكنت بساعد ماما في توضيب الصالون وكدا ونشيل أطباق الجاتوه والمخبوزات وغيرها وفجأة أمي شمت ريحة حاجه بتتحرق, جريت طبعاً وانا وراها واكتشفنا ان الريحة جايه من أوضتي, أمي من تسرعها

ولهفتها كانت هتدخل الأوضة لكن انا لحقتها بسرعة وطلبت منها متعملش
لأنها ممكن تتأذي, واني هدخل لوحدي وبالفعل بمجرد مدخلت حصل زي
الأفلام كذا بالظبط النار

. اختفت فجأة وأمي أغمى عليها

كمان من الحاجات الغريبة اللي حصلت مع خطيبي لما نزلنا أول مرة
نشترى حاجات للشقة بتاعتنا, معرفش يسوق العربية ولولا ستر ربنا كان
زمانا في عداد الموتى كان حاسس أن فيه حد مسيطر علي العربية غيره
وبيحاول يدخل بيها يمين وشمال بطريقة عشوائية وخطيبي حاول علي قد
ما يقدر يسيطر علي الموقف لحد ما لقي مكان ينفع يركن فيه وركن ونزلنا
أخذنا تاكسي خالصنا بيه كل المشاوير ومن ساعتها لما نحب نخرج نتفصح
. أو نشترى حاجه يركن عربيته قدام البيت ونقضيها تاكسيات أو مواصلات

كمان من الحاجات الغربية اللي كانت بتحصل معاه انه في مره مثلا جي من المحافظة اللي فيها شغله للمحافظة اللي فيها بيتنا وفي نص الليل ولبسه الميري ودي مسافة مش قليلة طبعاً وفضل يخط علي الباب زي المجنون ويهلوس ويقول كتير مفهمناش منه غير كام جملة

" انا بحبها "

" مقدرش أعيش من غيرها "

" بيضربوني وأنا نايم ويقولولي سببها "

وفضل متمسك بيا برغم كل اللي شافه منهم ولولا وجوده وإصراره كان زماني لحد دلوقتي متجوزتش , لأنهم ببساطه كانوا هيطفشوا أي حد يتقدملي لكن هو قاوم واستحمل كتير وعشان كذا أنا متعلقة بيه جداً وبحاول . أسعده علي قد ما أقدر .

كمان فيه مواقف تانيه كانت بتحصل مع جيرانى في مره مثلا مش فاكهة جارتنا عملت ايه لما كنت صغيرة وبلعب في الشارع خلّنتي أعيطر , مفيش

كام دقيقة وجارتي دي جات تخبط علي باب بيتنا زي المجنونة وتقول لماما
خلي بنتك تسامحني بيتي بيتحرق ومش جارتي بس اللي حصل معاه كدا
كان أي حد يحاول يزعلني أو يأذيني كانت بتتردله أضعاف الأضعاف ودي
حاجه مش كويسه زي ما ممكن تكونوا فاكرين, الإحساس بالذنب حتي لو
معملتش حاجه أو مش بإيدي حاجه كان صعب جدا عشان كدا لما كان
يزعلني مكنتش ببين أو أعيط وأحاول أكتم في نفسي عشان الشخص دا
. ميتأذيش

بعد فترة الموضوع اتطور وفي مرة كنت لوحدي في الأوضه بالليل
وحسيت أن فيه حد جمبي لمسني أو حضني حاجه زي كدا وسمعتة بيقول
" بحبك ومستحيل أخليكي تكوني لحد غيري مهما كان التمن "

كان أول مرة توصل للمس ساعتها نظيت من علي السرير وفضلت أقرا أي
قرآن حافظاه وأقول أي دعاء بييجي علي لساني وفجأة النور أوضتي بس
اللي اتطفي زي ما قالولي ومعرفتش حاجه غير ثاني يوم الصبح قالولي

انهم سمعوني بصرخ ولما دخلوا أوضتني لقبوني واقعه علي الأرض
. ومغمی علیا .

قررنا بعدها نزور شيخ وكان صيته حسن يعني وناس كثير بتشكر فيه,
حددنا معاد ولما رحاله وبعد ما قرا عليا شوية شال إيدہ من علي راسي
زي الملسوع ورجع لورا وهو باصصلي بخوف , حاول يسيطر علي نفسه
ويخفي آثار فزعه وخوفه وقال خلاص تمام كذا البننت كويسه ومفيهاش
حاجه وملوش لازمه تيجوا هنا ثاني, بس طبعا الموضوع كان واضح جدا
ان فيه حاجه وهو مخيبها وبعد محاورات كثير مع بابا اللي رفض انه
يمشي غير لما يعرف كل حاجه بصراحه ووعدہ اننا مش هنجي ثاني هنا
لو قالنا الصراحة بكل وضوح, أخيرا الشيخ قالنا أن الجن حرقوله ابنه بس
حرق خفيف كتحذير ليه وإنه لو حاول يساعدني أو يقرأ عليا ثاني يبقي هو
اللي جابه لنفسه, بعدها لفينا علي شيوخ كثير ودكاتره نفسيين وبرضو
مفيش فايده لحد ما استسلمنا للأمر الواقع ورضينا بقضاء

. الله وقدره .

الحمد لله احنا من عيلة ميسورة الحال وكانت طلباتي كلها مجابة واللي نفسي فيه بشتره لحد ما في مرة لقيت نفسي بتمني يكون عندي خاتم ذهب علي أحجار كريمة مع اني מבبش الذهب خالص يعني أو متعلقه بيه تعلق البنات وكدا, ومع إني كنت عارفه إن حالتنا المادية متسمحش انهم يجيبولي حاجة زي كدا لكن رحت قلت لماما ومتصدمتش طبعاً لما عرفت ردها, نمت الليلة وأنا بالي مشغول بالخاتم والصبح لقيت خاتم ذهب عليه حجر كريم أحمر موجود جمب راسي, والذي لما عرف حذرني من لبس الخاتم دا لحد ما نزوح لشيخ يمكن يعرف ماهيته ولما رحنا وأول ما الشيخ مسكه . وقع منه علي الأرض وإيده وجعته وماخذناش منه عقاد نافع

من بعد اليوم دا وكل ما أصحي ألاقي فلوس جمبي أو أساور ذهب وكنت لما أرفض اخدهم واسيبهم مكانهم أروح ألاقي كلام غريب علي الحيطه في أوضتي مكتوب بالدم لحد ما الموضوع بدأ يتطور فيا انا شخصيا وخصوصا عنيا, كان اللي يشوفهم يخاف وميقدرش يركز فيهم والسبب الله . أعلم

طبعاً كلوكوا اتوقعتموا أن يوم فرحي هيكون يوم غير عادي و هتحصل فيه أحداق ومواقف غريبة وفعلاً دا اللي حصل , يعني مثلاً لأول مرة يحصل إحصار في المدينة بتاعتني أو بمعنى أوضح في الشارع بتاعنا ومن ساعتها كمان بدأت عادة غريبة تحصل عندنا في البيت , فيه غراب أسود دخل أوضة نومنا وفضل يلف فيها زي ما يكون بيدور علي حاجه أو بيعمل حاجه وبعدين خرج ثاني ودي مكانتش صدفة أو حصلت مرة واحدة بس مثلاً لا كان كل يوم يجي نفس الغراب دا ويعمل نفس اللي كان بيعمله قبل . كدا .

أما بقى فترة الزواج فدي كانت أسوأ فترة في حياتي , طبعاً جوزي كان بيحبني جداً ودا أثر عليه سلبياً لأنهم كانوا بيحقدوا عليه وبيغيروا منه وكان كل ليلة وهو نايم جمبي كنت أسمع بيهلوس زي ما يكون بيتخناق في الحلم ونفسه يتكتم ويتخنق ولما أصبحته كنت ألقى جسمه كله أزرق زي ما يكون . حد ضربه فعلاً وهو نايم .

بعدين بقى يعمل حاجات تكرهني فيه , حاجات مش من طبيعته اللي أنا عارفها , يعني مثلاً يقولي كلام يز علني وأنا عشان حساسة شوية كنت أعيط مثلاً يروح المسكين يدفع التمن , في مرة كسروا له صباعه ومرة ثانية

عمل حاجه زعلتني راحوا زودوا الإنتقام وخلوه يعمل حادثة بالعربية وخبط بنت بس الحمد لله مما تتش, وأنا عارفه ومتأكدة أن مش هو اللي بيعمل كل دا .

جوازنا إستمر سبع شهور بس واتطلقنا, كملنا حوالي 3 سنين طلاق لحد دلوقتي وبيحاول يرجع بس للأسف الرجوع لا كان في مصلحته ولا مصلحتي أنا كمان, لكم أن تتخيلوا بقى إن لما اتطلقت العالم كله زي ما يكون فرح بطلاقي, لما رجعت بيتنا كنت لما أدخل أوضتي ألاقىها مليانة عطور وروائح جميلة فوق الوصف وطبعا بيتنا رجع جنة من ثاني لأن علي حسب كلام والدي ووالدتي إني لما خرجت منه ورحت بيت جوزي كانوا عايشين في جحيم وشافوا أهوال وحاجات ما يعلم بيها إلا ربنا وكانوا مخبيين كل دا عليا طول السبع شهور جواز عشان متحصلش حاجه تأثر علي جوازي .

طبعا قبل الطلاق كنت حامل وربنا رزقني بالمعتصم بالله وكل الخير جي معاه زي ما حصل معايا بالطببط وقبل الحمل شوفت في الحلم واحدة محبة

بشرتني بالحمل بتاعي وفالتلي اه هيكون ولد ودا اللي حصل, بعد الولادة خليتهم يعاهدوني انهم ملهمش علاقة بابني أو يتدخلوا في حياته زي ما عملوا معايا وعاهدوني بكدا فعلا وقالولي ان عمرهم ما هيضروه أو يمسوه بسوء, هما كمان كانوا فرحانيين بيه لأنه ابن الغالية رغم كرههم الشديد لأبوه .

موقف كمان , في يوم من الأيام فيه شاب كدا خبط علي باب بيتنا وطلعه والدي, قاله انا فلان ابن فلان وكل ليلة أحلم ببيتك رهف وهيا مخاويه الجن فلان وفلان وأنا كمان مخاوي وكنت عايز أطلب منها طلب لو تسمحلي بس أكلمها, بابا دخله البيت وجي حكالي, لبست الحجاب ودخلت عليهم الصالون وبمجرد ما شافني الشاب اتصرع وفضل يتكلم بلسان الجن اللي مخاويه ويقول كلام كتير منه المفهوم ومنه الغير مفهوم, قتلته أنا مش عايزة أتكلم معاك انت أنا عايزة أتكلم مع الشاب نفسه, غضب جدا لكن مقدرش يعمل معايا حاجه لأنني متحصنه طبعاً وبعد دقائق فاق الشاب ورجع يتكلم بصوته العادي, سألته عايز مني أيه ؟ قالي بكل جرأة انه عايز ياخذ الجن اللي معايا ويضمهم إليه, قتلوا هتقدر عليهم, رد بكل ثقة .. أكيد

وبدا يقول طلاسـم وكلام لاستحضار الجن فعلا, قلت في نفسي للي معايا لو كنتوا أقوى منه ومن اللي معاه اثبتولي كذا وبمجرد ما قتلها فجأة لسان الشاب اتربط ومبقاش عارف يتحرك أو يتكلم, قتلته دا واحد بس من اللي معايا لو فعلا تقدر عليه فك نفسك منه طالما انت تقدر عليهم, معرفش طبعا وسبته علي الحال دا حوالي ربع ساعة وبعدين طلبت منهم يفكوه, هو كان مخاوي طبعا بس جن ضعيف زيه وكان حد مسلطه عليا لكن مرضيتش أضـره لا هو ولا اللي مسلطه وخصوصا انها ست وملهاش في موضوع الجن أصلا .

فيه مواقف وحاجات تانية كتيرة طبعا حصلت معايا لكن كفاية لحد كذا وأظن انكوا عرفتوا جانب كبير من حياتي وأنا زي ما اتولدت وهما معايا هموت برضه وهما معايا وطبعا الحمد لله علي كل شئ

. انتهت .

"الحكاية الثالثة عشرة"

اسمي سحر اتجوزت عن حب دام 3 سنين وبعد معاناة الشقة واختيارها وتجهيزها وشوية مشاكل بسيطة قدرنا نتجوز أنا وخال، الحالة بتاعتنا مش هقول بتاعة خالد لأنه بقى جوزي، الحالة بتاعتنا كانت على قدها شوية عشان كدا سكنا في شقة متطرفة شوية مش في وسط البلد يعني وكدا بس الحمد لله يكفيني إنه بقى جوزي، مش هطول عليكم في الكلام ... في اليوم الثاني من جوازنا كانت بتحصل معايا أنا شخصيا حاجات بسيطة كدا لكن مكانتش طبيعية كبايه توقع من على المطبخ، علبة الشاي ألقاها مقلوبة على جنبها مع إني بكون متأكدة انها مكانتش كدا في آخر مرة حطيتها، نور المطبخ ألقاها شغال الصبح مع اني بقفله قبل ما انام واقول يمكن خالد بيروح يشرب بالليل وينساه مع إني بحط مياه على الكومودينو عشان اللي يصحى بالليل لكن عادي أكيد الإنسان مش بيحس أو بيفكر حاجه في الدقيقتين اللي صحي فيهم راح الحمام أو راح يشرب ، كان كل يومين تلاته تبدأ حاجة جديدة تحصل مكانتش بتحصل قبل كدا والموضوع يتطور، يعني مرة كنت بحضر الغدا وخالد كان تحت بيشتري شبسي وكولا وشوية

طلبات كدا وحسيت بهوا دافي جمب ودني مع إني ساعتها كنت بعيدة عن
البوتاجاز وحتى لو كنت جمبه مكانتش نار الشعلة هتوصل لودني أساسا
لكن عديتها وقلت أكيد عشان أنا في المطبخ والجو حر يكون دا شئ طبيعي
لكن اللي خلاني أفتح الموضوع مع خالد لما فرشت السرير بعد ما صحينا
ونزل يتفرج على ماتش كورة وأنا رحت اغسل المواعين لقيت السرير
متبهدل إبن فيه أربعة او خمسة كانوا نايمين عليه حتى لو أنا مكنتش رتبته
مكانش هيبقى بالمنظر دا وساعتها قررت أحكي لخالد وأقوله على كل
حاجة حتى الحاجات البسيطة هحكيلوا عليها، بعد ما اتغدينا ودخلنا الأوضة
نريح ساعتين لحد العصر اتكلمت معاه وحكى له كل حاجة وهو ببسمعني
باهتمام ولما خلصت كلامي فكر شوية بتركيز كدا وقاللي، حاجة غريبة والله
انتي متأكدة من الكلام دا ولما قلته طبعاً متأكدة قاللي طب ننام دلوقتي ولما
نصحى نفكر في الموضوع دا وبالفعل نمنا وباقي اليوم مشي طبيعي على
غير العادة ولما سألتله على العشا في الموضوع اللي اتكلما فيه بعد ما
اتغدينا قاللي موضوع ايه دا انتي أول ما دخلتي الأوضة وحطيتي راسك
على المخدة نمتي على طول من غير متسمعي مني جملة تسلم إيدك يا قلب
. قلبي اللي بتحبي تسمعيها على طول، واضح كدا انك كترتي في الأكل

أول ما جوزي قالي ان الكلام دا محصلش وإني محكيتلوش حاجه بقي اتفتح لوحده من كتر الصدمة وفضلت دقيقة أو أقل متتحة وأنا بحاول استوعب الموقف وهو يقولي مالك يا بنتي فيه إيه لحد ما فوقت من الذهول اللي كنت فيه ولقيت نفسي لا إراديا بقوله لالا مفيش حاجه جايز كنت بحلم .

وقتها كان مر أسبوع على جوازنا وعلى الساعة 8 وربع كدا لقيت خالد بيلبس بسرعة ونازل سألته رايح فين قالي فيه ماتش اسمه كلاسيكو فاضل عليه نص ساعة ولازم ينزل بدري، كانت اللهفة والفرحة باينين عليه ومرضيتش أcker مزاجه واقوله لا خليك معايا بخاف ومش مطمئة للشقة اللي عايشين فيها ولما سألته هتقعد قد إيه قالي بسرعة وهو بيلبس الشراب . بالمقلوب مش هتأخر على الساعة 11 إن شاء الله هكون هنا .

ساعتين ونص مقعدهم لوحدي لأول مرة مدة كبيرة جدا وخصوصا لما يكون الخوف هيلازمني.

أطول فترة قعدها خالد طول أسبوع جوازنا كانت تلت ساعة أو نص بالكثير لما يكون نازل يشتري حاجة أو نازل يصلي في المسجد اللي جمبنا، لكن الحمد لله محصلتش أي حاجه غريبة في الساعتين ونص دول مع اني طول الوقت دا كنت في أوضتي ومخرجتش منها ابدا حتى للحمام خفت . يحصل معايا زي ما بشوف في الأفلام واسمع من الحكايات

بعد ما خالد جي اتشعينا ونمنا وليلتها حلمت حلم غريب لأول مرة اشوف شبيهة ليا في حياتي، حلمت إنني في غابة شجرها كله لونه أبيض وشجر طويل جدا ومتشابك في بعضه وأنا كنت لابسه لبس أخضر بالكامل عمري ما شوفت تصميم مشابه ليه قبل كدا لكن كان لبس محتشم، اتمشيت في الغابة وأنا مش عارفة رايحه فين لكن زي ما تكون رجليا كانت عارفة كنت بمشي لا إراديا لحد ما لقيت بنت جايه ناحيتي من بعيد وماشيه بنفس الهدوء والسكينة اللي كنت أنا ماشيه بيها لكن كان واضح عليها إنها مش مستغربة

المكان زيي بتعدي وسط الشجر وبين الحشائش زي ما تكون عيشة هنا من فترة طويلة، قربنا على بعض وملامحها كل شوية تظهرلي أكثر وأكثر لحد ما وقفنا قدام بعض متفصلناش غير خطوتين أو ثلاثه وساعتها ملامحها كلها ظهرتلي كانت جميلة جدا وفيها شبه مني نفس الطول والهيئة والملامح كمان ركزت أكثر لقيت ملامحها شبه ملامحي بالظبط بس على أجمل ولما ركزت أكثر عرفت انها أنا بس بصورة محسنة أو مطورة او مش عارفة المهم كانت هيا أنا لكن مكنتش أنا هي وبمجرد ما عرفت واناكدت انها انا بدأ بيان الحزن على وشها وعنيها دمعت وكانت على وشك العياط وأول ما فتحت بقها وهنتكلم صحيت

لما صحيت من النوم مكنتش خايفة ولا حاجه زي ما بيحصل معايا في
العادي لما بشوف كابوس، قلت خير اللهم اجعله خير لكن فضلت باقي اليوم
وأنا بالي مشغول بالكلام اللي كانت عايزه تقولهاولي البنت اللي شبيهي في
الحلم، يا ترى كانت عايزه تقوللي إيه؟

أكيد فيه رسالة معينه كانت عايزه توصلها ومعرفتش وبعد شوية تفكير
طنشت الموضوع وشلته من دماغي خالص

بعد المغرب كنت بغسل المواعين ومنسجمة وإذ فجأة بطرف عيني لمحت
البنت دي عدت من قدام المطبخ، انا مش متأكدة مين الشخص اللي شوفته
من ثواني لكن اللبس بتاعها كان نفس اللبس اللي شوفتها بيه في الحلم!

اتمسمرت مكاني لمدة ثواني مخي كان بيحاول يفهم اللي حصل وبعدها
خرجت بسرعه ابص في الصالة ملقتش حاجه، ضربات قلبي ساعتها بدأت
تزيد والأدرينالين انتشر في جسمي كله وجريت على أوضتي كأنها الملاذ

الوحيد ليا وقللت الباب ورايا بالمفتاح واتصلت على خالد وكلمته وأنا بعيط
وطلبت منه يسبب أي حاجة في ايده وييجي البيت بسرعه والله اعلم إن كان
. فهم كلامي من وسط العياط ولا لا

**

بعد وقت مش عارفه قد ايه باب الأوضه خبط اتفزعت في الاول لكن
افتكرت إنني كلمت خالد وقتله بييجي، قمت فتحتله الباب واترميت في
حضنه وبدأت ابكي من أول وجديد وهو مستغرب ومش عارف فيه ايه
وهو عمال يسأل حصل ايه فيه ايه والقلق باين جدا في نبرته قتلته أخيرا
وأنا بنهنه أنا مش مستحيلة العيشة دي أنا زهقت، قالي وهو مستغرب فيه
إيه هو أنا زعلتك في حاجة أو حصل مني حاجة قتلته بسرعه لا مش انت،
بص بصراحه فيه حاجات كتير غريبة بتحصل معايا هنا قالي اقعد بس
واحكي لي لعله خير، قعدت علي طرف السرير وحكيته علي كل حاجة
حصلت من يوم ما سكنا في الشقة دي والحلم اللي شوفته وكمان اللي حصل
من شويه، قالي اكيد بيتها لك منا عايش معاكي اهو مبتحصلش ليه الحاجات
اللي بتحصلك دي قتلته دا اللي مش عارفه معناه وعلى فكرة الحاجات دي

بتحصلي وانت مش موجود إنما طول مانت في البيت مفيش ولا أي حاجة غريبة بتحصل.

فكر شويه وقال مش عارف طب بصي تيجي نخرج نتعشى بره طيب ممكن يكون اللي انتي فيه دا بسبب الملل والخنقة قتلته بسرعة لا مش عايزه اخرج خليك بس جمبي ومتمشيش، قالي حاضر هقوم بس أغير هدومي وانتي قومي اعمليلنا اتنين ليمون ساقعين كدا من إيدك الحلوه ولا اقولك هغير هدومي واروح اعملهم أنا خليك انتي مرتاحة، غير هدومه وخرج من الأوضة وبعد شوية جي ومعاه اتنين ليمون شربناهم وقال متقلقش يا حبيبتي أنا بس مضغوط اليومين دول وأعدك بعد ما يخلص الشهر دا هنشوف شقة تانية تكون قريبة من شقتكوا عشان لما اروح الشغل تروحي تقعدي مع مامتك أو تزوريها من وقت للتاني.

كلامه ريحني وفرحني طبعاً وقال كمان بس عشان خاطري متخضنيش خضه زي دي تاني انتي متعرفيش أنا جيت على آخري ازاي، هزيت

راسي بمعنى حاصر راح ابتسملي وباس على راسي وقال هروح الحمام،
اتأخر جدا، ناديت عليه مردش ، خفت عليه وقمت بسرعة اطمن عليه لكن
ملقيتوش في الحمام ولا في أي مكان في الشقة رجعت الأوضة ثاني عشان
أرن عليه لإن تليفوني فيها لقيته بيرن عليا وبيقولي معلىش يا حبيبتي
مسمعتش الرنة بتاعتك خير فيه حاجة؟

قيل ما ارد عليه عيني جات على كبايتين الليمون لقيت واحده منهم فاضية
والتانيه ملبانة على آخرها ، ومش عارفة ليه قتلته لا يا حبيبي مفيش كنت
بظمن عليك بس

بعد اللي حصل دا واطرر معايا للمرة الثانية عرفت إن اللي معايا مش
عاوزين أو مش عاوز جوزي يعرف حاجه من اللي بتحصل ومكنتش
عارفة هل دا مجرد تخويف ولا ممكن تكون حاجه تانيه أنا مش عارفاها ،
لكن اللي حصل معايا بعد كذا أكدلي إن دا مش تخويف ولا حاجه لإنني في
يوم وأنا برتب السرير وافرشه لقيت ورقة صفرة محطوبة بعناية بين
المرتبة والمفرش، ورقة باهتة والكلام اللي عليها مكتوب بخط الإيد وشكله
مقارب لخط النسخ من جماله لكنه مكتوب بالإيد مش على الكمبيوتر أو آلة
. كاتبة حتى

الورقه ريحتها غريبة وأقرب ريحه ليها ممكن تكون ريحة القرنفل أما
الكلام اللي مكتوب عليها مش مفهوم، آه كنت عارفه اقراه لكن الجمل
مكانتش راكبة على بعضها، كنت متأكدة إن الورقة دي مكتوبة علشانى وإن
جوزي مهما حصل مكانش هيشوفها حتى لو كانت قدامه، المهم حطيتها
على جنب لحد ما أشوف حد بيّفهم في الحاجات دي شيخ مثلا أو دجال
حتى بس كانت نيتي طبعا إن جوزي ميعرفش لحد ما أشوف حل للمشكلة

اللي أنا فيها لإنني اتأكدت إن محدش هيعرف يخرجني من المشكلة دي
غيري.

حطيت الورقة جمب الأباجورة ورحت أفرش السرير وارتبته وأنا بالي
مشغول بيها، بعد ما خلصت وجيت أخذها عشان اشيلها لحد ما اشوف
حكايتها، لقيتها محطوبة في كوباية المياه ولما ركزت أكثر لقيتها بتتحلل
جواها زي متكون قرص فوار وجزء كبير منها داب بالفعل في المياه،
اتلبخت ومعرفتش اشيلها ولا لا ولا مين اللي حطها في الكوباية انا متأكدة
اني حطيتها بعيد عنها، المهم قربت منها بخوف ورفعت الكوباية فوق شوية
كدا وأنا براقب الورقة بشكلها الغريب وهيا بتتحلل جواها وفجأة وأنا
ماسكاها لقيت جسمي اتكلبش وبقي ثابت على وضعية ومعرفتش أحرك أي
إيدي وبالأخص إيدي .. عضو فيه لكن عضو واحد بس اللي كان بيتحرك
اللي ماسكه بيها الكوبايه كانت بتتحرك لكن مش بإرادتي، قربت ناحية بقي
غصب عني وأنا بحاول أقفل بقي أو ابعد الكوبايه عنه لكن معرفتش، وفي
اللحظة اللي دابت فيها الورقة كلها في المياه كنت بشرب منها، ومعرفتش

اتحكم في أي جزء من جسمي غير لما شربت الكوبايه كلها وبعدها وقعت
من إيدي اتكسرت، طعم المياه مكلنش وحش كان طعم القرنفل برضه بس
مر شويه، جسمي مسخنش أو وقعت على ركبي ورفعت وشي لفوق وانا
بتألم والعروق بتظهر في رقبتي زي ما بشوف في الأفلام، ولا أي حاجه
من دي حصلت لكن اللي حصل بعدها كان أغرب من أي فيلم شوفته قبل
. كدا

بعد الكوباية اللي شربتها غصب عني محصلش معايا أي حاجه ثانيه زي ما
تكون الورقة اللي دابت في الكوباية كانت هي الدواء لكل اللي مريت بيه
والأيام بقت تعدي عادي جدا لدرجة اني قربت أنسى كل اللي حصلت معايا
وفي يوم كنت بتفرج علي التليفزيون في الصبح كنت فاضية ومش معايا
حاجه اعملها، الغدا جاهز من امبارح مغيث بس غير شوية رز هعملهم قبل
ما يبجي خالد بنص ساعة عشان بيحب الأكل سخن والمواعين نضيفة
والشقة مترتبة وكل حاجه تمام كنت بتفرج علي برنامج ألعاب العقل على
ناشيونال جيوغرافيك ومتابعاه باهتمام لدرجة إنني مرضتتش أروح الحمام
غير لما يبجي إعلان وبالفعل مع أول إعلان جي رحت الحمام بس لما

رجعت لقيت التليفزيون مقفول ونور أوضة النوم مفتوح، بدأ الخوف يتسللي
ويزود ضربات قلبي وأنا بتسحب بهدوء عشان اشوف إيه اللي شغل النور؟

دخلت الأوضة بهدوء واتفاجئت لما شفت خالد قاعد على السرير وباصص
في الناحية اللي هدخل منها يعني قبل ما اشوفه كانت عينيه جات في عيني،
في لحظة اطمنت واللحظة اللي بعدها اتفزعت ورجعت أجري عشان أخرج
من الشقة لإنني حسيت إن دا ممكن يكونش خالد لأنه مش وقت رجوعه
وممكن يحصل معايا زي ما بيحصل كل مره واناكدت من كدا لما لقيت
رجلي ثقيلة مش قادره احركها غير حركة ضعيفة جدا زي ما تكون نسبة
جاذبية الأرض زادت أضعاف أضعافها وعلى ما بقيت في نص الصلاة
لقيت خالد أو اللي متشبهه بخالد قاعد قدام التليفزيون على الكرسي اللي كنت
قاعده عليه وقالى وبعدين معاكى متتعبنيش اكتر من كدا، انا بطالعك في
صورة جوزك عشان تطمينيلى متخلينيش اضطر اطالعك بصورتى الحقيقية
. لانك مش هتستحملي تشوف فيها وانا ميرضنيش إنك تتاذي

بعد كلمته الأخيرة لقيت نفسي مش حاسه بحاجه وغبت عن الوعي، ولما
فوقت لقيت نفسي قاعده على كرسي وقدامي خالد قصدي المتشكل في

صورة خالد وقال واضح إن الورقة اللي شربتها لك معملتش مفعولها
بالكامل لكن عادي أنا اللي اتسرعت والمفروض كنت أصبر كام يوم كمان
عشان أعرف اكلمك وتكلميني من غير متحصلك حاجه واشيل خوفك مني
.لإني محتاجك ، محتاجك بجد

معرفتش ارد عليه اقول إيه لكن بالكام جملة اللي قاله ملي جاوبلي على
أسئلة كتير شغلت بالي لكن مبقاش فاضل غير سؤال واحد بس ويعتبر
" عايز مني ايه ؟ "الأهم

تقريبا قرأ= السؤال في عنيا وقال بعد ما اتتنح، بصراحة هو الموضوع
مخرج شويه بالنسبالي.. احم احم من الآخر كدا انا بحب جنية بتحب جني
بيحب جنية بتحبي، فكري كدا بهدوء وساعديني وانا اوعدك إني هنفذك
أي طلب تطليه مهما كان، اه صحيح اختياري ليكي كان بالصدفة أنا لا
. ساكن معاكوا ولا ليا علاقة بأي حد قريب منك او بعيد عشان تطمني بس

**

كمان من الحاجات الغريبة اللي قالهالي قبل ما يختفي إنه مش هيطهرلي
تاني الكام يوم دول لحد ما مفعول الكوبايه اللي شربتها يشتغل عندي ويبقى
فعّال واشوفه عادي من غير ما يحصلي زي ما حصل دلوقتي وقالي كمان
إنه هيزورني في الحلم بس واداني مهلة افكر فيها وألاقيه حل لمشكلته دي
أو انسب حل في الحلول اللي هتيجي في بالي، اختفى وساب تساؤلات
كثيره وراه وإجابات لأسئلة كنت بسألها لنفسي عنهم لما تيجي سيرتهم او
اشوف فيلم رعب مثلا، هل هما بيحبوا ويتحبوا ويتهادوا زينا كدا ولا
مخلوقات شريرة مفيش مكان للحب في قلوبهم؟

وهل فيه مراسم للزواج والجني يتجوز جنية واحده بس ولا مش لازم
يكون فيه زواج وبيتناكحوا بس عشان يحافظوا على سلالتهم مش أكثر؟

وغيرها من الاسئلة اللي هحاول أعرفلها أجوبة منه بس اما اشوف حل
. لمشكلته هو الأول

في اليوم دا وتاني يوم بالي كان مشغول بالمشكلة دي وكويس انه مزارنيش
في المنام لأن مكانش عندي إجابة وشكلي كان هيبقى وحش قدامه وقدام

نفسى بعد ما اخيب ظنه فيا وانه اختارني دونا عن الستات كلها عشان
اساعده لكن قبل اليوم الثاني ميخلص عرفت حل مناسب جدا للمشكلة بتاعته
بس دا على حسب طبيعة الجنية عندهم وهل طبيعتها تشبه طباع بنات
الإنس ولا لا؟

كنت مستنياه في الحلم عشان اقله على الحل لكن مجاش غير في اليوم
الخامس، واضح انه حب يديني راحتى زيادة عن اللزوم عشان لأقيله حل
مناسب لكن مكنتش عارفه لما جالي كان في الحلم ولا في الحقيقة وهو
بيستغفاني، كنت بتفرح على التليفزيون وفجأة حسيت ان جفوني تملوا والنوم
هجم عليا بأسلحته مش عارفة منين وفجأة شفته قدامي في هيئة خالد،
صحيح نسيت اقولكوا إنه اتفق معايا لما يظهرلي في هيئة خالد هيك
شعره أبيض عشان اعرف افرق بينهم بسهولة، المهم لقيتيه واقف قدامي
والحزن والتعاسة باينين على ملامحه وكل شويه يبص حواليه في كل
الاتجاهات مش عارفة ليه بس مسألتنوش لأن هو اللي بدأ بالسؤال وقالي ها
لقيتي حل؟

قلّتلّه أه بس قولّي الأول هل الجنّيات عندكوا بيحسوا بالغيرة والضعف في
أوقات معينة مثلا وبيبان عليهم زينا وكدا ولا لا قالّي بسرعة اه اه هما
يشبهوكوا في كل حاجة ما عدا حاجات بسيطة لا تذكر بس ليه يعني السؤال
دا؟

قلّتلّه خلاص سهلة اهي مش انت قلّتلّي بتحّب واحد بتحّب واحد بيحب
واحد بتحبك، خلاص أنت اول حاجة تعملها انك تروح تتفق مع الجنّي دا
على لعبة صغيرة كدا تعملها سوا بحيث إن كل واحد منكوا يقرب من اللّي
. بيحبها ويبعد عن اللّي بتحبه ويضرب عصفورتين بحجر قصدي جنيتين

ملامحه اتغيرت وظهر الإهتمام والتركيز عليها أكثر من الاول وقعد قدامي
بعد ما كان واقف وقالّي ازاى؟

قلّتلّه بص انتوا الاتنين تتفقوا إن كل واحد فيكوا يقابل الجنية اللّي بتحبه في
نفس الوقت يعني الوقت اللّي انت هتقابل فيه الجنية اللّي بتحبك يكون هو

بيقابل فيه الجنية اللي بتحبتها فاهمني؟ هز راسه بالإيجاب وانا كملت، كل واحد فيكوا يقول انه مقدر حبها ليه بس هو معجب بواحد تانيه وإني مش هقدر اسعدك مع كام كلمة حلوين في حق اللي بيحبها على كام صفة كذا وفي الآخر يقولها انا بتمنالكَ كل خير وانك تقابلي اللي يحبك مش اللي انتي بتحبيه ويسيبها من غير وداع حتى عشان يكرهوكوا، طبعاً الاتنين هينهاروا بعد الكلام دا وهيكونوا في حالة ضعف وبسرعة كل واحد فيكوا يروح للي بيحبها وكأنه كان معدي في المكان بالصدفة وكل واحد وشطارته بقى يخفف عنها ويحاول يسألها مالك ومش عارف ايه وهما في حالتهم دي هيعترفوا ويقولولكوا حصل كذا كذا، الواحده مننا في حالة الضعف بتتمنى حد يعطف عليها ويوقف جمبها ولما حد يسد الثغرتين دول عندها بيكون سهل عليها تنسى اللي قبله اما بقى لو كان يلعب بيها فمع أول خناقه هتفتكر اللي قبله على طول وانتوا حاولوا دا ميحصلش لحد ما تعملوا معاهم ذكريات جميلة تنسيهم الماضي بتاعهم كله ، السعادة طهرت عليه وكان هيطير من الفرح واختفى بسرعة من غير ما يقولي شكرا لكن قالي حاجه . راجعك تاني ... تانيه

فجأة بعد ما خلصت كلامي معاه لقيته اختفى من قدامي وكان باين عليه جدا
 إن الفكرة عجبته مع إنها عادية متستاهلش كمية الذهول اللي شوفتها في
 عينيه ولو كنت عصرت دماغي أكثر كنت هطلعله بفكره أحلى، جايز تكون
 خبرتهم قليلة في الحاجات دي وجايز يكون من فرط حبه ليها ما صدق لقي
 فكرة أو وسيلة تجمعهم بيها .

يدوب بس قمت لميت الغسيل وحطيته على السرير وقعدت أطبق فيه رفعت
 عيني بالصدفة لقيته واقف قدامي، صرخت صرخة صغيرة لإني قطعنها
 لما عرفت إنه هو ضايقتني الحركة وقتلته وانا متعصبة انت إيه ... حرام
 عليك مش كل مرة تطلعلي فيها تحصلي حاجه، مجاوبش عليا وفضل
 باصصلي وهو مبسوط جدا والسعادة مرسومة على ملامحه وقال لي اطلبي

اتمني شبكي لبيكي، بصراحة تأثير الخضة راح وسألته بسرعة الفكرة
نجحت؟

هز راسه وقالني نفعت فوق ما تتصوري، كنت هسأله ازاي واخليه يحكي
اللي حصل وكدا لكن افكرت إنه جي بسرعه وأنا لسه مخلصتش ترتيب
الهدوم حتى، قلنله استنى انت ازاي خلصت .. يعني معقول اتفقنوا واتقابلنوا
! وبدلنوا وكل حاجه في أقل من ساعة

فتح بقه ولسه هيتكلم لكن واضح إنه حس إن مينفعش يقولي واتراجع عن
اللي كان هيقوله وقال مش مهم تعرفي، المهم دلوقتي أنا وعدتك اني هنفذك
أي طلب تطليبه لكن قررت انه ميكونش طلب واحد بس وخليتهم طلبين ..
ها تحبي أنفذك واحد فيهم دلوقتي ولا لسه مفكرتيش؟

سرحت شويه وانا بحلم بكل حاجه كان نخسي فيها أو نفسي أعملها
ومعملتهاش لكن واضح إنني اخدت فترة أكثر من اللازم في السرحان
فسمعتة بيقولي طيب تحبي أجيب كرسي واقعد استنى معالي فخامة جناب
سموك لحد ما تخلصي تفكير؟

كتمت ضحكة كانت هتفلت مني وقتلته بص انا سمعت زمان حكاية كذا ان فيه خمسة اخوات بعد ما ابوهم مات اتجمعوا في بيت العيلة عشان يقسموا الورث واللي كان كام فدان كذا على عمارة في المحافظة وشوية رصيد في البنك لكنهم اختلفوا وقتلوا بعض مفيش غير واحد منهم بس اللي مماتش وشال الليلة كلها وهو حاليا في السجن، ناس تقول انه اتجنن قبل ما يتسجن وناس تقول إن السجن هو اللي جننه وناس غيرهم بتقول إنه بيمثل موضوع الجنون دا عشان يسبب السجن ويحولوه لمستشفى الأمراض العقلية، سيبك من دا كله البيت اللي اتقتلوا فيه كان ساكنه واحد من اللي اتقتلوا مع مراته واولاده والباقيين واخدين بيوت وشقق في أماكن تانية وبعد الحادثة البيت اتقفل وفضل مهجور لحد دلوقتي لان محدش من أهل البلد فكر يشتري البيت عشان المشاكل اللي عليه من ناحية ومن ناحية أكبر عشان موضوع . العفاريث وكذا، أنا بقي نفسي من وانا صغيرة أدخل البيت دا

بمجرد ما خلصت كلامي قالي طيب متقولي من الصبح انك عايزة تدخلي بيت كذا كذا وقوليلي على المنطقة الموجود فيها البيت وانا هوديكي، قولتله

مش بحكيك قصته عشان تعرف أنا عايزة اروح هناك ليه وعشان كمان
! تاخذ بالك من العواقب اللي ممكن تقابلنا، قالي بإستغراب عواقب

سكت وسرح بعدها لمدة دقيقة أو دقيقتين وفي الآخر قالي أوصيلي كدا
مكان البيت دا وانا هشوف هل ينفع تروحي ولا لا، أنا بالنسبالي مفيش
مشاكل اروح عادي لان دا وعد ولازم انفذه بس أنا حابب أضمن سلامتك
. عشان بقت تهمني بعد اللي عملتيه معايا

وصفنته المكان بالطبط بالشجر اللي حواليه واليافطات والإعلانات اللي
محطوة في المنطقة ولما خلصت قالي جايلك تاني وهاجي في نفس
. المكان اللي انا واقف فيه دا بالطبط عشان متخضيش زي كل مرة

غاب عني وقت مش كتير ولقيته جي في نفس المكان اللي اختفى منه وقالي
ها عايزه تروحي امتي؟

بصراحة أنا خفت بعد ما كان نفسي اروح ولقيت نفسي بقوله يعني
هتحميني من العفاريث اللي هناك؟ ضحك شويه وقال واضح انك على
الفطرة ولسه متعرفيش حاجه، المهم جاهزة تروحي امتي؟

حسيت بنبرة سخرية في كلامه لما شافني خوفت وممكن اتراجع فقولتله
انهاردا الساعة 2 أو 2 ونص يكون خالد نام ونروح لكن مش هنتأخر كثير
هناك هيا نص ساعة بالكثير، ربع ساعه رايح جاي وربع ساعه في البيت
هناك، قالي طب الحمد لله انك حسبتني وقت الروح والجني لأنني بصراحة
اتوقعتك هتقوليلي انقلني هناك في لمح البصر زي شغل ألف ليلة وليلة
والخرافات اللي بتسمعوها واللي بتعتبر وسيلة دعاية للدجالين والمشعوذين
. بتوعكوا

عشيت خالد ورحنا نمنا وطبعاً اتظاهرت بالنوم وأنا براقب الوقت اللي مش
عايز يتحرك وأنا بفكر في الدقيقة 70 مرة اني اتراجع وملوش لازمه اللي
ناويه عليه لكن كنت في كل مره اقول لنفسي دي فرصة ومش هتتعوض
تاني، أول ما الساعة جات 2 الا 6 دقائق زهقت من كتر الانتظار وقمت
فتحت الدولااب وأخذت لبس خروج كنت مجهزاه وحاطاه على جنب عشان

مفضلش أدور وخالد نايم لان نومه خفيف الى حد ما وعايظه الموضوع يمر
بسلام لإن الخروج في الوقت دا من غير سبب ممكن يكون فيه طلاقى

اخذت الهدوم ورحت الحمام غيرت واتمشيت في الصاله بهدوء عشان
مخبطش في حاجه لإننا بنطفي النور بتاعها بالليل ورحت عشان أفتح لمبة
ضوءها خفيف أقدر أشوف بيه رفيقي في رحلة النهارده، قبل ما المس
الزرار سمعته بيقولي ملوش لازمه تفتحي النور انا هنا من بدري، جسمي
قشعر بمجرد ما سمعت الصوت خلاني قولت بسرعة وأنا بدوس على
سناني من فرط الغيظ أنا مش عايظه منك طلبات تانية ولا عايظه اشوف
وشك تاني، قالي بلا مبالاة زي ما تحبي يلا بينا واختفى، قولت بصوت
واطي انت رحت فين؟ سمعته بيقول انا معاكي اهو بس مش هينفع أخرج
معاكي في صورة جوزك لأسباب مش مهم تعرفيها ومتقلقيش مفيش حاجه
. هتحصلك طول منا معاكي

طول السكة وانا خايفة وعماله ابص حواليا زي الحرامية، مفيش حاجه
قابلتني في الشارع غير القطط والكلاب ومن كل خمس أو ست قطط كنت

ألاقي واحده منهم باصه عليا بتركيز بنظرة تخوف زي ما تكون عارفاني
. رايحه فين وهعمل ايه، بصة إنسان لإنسان مش حيوان لإنسان

وقفت قدام باب البيت بعد ما وصلت وقلت بصوت واطي هتدخلني تزاى؟
قالى تعالى من ورا البيت فيه حته في السور مش عاليه وھتعرفي تدخلني
منھا، وبالفعل لقيت من ورا البيت ولقيت حيطه صغيرة من السور في
طولي تقريبا وتحتها شوية قوالب طوب، لميتهم وحطيتهم فوق بعض
واتعليت عليهم وطلعت على الحيطه، قبل كل حاجه طلعت الموبايل بتاعي
وشغلت الكشاف عشان اشوف هنزل على ايه لحد ما لقيت كنبه خشب
شكلها قديم جدا مغطيها التراب بس بعيدة عني شوية، رحت ازحف متر
. تقريبا او اكثر بشويه لحد ما بقيت فوقها بالظبط ونزلت

البيت طبعا كله ضلمة في ضلمة وجهت تليفوني اللي كان لسه كشافه شغال
ووجهته قدامي وقبل ما اتحرك قلت بصوت واطي امشي عادي؟

قالي متخافيش انا معاكي في كل خطوة وفعلا اتمشيت وانا ببص حواليا على العنكبوت اللي سيطر على البيت لحد ما لقيت سلم، طلعت وأنا متوقعة في أي وقت اني أسمع فجأة صوت قطتين بيتخانقوا بصوت عالي أو حاجة توقع قدامي أو صرخة مثلا لكن الحمد لله مفيش ولا حاجة من دول حصلت، طبعا اطمنت أكثر ونسيت الخوف شوية، ريحة العطن في كل حته ويمكن دي الحاجة الوحيدة اللي خلتنى أسرع في المشي عشان أخرج من البيت دا بسرعه، طبعا لقيت البيت كله من بره بس كنت بخاف أدخل أي أوضه والأوضة الوحيدة اللي فكرت أدخلها كانت مقفولة بالمفتاح وخرجت من البيت بعد ما أشبعت فضولي منه .

وانا راجعه في الطريق سألت بصوت مسموع هو ليه مطلعيش عفاريت الإخوات اللي قتلوا بعض وحاولوا يخوفوني أو يلبسوني وانا في بيتهم، ضحك بسخرية وقالي لو اللي بيموت مقتول بيطلع مكانه عفريت يدور على اللي قتله زي ما فاكرين كان زمان عفاريت فلسطين حررتها قبل حتى البني ادمين ما تفكر، سيبك انتي من شغل الخرافات دا وسرعي خطوتك عشان جوزك تقريبا هيصحى دلوقتي .

أول ما سمعت جملته الأخيرة بقيت أجري في الشارع زي اللي مقتولها قتيل
وصلت البيت وطلعت السلم في نفس واحد ولما جيت افتح الباب بإيدي اللي
بتتر عرش المفتاح وقع وطيت جبته بسرعة وحاولت افتح ومكنتش عارفه
لحد ما فتحت الباب بأعجوبة وبمجرد ما فتحتة لقيت جوزي واقف قدامي
... لحظة صمت حسيت فيها بأحاسيس غريبة جدا صعب أوصفها حتى الدم
بتاعي كنت حاسه إنه بيحاول يهرب من أماكن في جسمي ويروح أماكن
تانيه من كثر الخوف والتوتر وغيرهم، نزلت راسي في انكسار لأول مره
أحس بيه قبل كذا وأنا شايفه جوزي بإحساس بيصلي من فوق لتحت وأكد
أكد بيسأل نفسه هيا كانت فين في الوقت دا واللي طبعاً ملهاش غير إجابة
واحدة أكيد كلكوا عارفينها، الكام ثانية اللي قبل ما يتكلم عدوا كأنهم كام يوم
مش كام ساعة لحد ما سمعته أخيراً بيقولي على فكرة جوزك نايم جوه أنا
. بس حبيت أخضك الخضة الأخيرة

انتهت

"الحكاية الرابعة عشرة"

"اللي يخاف من بيته، يخاف من قبره"

جملة كان دايم بابا يقولها لما بتحصل معانا حاجة في البيت، وبيتنا دا ليه قصة كبيرة جدا هحكيهالكوا من البداية، من أيام جدودي الله يرحمهم

بيتنا مشهور بصفة الكرم والحمد لله ودا مش بشهادتي ولا بشهادة قرايبنا أو جيراننا دا بشهادة المركز كله ومش هجامل لو قلت بشهادة المحافظة كمان ودا لأن بيتنا عمره ما انتقل في وش حد سواء كان إنسان أو حيوان أو حتى جان، أه جان زي ما قريتوا بالطبط

جدي الأكبر اللي هحكيهاكوا عنه وعن تسلسل أحفاده، كان وحيد لا أخ ولا أخت وأبوه كان صاحب تجارة ضخمة جداً وصيته وشهرته معروفين من

بلاد المغرب حتى صعيد مصر، نسيت أقولكوا إني من الصعيد وطباع
الكرم مش جديدة علينا.

جدي دا يقال كانت عنده كتب خاصة بالسحر ورثها عن أجداده وطبعاً دي
من عادات الكتب اللي من نفس النوعية دي واللي بتكون معظم الأحيان
بالوراثة ونادراً لما تكون عن طريق البيع والشراء أو إن حد مثلاً يلاقها أو
تظهر له فجأة، المهم من وسط الكتب دي فيه كتاب فخم جداً وقديم جداً ومن
قواعد وقوانين العائلة إن الكتاب دا ممنوع استخدامة إلا في الخير بس وإلا
هتحصل مشاكل لأهل البيت وعقبات لا يحمد عقباها.

للسرية مكانش أي حد يعرف مكان الكتب دي والكتاب دا بالذات إلا شخص
واحد " الوريث " ويكون أبوه واثق فيه وفي أخلاقه ويعرفه مكان الكتب لما
يחס باقتراب الأجل وهكذا تم تداول معرفة مكان الكتب من جيل لجيل في
سلسلة وأمان.

وزي مقولتلكوا أننا معروفين بالسمعة الحسنة والكرم ومعظم أفراد العائلة حافظين كتاب الله، البيت مفتوح دائماً وفي الواجهة بتاعته فيه قطعة أرض صغيرة نسبياً محاطة بسور متوسط الطول وليها بوابة مفتوحة دائماً خاصة بيها، مرصوص فيها مجموعة كتب مصنوعة من الخشب فقط وعليها مفارش ووسائد والواحدة منهم لتتسع لثلاث أشخاص أو أربعة.

المهم أي حد سواء قريب أو غريب، من البلد أو عابر سبيل، كبير أو صغير بمجرد دخوله من البوابة بيتقدم له واجب الضيافة من أكل وشرب وغيرهم من أيام جدي الأكبر اللي كان تاجر لحد وقتنا هذا

جدي الأكبر اتوفى وساب من بعده ثلاث أولاد، الأول كان كويس جدا ودايماً راضي ربه ووالديه ومتبع نهج والده في كل شئ. الثاني للأسف اتوفى وساب أولاده لسه أطفال. الثالث كان عادي جدا معندهوش مميزات أو مساوئ تستاهل إني أذكرها

وبعد وفاة جدي وفي توزيع ميراثه "جدي أنا اللي أنا من نسله" قال لأخواته قسموا زي ما تحبوا بس المهم البيت يكون من نصيبي وخدوا قصاده اللي

يساويه وأكثر من أراضي أو فلوس واللي هيتبقى أنا راضي بيه بس أهم
حاجه البيت يكون من نصيبي

اللاتنين استغريوا من كلامه وسبب اهتمامه بالبيت بالذات مع إن موقعه في
شارع مش عمومي والخدمات تعتبر بعيدة عنه والأراضي الثانيه في مواقع
كويسة جدا وأسعارها تكاد تكون ضعف أسعار المنطقة اللي فيها البيت ولما
سألوه عن السبب قالهم عشان البيت دا فيه الكنز

اتريقوا عليه وسخروا منه ومحدث فيهم صدقه وخصوصاً إن الكلام دا أول
مرة يسمعه ولو كان حقيقي فعلاً كانوا عرفوا من زمان من قبل وفاة أبوهم
وبالفعل حققوله رغبته والبيت بقى من نصيبه

المصائب اللي بدأت تهل على بيتنا كانت بسبب واحد، وهو إن جدي أبو
أبويا مباشرة واللي كان الوريث للكتب اللي حكيتركوا عنها في البداية قرر

استخدام الكتب دي والقراءة فيها، وللأسف كمان مش هقدر أحكيلكوا على اللي حصل بالتفصيل لأن حكايتنا معروفة في محافظتنا والموضوع اتقفل من كام سنة وقررنا محدش يفتحه تاني بس أنا حاسة بحمل وحابة أحكي لعل وعسى جزء من الحمل دا ينزل من على كتافي وخصوصاً اللي حصل معانا أنا وأخواتي البنات، والعجب العجائب اللي حصل مع أخونا الولد الوحيد وسطنا.

بعد ما جدي قرأ في الكتب دي وكان عنده حوالي ١٨ سنة أو ١٩ على حد علمي، معرفش يسيطر على مجريات الأمور وبالفعل ظهرتله حاجات ومعرفش يتعامل معاها والكتب اختفت إلى وقتنا هذا لكن الضرر محصلش للبيت نفسه زي ما كل واحد فيكوا اتخيل مثلاً ظهور جن وغاريت ومحاولاتهم لتفيشنا من البيت بالعكس، أينعم ظهرت قطط مختلفة لكن شكلهم كان لطيف وجميل جداً ومكانش جوانا ناحيتهم ذرة خوف لدرجة إن أخواتي اتعلقوا بقط معين منهم وكانوا بيقعدوه وسطهم ويلعبوا معاه.

أختى عملت محاولة كذا تشوف بيها رد فعل القط دا فقررت تنرفزه عشان تشوف رد فعله قامت شداة من ديله بقوة لكن مظهرش عليه أي تغير وكأن الموضوع عادي بالنسبale

الغريب بقى إنني أنا وأخواتي البنات وعددنا كبير ما شاء الله ولا واحدة مننا اتجوزت أو اشتغلت حتى على الرغم من إننا الحمد لله على قدر من الجمال وكمان كلنا مؤهلات عليا، في البداية قلنا عادي وحصلت وبتحصل مع عائلات زينا كتير لكن اللي مش عادي لما كل جوازة تبوظ لأسباب تافهة جداً ويمكن أتفه من الأسباب اللي اتخيلتوها في دماغكوا وأنتوا بتقروا كلامي حالياً لكن اللي أكدنا شكوكنا وقلقنا هو الموقف اللي حصل مع أخونا واللي هحكيهولكوا دلوقتي

أخونا بعد ما خالص ثانوية عامة وزيه زي أي طالب قرر يدخل خاص بسبب قلقه من التعليم الحكومي وتجبر المعيدين والدكاترة بتاعته زي ما غالباً بيحصل ولأسباب تافهة برضو كان بيترفض من أي جامعة خاص يقدم عليها، الموضوع دا بدأ يآثر على جدي بالسلب لإحساسه بالذنب وأنه

السبب في كل اللي بيحصل وهيحصل معانا لحد ما في يوم جامعة خاصة قبلت أوراق أخويا وكلنا فرحنا وقتها وكنا مقررين قبلها محدش يقول لجدي على الجامعة دي ونشوف النتايج هتكون إيه لعل وعسى الموضوع يتم وبالفعل الموضوع تم وفي اليوم الموعود نزلت أنا معاه ومعاي الفلوس عشان أدفعهاله ونخلص الإجراءات لكن لما وصلنا قالولنا الفلوس بيقبلوها بالدولار فقط، قلت مش مشكلة خرجت أنا وأخويا واتجهنا لأقرب صرافة وغيرنا الفلوس ولما رجعنا الجامعة من ثاني بعد أقل من ساعة تقريباً لقينا الملف بتاعه اترفض لأن العدد اكتمل، جاوز السبب إني حبيت أفرح أخواتي وقتلهم ان أخويا اتقبل وهنروح نغير الفلوس لدولار وواحدة فيهم من فرحتها قالت لجدي والموضوع مكملش، أنا طبعاً انهزت ودخلت في موجة بكاء هستيري قبل رجوعنا للبيت وكان يوم سيء جداً بالنسبة للعيلة كلها وقلنا وقتها قدر الله وما شاء فعل

بمرور الوقت اتوفى جدي، والدي وأعمامي قرروا يدور على حل لمشكلتنا وكل واحد فيهم عمل مكالماته واتصالاته جات شيوخ كثير من مصر وخارج مصر، شيوخ جات من أفغانستان والغرب وبلاد إفريقية وكل شيخ ييجي وبمجرد دخوله كان يقول البيت دا مريح جداً وجميل جداً جداً، ومكانوش لوحدهم يقولوا كدا، أي ضيف عادي كان بيقول نفس الكلام،

وللأسف ولا واحد فيهم قدر يلاقي حل للي بيحصل وجربوا كل الحيل والطرق بدون فائدة وكانوا مستغربين إن البيت مفيهوش أي سبب لوقف حالنا لكن كلهم أجمعوا بوجود خير في بيتنا ومعظمهم حددوا نفس المكان اللي مدفون تحته الخير دا لكن والدي كان يقولهم دايماً الحمد لله الظروف متيسره ومش عاوز أحفر واللي كان شاغله موضوعنا أنا وأخواتي البنات وبس لحد ما فجأة ظهرت في حياتنا ست عجوزة من اللي بيقرؤوا الكف ويشوفوا الطالع والأغرب انها ظهرت لأكثر من واحدة فينا في نفس الوقت على الرغم من اختلاف المكان.

واحد من الشيوخ اللي زاروا بيتنا قالنا احتمال كبير الحارس الخاص بالخير المدفون عندكوا هيظهر في البيت في أيام معينة وأوقات محددة وتقدرؤوا في الأوقات دي تحفروا براحتكوا وتطلعوا كل حاجة بدون مساعدة حد لأن المكان تحت هيكون أمان لكن قبل ما تعملوا حاجة لازم تحفظوا المواعيد دي وخاصة من بداية ظهور لغاية اختفاؤه وتحفروا براحتكوا بعدها، لكن والدي قاله مش مهتم بكنز أو غيره بقدر اهتمامه بيا وبأخواتي وقبل الشيخ ما يمشي قالنا عمار المكان زادوا عندكوا لكن كلهم أهل خير وواجب

عليكوا من كرم الضيافة تزودوا الأكل اللي بتطبخوه وهايخدوا نصيبهم بكل هدوء وسلام دا لو حابين تكرمهم يعني والبيت يفضل مشهور بالصيت الحسن سواء عند الإنس أو الجن.

كلام الشيخ كان حقيقي فعلاً ولاحظنا حاجات كتير بعدها، مثلاً الأكل اللي بنحفظه في المطبخ كان جزء كبير منه بيختفي بشكل ملحوظ تماماً ومن وقتها بدأنا نطبخ أكل أكثر من احتياجنا عشان الكل ياكل والبيت يفضل على حاله والحمد لله دا اللي بيحصل إلى وقتنا هذا وعاشين في سلام وبدون أي مشاكل والمعاناة الوحيدة بالنسبالنا هي بسبب وقف الحال سواء كان جواز أو شغل.

بعد فترة الجزء الثاني من كلام الشيخ دا اتحقق وبدأنا نشوف ديك أصفر ذهبي في البيت يظهر في أيام معينة كل كام شهر ويختفي تاني ومع تكرار ظهوره على مدار سنة ونص أو أكثر شوية عرفنا المواعيد اللي بيظهر ويختفي فيها لكن محدش فينا فكر يحفر أو يدور ما عدا عمي واللي كان بيلج على والدي من فترة للتانية لكن والدي في كل مرة كان بيرفض مخافة تصعيد الأحداث ويقول الحمد لله على اللي وصلنا له لحد هنا.

نسبت أقولكوا إن الشيخ قال بخصوص موضوع الشئ اللي هيطهر اللي عرفنا بعدها أنه الديك، هياخد فترة معينة سنتين ثلاثة عشرة ممكن أكثر أو أقل وطالما بيظهر يبقى الخير لسه موجود ومحفوظ وأي حد فينا ممكن يحفر وينزل يجيبه عادي لكن لو الديك اختفي بالتالي الخير هيختفي معاه واستحاله حد هيعرف يطلعه دا لو لقيناه من الأساس مهما جبنا شيوخ ماهرين كلهم هيفشلوا ودا اللي كان عامل قلق لعمي وبيخليه يفتح الموضوع مع والدي من فترة للتانية ووالدي زي ما قولتلوكوا كان بيرفض وبإصرار

فيه حكاية كدا من ضمن الحكايات اللي حصلت هحكيلوكوا عنها بس عايزاكوا تعرفوا إني مقولتش كل حاجة عشان السرية ومش عايزه موضوعنا يتعرف ويتفتح من جديد بعد ما صدقنا قفلناه وارتحنا، بالصدفة كدا من كام شهر لقينا ورق مكتوب عليه حروف وأشكال شبيهة بالطلاسم، هو مكاش ورق احنا ظنينا إنه جلد حيوان لأنه كان سميكة وغريب ووقتها البيت عاش في رعب منتظرين الأحداث الجديدة اللي ممكن تحصل، أختي قالت أن عندها صديقة تعرف شيخ كويس جداً وبيعالج بالقرآن وناس كتير بتشكر فيه وأنه بيسعى في الخير دائماً ولما عرضت الموضوع على والدي

وافق على طول بدون تفكير وراح معاها، أنا بصراحة رفضت أروح
معاهم لأنني بخاف من الشيخ والأماكن بتاعتهم.

لما رجعوا من هناك أختي حكّت لي وقالت المكان كان زحمة جداً زي
سوق الخضار كدا ويمكن أكثر وناس كتير وبالдор وفجأة بمجرد وصولهم
جمب الباب اتفتح وخرج منه الشيخ كأنه منتظر وصولهم وشاور على أختي
وقالها تعالي، دخلوا عنده وقعدت جمبه، حط إيده على جبهتها وبعد مرور
ثواني قالتلي جسمي كله كان بيتنفض ولمحت في الأوضة طيف أبيض
بيجري في كل الاتجاهات زي المجنون ولما رعشتي زادت وبدأت أهمهم
راح ضغط بصوابه بقوة على جبهتي وبعدها هدأت حركتي ورجعت
لطبيعتي، الشيخ شال إيده وبعد دقيقة صمت قال إن أحنا البنات معمول لينا
سحر بيتجدد تلقائيا كل ٤ سنين وحالنا هيفضل واقف وخصوصا الثلاثه
الكبار واللي أنا واحده منهم، قالوله لقينا ورق أو جلد حيوان مكتوب عليه
طلاس ممكن يكون هو دا السحر، قالهم لا مش هو دا السحر، السحر
هيفخرج لوحده بعد فترة بدون تدخل حد والورق اللي لقيتوه دا تحويطة
للبيت بدم الغزال لحفظه من أي شر، قالهم كمان أن بيتنا في حاجات مدفونة
ولسه برضو مجاش وقتها وأمر والدي أنه يدفن الورق دا في مكان معين
في البيت وقبل ما يمشوا من عنده قالهم الله يعينكم على اللي أنتوا فيه وفيه

ناس حاولت تسحب الضيوف اللي ظهوروا عندكوا جديد لكن الضيوف دي رفضت لسببين، الأول قوتهم والثاني عشان بيحبوكوا ولو كان جواهم ذرة كره ليكوا مكانش حد فيكوا فضل عايش لحد دلوقتي

أما بقى بخصوص الست العجوزة اللي ظهرت لأخواتي الأثنين في نفس الوقت وقالتلهم نفس الكلام، هكي الموقف اللي حصل مع واحدة فيهم وهو بالظبط اللي حصل مع الثانيه، أختي كانت خارجه من الكلية لقت واحدة واقفة على ناصية الشارع وبتنادي عليها من بعيد وتشاور لها، أختي خافت لكن نفسها شجعتها واتجرات وقربت منها، الست دي قالتلها أنتوا ليه مش عايزين تطلعوا الخير اللي مدفون عندكوا؟ دا خير هيكفيكوا ويكفي أحفاد أحفادكوا وبدأت تغري أختي وتجملها الصورة والمستقبل لكن في النهاية أختي قالتلها الحمد لله أحنا مستورين ومش محتاجين حاجة زيادة ووالدنا عارف مصلحتنا واللي عايزه هو اللي هيحصل دا بعد مشيئة ربنا طبعاً وسابقتها ومشت

انتهت

"الحكاية الخامسة عشرة"

القصة اللي هتقروها دي صعب تتصدق, لكنها حقيقية جدا, أنا عشت مع جن لمدة 3 شهور, وكنت باكل من الأكل اللي بيطبخه, ويشرب شاي من اللي بيعمله, وكل حاجه كانت بينا عادي جدا, كنا ساكنين مع بعض وعمرى

ما شوفت منه حاجه وحشه أو موقف مرعب, بالعكس كان طيب جدا وحنين جدا جدا, وهكيلكوا التفاصيل.

أنا من محافظة قنا, والقصة دي حصلت معايا في بداية التسعينات, كنت طالب في الصف الثاني في كلية من كليات أسوان, وكان معايا صاحبي وصديق عمري من المرحلة الابتدائية, ساكنين أنا وهو مع بعض, بنروح ونيجي مع بعض, حتى الكلية دخلناها زي بعض, لكن هو كان شخصية مستهترة شوية ودايما يحب الهزار والتريقة على الناس والتتمر عليهم, وعلى الرغم إننا اتطردنا بسببه من كذا شقة نسكنها, لكن كان عنده لا مبالاة وبيستمر في اللي بيعمله, لحد ما في يوم كنا ساكنين في بيت يخص سيدة نوبية كبيرة في العمر وصاحبي دا اتريق عليها راحت طردتنا في نص الليل.

أنا أقسمت إنني مش هسكن معاه تاني وهبحث عن أي سكن وهو راح سكن مع مجموعة طلاب تربطه بيهم صلة قرابة لكن بعيدة, المهم اننا افترقنا.

اتوجهت لراجل كبير كنت اعرفه من نفس المحافظة بتاعتي وحكىته على اللي حصل معايا وطلبت منه لو يعرف سكن أو غرفة استأجرها لكنه قال لي معرفش, وبعد لحظات من التفكير قالي فيه بيت صغير كدا ملكي, واجهته سوبر ماركت ومن الخلف فيه غرفتين وصالة مفتوحة للسما, يعني بيت مش كامل البناء قولتله تمام جدا ومفيش مشكلة, وبالفعل رحت سكنت في البيت دا, كانت بنت الراجل دا شغالة في السوبر ماركت وفي الخلف فيه 3 حجرات واحدة صغيرة كدا بتستخدم كمطبخ وغرفتين تانيين اخترت

واحدة منهم حطيت فيها شنطتي وعجبتني شجرة كبيرة في صالة البيت حطيت تحتها سريري اللي كنت بنام عليه وطول فترة إقامتي كنت اقع تحت الشجرة دي ومبدخلش أوضتي غير عشان اغير ملابسي فقط.

تاني يوم رحى الكلية ولما رجعت لقيت شاب في التلاتينات سكن الغرفة الثانية, اسمه ممدوح وببشتغل ترزي, انا ظنيت إن صاحب السكن قال خلاص طالما أجرة غرفة يبقى يآجر الثانية معاها بالمرة.

اتعرفت على ممدوح وبقت فيه صداقة صغيرة بينا وعرفت إن معاه محل ترزي في شارع من شوارع أسوان, لكن الغريب إنى دائما لما أرجع من الكلية ألاقية في البيت, ولما أسأله مبتخرجش ليه يقولى خرجت الصبح خلصت شوية شغل ورجعت تاني, كنت لما أرجع في أي وقت بلاقيه في البيت, سواء الضهر أو بعد الضر أو العصر كان دائما موجود.

كان طيب وبشوش وملامحه سمحه ومحترم جدا, لما بيكون قاعد معايا وحد من أصحابي أو قرايبي يروح يعملنا شاي ويقول أسيبكوا براحتكوا ويقوم.

وفي يوم بنتكلم مع بعض فبحكيه عن غلاء المعيشة وكذا فاقترح عليا نجمع
فلوس مع بعض ونطبخ وناكل يعني وبكدا هنوفر فلوس احنا الاتنين
ووافقنا على طول.

كنت ارجع من الكلية العصر ألاقي الأكل جاهز, أكل جميل جدا, وغالي
يعني ميكفيهوش الفلوس اللي بنجمعها, والغريب كمان إن الأكل بيكون
أحيانا مشوي, سمك مشوي, مكرونة بشاميل واحنا معندناش فرن نعمل فيه
الحاجات دي, ولما اسأله الفلوس بتكفي كل دا ازاي يقول ياعم ربك
بيبارك, ولما اسأله بتعمل الأكل دا ازاي يقول بروح الفرن واعطي الفران
ربع جنية يحطلي الأكل وبعدين آخده, بس ممدوح مأكش معايا ولا مرة
ولما كنت أقوله تعالا كل معايا يقول لا أنا سبقتك كل انت.

كنت بتخرج منه لإنه أكبر مني وبيعمل كدا حاجه تقريبا فبقوله طب خلّي
حاجه عليا أنا أساعدك فيها يقول لا أنت بس ركز في مذاكرتك وكلينتك

وملكش دعوة بحاجه ثاني, وكان بيحبني وينصحني ويقولني شد حيلك أبوك
راجل غلبان وتعبان عليك.

فكنت بقترح عليه يطلع يغير جو ويشوف الناس فكان يقولني لا الناس وحشه
ومحبش اختلط بالناس أنا بروح اخلص شوية ملابس وارجع ثاني.

كنت لما بدخل أي غرفة أو المطبخ كنت بحس إنني مخنوق ومضايق, فكنت
دايما اقعد تحت الشجرة اللي في نص البيت وسريري تحتها, وخلال الـ3
شهور اللي سكنتهم معاه كان في قمة الهدوء والطيبة ومشوفتش منه أي
حاجه وحشه.

لحد ما في يوم زاروني بعد أصدقائي وعرضوا عليا أسكن معاهم رفضت
وقلتهم مرتاح هنا لكنهم أصرروا انقل للسكن معاهم وتقريبا خدوني غصب
عني من كتر الإلحاح. وبالفعل نقلت معاهم وبقينا نعمل أكل مع بعض وكان
دوري أنا إني أشتري الطلبات.

وفي يوم رحنا البقالة أشتري بعض الطلبات والراجل اتكلم معايا وقال
شكلك جديد هنا وكنت ساكن فين قبل كذا؟ قولتله ساكن في الشارع الفلاني,
قالي بس الشارع دا مفيهوش طلبه؟ قولتله اه منا سكنت في بيت عم فلان
وحتى كان ساكن معايا ممدوح الترزي, الراجل استغرب جدا وقال
مستحيل الكلام دا يكون حصل, البيت دا كان ساكن فيه شاب اسمه ممدوح
كان جاي من محافظة من محافظات الدلتا وحصلت فيه حريقة ومات
بسببها, ولو كان الراجل أجرلك المكان يبقى انت كنت عايش فيه لوحداك
واللي معاك دا عفريت ممدوح.

مكنتش مصدق الراجل دا, لإني سكنت بنفسي وشوفت ممدوح وعشت
معاه, وحببت أتأكد فبقيت أسأل الناس اللي في المنطقة وكلهم قالوا نفس
الكلام وكانت صدمة كبيرة بالنسبالي, بعدها خفت جدا والشارع اللي كنت
ساكن فيه في البداية بقيت أخاف امشي فيه, ولو معايا مشوار هيضطرني
امشي فيه واوصل في خمس دقائق بروح آخذ شوارع ثاني واوصل في
نص ساعة عادي.

بعد عشرين سنة تقريبا من الحادثة دي قابلت ابن صاحب السكن وسألته
عن البيت بتاعهم اللي عشت فيه مع ممدوح قالي إن البيت بقى عمارة لكن
ممدوح عامل إز عاج للناس اللي ساكنين وبيعمل مواقف تخوفهم من وقت
للتاني.

فستغربت لإن ممدوح كان هادي جدا معايا وعشت معاه 3 شهور مشوفتش
منه غير كل خير.

انتهت

"الحكاية السادسة عشرة"

مكنتش اعرف إن البيت اللي هنعيش فيه ه يكون مسكون بالجن, وكمان
بيحاول يتشغل في صورة جوزي عشان يقرب مني.

الحكاية دي حكتها لي جدتي, حصلت معاها زمان لما اتجوزت جدي.

اتجوزت وأنا عندي 15 سنة وجوزي كان أكبر مني بعشر سنين وكان
تاجر بيشتري أغنام وماعز ويروح يتاجر بيهم في البلاد اللي حوالينا, وكان
أغلب أيام الأسبوع يبات بره, يعني مثلا يقضي يومين أو تلاته معايا
يشتري أغنام وماعز وباقي الأسبوع يسافر بيهم ويبيعهم في المدن اللي
حوالينا.

بيتنا كان على أطراف القرية ومفیش بيوت كثير حوالينا, وأول أسابيع جوازي كانت طبيعية ومفیش حاجه غريبة بتحصل, لكن بمرور الوقت بدأت يتهيئلي إن فيه حد عايش معايا خصوصا لما جوزي يكون بايت بره, في مرة جوزي كان مسافر كالعادة وراجع ثاني يوم وأنا كنت بنصف الحوش اللي بيحط فيه الغنم, الحوش دا فيه غرف صغيرة جدا في حجم الحمام كدا بنخزن فيها علف وقمح وتبن وحاجات كثير, لمحت بطرف عيني راس بتبص عليا من غرفة من الغرف دي, بصيت ورايا اتأكد لكن مشوفتش حاجه, أنا الحمد لله مش بخاف من الحاجات دي.

مركزتش قوي وكملت تنضيف عادي, وثاني أسبوع كنت في نفس المكان وبنصف برضو لكن كان الوقت اتأخر شوية والشمس غابت لكن المرة دي خلال التنضيف لما تكون الغرف دي في ضهري يعني مش شايفها كنت بحس إن فيه حد يبطلع دماغه من غرفة منهم ويبص عليا ويتابعني, متسألونيش كنت احس إزاي بس أكيد انتوا جربتوا الاحساس دا قبل كدا, وفجأة حسيت نفسي متوترة وخايفة لإنني لوحدي في بيت كبير ومحدث

معايًا بس بعدين اتغلّبت على خوفي, وفجأة سمعت صوت حاجة بتقع وتتهبّد
على الأرض في نفس الغرفة اللي كنت بحس إن حد بيتابعني منها.

اتخضّيت في الأول وسميت الله لكن قومت اشوف فيه إيه وأنا جوايا شئ
من الخوف ولقيت شوال كبير وقع على الأرض بدون سبب, حاولت على
قد ما اقدر اشيله واسنده على الحيط ولما خلصت وخلال مانا طالعة من
الغرفة كنت متأكّدة إن وقتها في حد ماشي ورايا.

كانت فيه حرارة في ضهري وريحة بخور قوية لكن ريحتها مكانتش حلوة
أو وحشة, كانت فيه ريحة غريبة وخلّاص, ولما وصلت لنص الحوش وكل
حاجة حواليا مستمرة قولت وأنا باصة قدامي لا تاذينا ولا ناذيك وعلى
البركة لا ضرر ولا أذى.

وفعلا الريحه اختفت والحرارة اللي كانت في ضهري اختفت هي كمان,
لكن الموقف دا مكانش الوحيد, وأنا مكنتش بحكي حاجه لجوزي عشان
ميفلقش عليا, فكنت بطنش الحاجات دي طالما مفيهاش أذى, لحد ما في يوم
قررت أحكي لجوزي ويتصرف يلاقي حل لإن مينفعش نعيش هنا تاني.

الباب خبط في نص الليل ودي أول مرة تحصل من وقت ما اتجوزت,
قومت ووقفت ورا الباب وأنا بقول مين, وسمعت صوت جوزي من ورا
الباب وهو بيقول افتحي.

جوزي لو اتأخر في السفر بيرجع العشا بالكثير, وأحيانا بيفضل إنه يرجع
الصبح لو الوقت اتأخر, لكن طالما صوت جوزي فتحت وقلت في بالي
يمكن المرة دي حصلت حاجة جديدة أو ظرف طارئ يعني خلاه جي في
الوقت دا.

أول ما فتحت وسبحان الله مرتحتش لجوزي, قلبي اتقبض لما شفته مع إني في العادة بكون فرحانة جدا لأنه بيونسني وبيجبلي معاه حاجات بحبها, لبس أو حلويات, لكن المرة دي كنت خايفة منه ولولا الملامة كنت هقف الباب في وشه, واقف وبيبتسملني ابتسامة لزجة مشوفتهاش على وش جوزي قبل كدا.

رجعت لورا شوية عشان يدخل ولما دخل راح على طول ناحية اوضة النوم مع إنه في العادة بيقد على الكنبه شوية يطلع المحفظة بتاعته ويعد الفلوس ويقول اسخنله مياه أو أحضرله أكل, معملش ولا حاجه من كل دا, فقولتله مش عايزني اسخنلك مياه عشان تستحمي؟

زي ما يكون كان ناسي وافكر, ورجع راح ناحية الحمام وقال أيوه, أنا اتمشيت بالراحة ودخلت غرفة النوم وقفلت الباب بسرعة ووقفت وراه وأنا قلبي هيتفجر من قوة الضربات وفي نفس اللحظة اللي قفلت فيها الباب بقوة

سمعت خبط قوي على الباب مع إن كان بينه وبين الباب كذا متر يعني على الأقل هيوصل ويخبط بعد ثواني لكنه في نفس اللحظة خبط بقوة وبدون ما يتكلم.

أنا وقفت ورا الباب مرعوبة ومع كل خبطة جسمي بيتنفض, كنت عارفه إن اللي ورا الباب دا مش جوزي, دا أكيد الجن اللي كنت بحس بوجوده معايا الفترة اللي فاتت, حاولت اقرا كل القرآن اللي حافظاه بعد ما مشيت بالعافية واترميت على سريري وأنا بحاول أسد ودني عن صوت الخبط اللي كان بيوقف لحظة ويستمر لحظات.

اللي ورا الباب مكانش جوزي, حتى مكلمنيش ولا نادى عليا وبعد وقت معرفش قد إيه صوت الخبط قل بالتدريج لحد ما اختفى خالص, وأنا فضلت حابسه نفسي في الأوضة لحد الصبح وبعدين رحت بيت أهلي وحكيتهم اللي حصل وجوزي بعدها رجع وحكيته وسبنا البيت وسكنا في بيت ثاني.

انتهت

"الحكاية السابعة عشرة"

القصة دي صعب تصدقوها, أنا عارف, خصوصا لما اقول إني عشت مع جن سميته فتحي لمدة 4 سنين دراسة, كان الأكل يختفي من التلاجة, والسجاير كمان تتأخذ مني وأنا نايم, بس عملت معاه اتفاق وبقينا عايشين مع بعض أنا وهو طبيعي, وهقولكوا عملت الاتفاق معاه إزاي بس خليني أحكيلكوا القصة من البداية.

أنا شاب من محافظة قنا, التنسيق بتاعني بعثني على القاهرة, والترم الأول سكنت مع جماعة مرتحتش معاهم بسبب موضوع النضافة والطبخ

والحاجات المشتركة دي اللي الكل عارفها في سكن الطلاب وأنا بطبعي
مبشيش الدوشة والحوارات وقررت في الترم الثاني قررت آخذ شقة
صغيرة لوحدي عشان اريح دماغي.

خذت شقة صغيرة وأول يومين عدوا عادي وفي يوم رجعت من الكلية,
ودخلت آخذ دش كالعادة, وفي وسط الاستحمام نور الحمام اتطفئ, افكرت
النور قطع وفتحت الباب اشوف فيه إيه لقيت مفتاح النور مقفول!

قولت عادي يمكن عشان قديم فيبيروح ويرجع لوحده, ضغطت عليه ثاني
والنور اشتغل ودخلت اكمل استحمام وبعدها سمعت حد يبجري على
اطراف صوابعه وبعدين النور فصل ثاني, جسمي اتنفض وحسيت برعشة
لدرجة معرفتش اتصرف ازاي؟ حاولت اشغل عقلي عشان ميركزش في
الموضوع لأن مينفعش وخصوصا في المكان اللي أنا فيه حاليا وحاولت
اخلى استحمام بسرعة وقبل ما اطلع من الحمام النور رجع ثاني.

دخلت الغرفة بسرعة عشان اكمل لبس, واتفاجأت إن الهدوم مش موجودة مع إنني طلعتها من الدولااب وحطيتها على السرير قبل ما ادخل الحمام, ومتأكد من كدا يعني مش بيتهيللي ولا حاجه, دورت في الدولااب تاني وورا السرير ممكن يكونوا وقعوا مثلاً لكن ملقيتهمش, طلعت الصالة بره ادور عليه واتفاجئ إنهم متعلقين في مقبض باب الشقة.

مجرد ما شوفتهم صعقت وشعر جسمي وقف من الخوف, أنا عمري ما حطيت هدومي في مكان زي دا, أكيد فيه الشقة دي مسكونة بعفريت وعازب يطفشني منها.

خوفت البس الهدوم ودخلت الغرفة لبست هدوم تانيه ونزلت جري للشارع عشان اشوف الناس ومحسش إنني لوحدي.

فضلت قاعد من قبل المغرب لحد الساعة اتنين بالليل وأنا بفكر اعمل إيه واروح فين؟ وكان عقلي كل ما يقولي ارجع لاصحابي اللي كنت ساكن معاهم كنت برفض الفكرة وانفضها عن دماغي بعد ما افكر الحوارات اللي حصلت الترم الأول, لحد ما استجمعت قوتي وقررت ارجع للشقة تاني والأقي حل لموضوع العفريت دا وخصوصا إني مش أول مرة تحصل بييني وبينهم مواقف بس برضو كل مرة بخاف كأنها أول مرة.

فتحت الشقة لقيتها كلها ضلمة مع إني مقفلتش النور قبل ما انزل, أنا كنت نازل جري فأكيد ملحقتش اعمل حاجه, بس ما علينا, استجمعت شجاعتي وفتحت النور ودخلت غرفة النوم وقفلتها وراها ورحت على السرير عشان أنام وأنا بحاول اشغل عقلي بأي حاجه غير الوضع اللي أنا فيه دا.

بعد 10 دقائق سمعت صوت خبط على باب الشقة, قولت في نفسي مش فاتح خبط للصبح, بعد دقائق سمعت صوت صاحب الشقة بينادي عليا من بره وهو بيخبط, قمت وفتحت الباب لكن ملقتش حد.

بعدها رجعت السرير وقولت مش هفتح ثاني لأي حد مهما كان, وقبل ما عيني تروح في النوم شوفت ظل واقف ورا الباب, انتوا عارفين الأبواب اللي بتكون من فوق فيها جزء زجاجي كدا, أنا شوفت راس الظل دا باينه وراه ورجليه عاملين ظل برضو من تحت الباب.

ضربات قلبي زادت واترعبت أنا كنت فاكّر هيعمل معايا مقالب وخلاص مش يظهرلي بنفسه, قعدت اقرا قرآن وأنا بترعش وشويه بشويه اتشجعت وصوتي في القراءة بقى أعلى, ولقيت الظل دا اتحرك من ورا الباب وبدأت اسمع صوت تكسير في المطبخ وكرسي بيتحرك في الصالة, فضلت ادعي

ربنا الليلة دي تعدي على خير لحد ما الصوت هدي واختفى خالص كانت الساعة خمسة الفجر وسمعت صوت الأذان, اتطمنت شوية وقومت اتوضيت من قرازة المياه اللي بشرب منها, اتوضيت في الأوضة على جنب لإنني خفت اطلع ارواح الحمام وصليت الفجر ونمت وأنا ساجد.

صحيت على صوت المنبه الساعة 8 الصبح وأنا مش عارف إذا كان اللي حصل معايا امبارح دا حقيقة ولا حلم, لكن لما طلعت للصالة والمطبخ وشوفت الحاجات اللي واقعة في الأرض ومنها اللي متكسّر, عرفت انه حقيقة وكماني لقيت البوتاجاز مفتوح.

نضفت كل حاجه ونزلت رحت الكلية ورجعت وبمجرد ما دخلت الشقة شमित ريحة سجائر وشوفت على الطرابيزة كوباية شاي فيها بواقي, ضحكت وقولتله إيه دا, انت طلعت معلم وليك كيف كمان, وأنا اللي فاكر هتمشي بعد ما تعرف إنني لسه قاعد؟ طب ابقى اغسل الكوباية بعد ما تخلص, ودخلت الأوضة بتاعتي وقفلت الباب وبعد ثواني سمعت صوت

الكوباية وهي بتتكسر على الأرض, طلعت ثاني وقولتله خلاص يابن
الجزمة متكسرش حاجه لما تشرب ثاني هبقى اغسل انا.

لميت الكوباية ودخلت صليت وبعدين حبيت اشرب شاي فدخلت عملت
شاي وحاجه قالتلي اعمل كوبايتين واخلي واحد في الصالة والثانية ادخل
اشربها في غرفتي جوه, وقولت هعمل معاه اتفاق, وفعلا حطيت كوبايتيه في
الصالة وقولتله احنا نعمل اتفاق نعيش مع بعض من غير ما تشتغلني,
والكوبايه اهي اشربها وأنا هبقى اغسلها بس متكسرهاش.

خلصت الكوباية بتاعتي ولما طلعت لقيت الكوبايه بتاعته شربها, فرحت
جدا وخذت الاتنين وغسلتهم ونزلت قعدت مع أصحابي واليوم فات طبيعي,
ولما رجعت دخلت غرفتي فتحت اللاب عشان أذاكر سمعته بيخبط على
باب الغرفة, مرديتش عليه, رحت سمعت صوت حد بييجري في الصالة

زي العيل الصغير وبخبط في الأثاث, قولتله مش عايز صداع رحت فتحت باب الغرفة سبته مفتوح وبعدين هو سكت.

عشت معاه أربع سنين مع إنه معفن غير الجن اللي بقرا قصص عنهم, بياخد من السجائر بتاعتي, والأكل بحطه في التلاجة بينقص, وكمان بيحب زبالة مش زبالتى وبلاقي أكياس فاضية مرمية في المطبخ, لكن اتعودنا على بعض.

أنا كملت معاه عشان شوفت مواقف كتير من الجن عندنا في القرية لما كان عمري 12 سنة, ولو لقيت اهتمام وتفاعل بقصتي هكلكوا اللي كان بيحصل معايا في قريتي.

انتهت

"الحكاية الثامنة عشرة"

كنت يشوف الجن على هيئة بنت صغيرة لما بكون قاعد على سطح بيتنا بالليل, وحاجات كتير حصلت معايا وأنا قاعد لوحدي على السطوح, الأحداث بتبدأ من الساعة واحدة بعد نص الليل, بس هحكيلكوا قصتي من البداية خالص, لما كان عندي 10 سنين.

اسمي سيد من القليوبية وعندي 24 سنة, مخافش من الجن الحمد لله وحصلت بيني وبينهم مواقف كتير هحكيلكوا عنها دلوقتي, عندنا بيت 4 أدوار ولما كان عندي 10 سنين كنت ساكن في الدور الرابع وكنت بحلم حلم متكرر لمدة خمس سنين, إني نايم وفيه ققط شكلها مخيف جدا بتيجي تقرب على جسمي وتبدأ تاكل فيا, وبحس بلحمي وهو بيتقطع بين أسنانهم, خمس سنين والحلم دا بيتكرر من وقت للتاني لحد ما اتعودت عليه.

كبرت وبقي عندي 15 سنة كنت تقريبا في الاعدادي, وأنا بصراحة من
عشاق الضلمة, فكنت بطلع على السطوح واخذ السماعه معايا وكان تليفوني
نوكيا ساعتها, كنت اشغل أغاني وانام وأنا باصص للسما, بغمض لحظات
وافتح لحظات ويكون منسجم مع الأغنية يعني وكدا, وفي يوم غمضت
عيني وسرحان مع الأغنية ولما فتحت شوفت بنت واقفة فوق راسي, يعني
رجليها اليمين جمب ودني اليمين والشمال جمب الشمال, وباصة عليا من
فوق, اتخضيت شوية من المفاجأة واتعدلت ابص عليها اشوف هي مين
وجات هنا ازاي لكنها اختفت.

طولها كان متر تقريبا يعني قصيرة وشعرها أسود ونازل على وشها
ولابسها ملابس غامقة, بس أنا الحمد لله مبخافش يعني من الحاجات دي
بالعكس أنا بحب أتابع قصص الرعب جدا والأفلام وقلبي جريء شوية في
الحاجات دي, بصيت حوالي ادور عليها اشوفه اختفت راحت فين وقعدت
ادور عليها في الأوض اللي في السطح وعلى السلالم لكن ملهاش أثر,

رجعت مكاني ثاني ولما مددت سمعت أسمى حد بيناديه بصوت همس كدا
وبيمد في الاسم زي ما بشوف في الأفلام, قومت برضو دورت هنا وهنا
لكن مفيش أثر.

بقيت كل ما اطلع السطح وأنا على السلالم وطالع اسمع اسمي بيتنادى عليا
بنفس الصوت ونفس الهمس ولما اطلع ملاقيش حاجه, بعدها مبقتش اطلع
السطح ثاني وبقيت انزل اقعد مع أصحابي شويه واغير جو وغبت عن
السطح اسبوعين أو أكثر, وفي يوم طلعت السطح في نفس الميعاد اللي
بسمع فيه الأصوات دي, يعني أنا كنت في العادة بطلع من الساعة 10 مثلا
وتبدأ تحصل الحاجات دي حوالي الساعة واحدة, اليوم دا أنا طلعت الساعة
واحدة ونص بالليل, وشوفتها.

خذت السماعة وطلعت لفوق على طول, لقيتها واقفة في الصالة في نص السطح, بنفس الشكل اللي طلعتلي بيه قبل كدا, شعرها نازل على وشها وعنيها حادة تخوّف وبتبصلي نظرات ثابتة وبتنادي عليا بنفس الهمس والصوت اللي كنت بسمعه دايمًا.

قربت منها خطوة واثنين وثلاثة لحد ما وقفت قصادها وكان بيني وبينها حوالي متر, بتقول اسمي وتكرره مبتقولش غيره وفجأة اختفت وهي قصاد عيني.

بعدين مبقتش اطلع السطح كتير بس كنت بشوفها وتظهرلي في أماكن مختلفة غير السطح, يعني أوقات اشوفها على السلم, ألمحها قدام باب الشقة, اسمع اسمي بيتنادى عليا بالليل من السطح وشوية خيالات كدا, مثلاً راجل ماشي على الحيط وأنا نايم, أكون نايم واصحى على صوت حاجه بتتخبط جمبي, ومركزتش قوي.

وفي يوم جمعة كنت قاعد وحدي في الشقة حوالي الساعة 11 الصبح,
فطرت وعلمت شاي وكنت داخل الحمام اغسل ايدي وأول ما دخلت سمعت
صوت الكوباية والمعلقة اللي سايبهم على الطرابيزة بيخبطوا في بعض,
بصوت واضح ومفیش حد في الشقة غيري, خرجت من الحمام اشوف
بيحصل إيه لفيت المعلقة والكوباية مرفوعين في السما وبيخبطوا في بعض
ولما شافوني نزلوا مكانهم ثاني, أنا معرفتش اعمل إيه والحوارات دي اللي
بتحصل ليه عاوزين منها إيه؟ لفيت عشان ادخل الحمام ثاني لفيت شطافة
الحمام مفتوحة والحنفية مفتوحة قفلتهم وخلصت الموقف على كدا.

من المواقف كمان اللي حصلت معايا ومقدرش أنساها لما كنت في
بورسعيد, أنا بحب الصيد وواخدها هواية يعني على قدي وكدا, وفي يوم
كنت في بورسعيد والمعروف إن فيها أماكن كتير ضلمة, فكنت قاعد بالليل
وبصيد مع نفسي ومستمتع بصوت المياه والشجر والهدوء, حتى الليلة دي

مكانش فيها قمر, كانت كلها أسود في أسود, وماسك التليفون فاتح شات
والصنارة قدامي وفجأة ظهر صياد جمبي لازق فيها, جي منين وقعد امتى
مش عارف!

بس فجأة شوفت على نور الموبايل واحد قاعد جمبي لابس لبس الصيادين
اللي بيلبسوها للشغل, طاقية وهدوم قديمة باهتة, كان قاعد جمبي وباصص
في التليفون معايا, رفعت التليفون بصيت عليه راح اختفى فجأة زي ما
ظهر فجأة.

قومت بصيت شمال ويمين مفيش حد في المكان غيري, رجعت قعدت على
الحجر ومسكت التليفون ونفس اللي حصل من شوية اكرر ثاني, فجأة ظهر
جمبي وبص معايا على التليفون واللي بعمله فيه ولما حسيت بوجوده جمبي
ورفعت التليفون ابص عليه اختفى.

قومت لميت العدة وقولت مش قاعد ثاني ورجعت للبلد.

اتجوزت من سنة ونص ولحد دلوقتى بتحصل معايا مواقف زي اللي
حكيتها لكوا دي وآخر موقف كان من يومين, ومش عارف إيه اللي بيحصل
معايا دا أو بيحصل ليه, بس الحمد لله مبخافش وبتعدي على خير وربنا
يستر.

انتهت

"الحكاية التاسعة عشرة"

الإنسان لما ييموت بطريقة مش طبيعية بيطلع مكانه عفريت, وكمان
بيحاول ينتقم من اللي قتلوه, ناس كتير مبتصدقش الكلام دا بس أنا صدقته
من وأنا صغيرة, وقتها كان عندي 6 سنين والقصة دي حصلت زمان جدا
من حوالي 40 سنة.

أنا من محافظة الشرقية وكنا ساكنين في حارة في ست بيوت بس, ثلاث
بيوت مسلمين وثلاثة مسيحيين, كنا عايشين في سلام وسعادة والبيوت كلها
مفتوحة على بعض, وقتها كنت صغيرة وبنلعب سوا في الشارع وبالليل كنا
ننام على حصير قدام البيوت, وفي ليلة كنا نايمين جنب بعض في الشارع
وفجأة سمعنا صوت حد بيصرخ من بعيد ولما بصينا لقينا نور جاي علينا

من بعيد ويبنادي على الناس كلها, ولما قرّب منّا اكتشفنا أنه عم نجيب
والنار ماسكه فيه.

صرخاته كانت مؤلمة جدا وقلوبنا اتزلزلت من المشهد ساعتها, كان عمال
ينادي على الناس ويخبط في الأبواب والحيطان عشان حد يلحقه من النار
اللي ماسكه فيه والناس خرجت تجري من البيوت وحاولوا يطفوه بالمياه
لكن من غير فايده, قعد ينادي على أمه وعلى أبوه بصوت كله عذاب وفي
وسط ماهو بيتخبط في الحيطان هنا وهنا راح واقع على الأرض وصوته
سكت بالتدريج لحد ما بقى صمت تام.

احنا الأطفال واللي كان عددنا عشرين وقتها كنا واقفين مرعوبين من
المنظر وبنبكي من الخضة خصوصا أنه أب لأربعة من اللي واقفين معنا,
وقتها شوفت أمه وهي بتاخذه في حضنها وجلده سايح لكن الغريب عنينا

مكانش فيها أي مشاعر, يمكن محدش شافها غيري لأنها كانت قاعدة على الأرض وقريبة من مجال الرؤية بتاعي, عينيها ثابتة مفيهاش دموع.

خواته والجيران كانوا كلهم يجبروا وراحوا بيه على المستشفى لكنه مات في الطريق ولما عمي رجع عرفنا منه اتحرق ازاي.

عم نجيب وأخواته كانوا عندهم مزرعة فراخ جمب التربة, وكانوا بيولعوا الكلوبات عشان يدفوا الفراخ وكدا وبيتخدموا الغاز السائل اللي كنا بنشتره زمان, وهو تقريبا اتكب عليه شوية غاز وهو بيملا الكلوب أو حاجه زي كدا ولما ولعوا النار مسكت فيه, صرخ وطلب من أخواته الثلاثه ينقذوه لكنهم خافوا مع إنهم ثلاث رجاله يعني كانوا يقدرنا يلحقوه, لكنهم خافوا وبعدوا عنه, راح قام يجري بره المزرعة عشان كان فيه رشاح فيه مياه يرمي نفسه فيه لكن الرشاح دا مكانش فيه مياه وبس كان فيه زيوت ومخلفات ولما نط فيه النار مسكت فيه أكثر وبعد جري ناحية البيوت عشان حد يلحقه من الجيران وكان بينادي على الجيران بالأسم يا عم فلان الحقني

يا عم فلان النار ماسكه فيا وكانوا بيحاولوا يساعده ويطفوه فعلا والغريبة
إن نادى على الناس كلها ما عدا أبوه وأمه.

مات في المستشفى بعد ثلاث أيام وأمه قالت إن هي شالت الخراطيم منه
عشان يرتاح خالص ومن وقتها بدأ الجحيم في حارتنا.

كل يوم في نفس الميعاد اللي اتحرق فيه اللي هو الساعة 3 قبل الفجر نسمع
صوته وهو ببصرخ وبيجري في الحارة ويخبط على البيوت والشبابيك
وبينادي على الناس كلها حتى الأطفال, واحنا طبعاً من بعدها مبقيناش ننام
بره البيوت تاني بقينا ندخل ننام في البيت.

صوت جري ورعب ونار كأنه حقيقي بالظبط, كل يوم, بقينا نقفل الأبواب بدري وكل واحد يلزم بيته, لكن لسوء حظي إن الأوضة اللي بنام فيها هي اللي على الشارع والأوضة اللي بيناموا فيها أبويا وأمي كانت في البيت جوه, فكنت كل يوم أعيش الرعب دا ولما أقول لأمي اللي بسمعه تقول لي سدي ودانك ونامي.

كنا كل يوم احنا الأطفال نسمع كل حاجه ونحكي لبعض تاني يوم واحنا مرعوبين, ومش عارفين نعمل إيه؟ الناس كلها مكانتش عارفه تعمل إيه!

طبعا لما كان الخبط على الأبواب يشتغل مكانش حد بيفتح الباب لإن كلنا عارفين إنه عفريت عم نجيب لحد ما في يوم خبط على البيت اللي قصادنا وكانت ساكنة فيه خالتي صباح أم محمد, راحت واحدة من البنات الصغيرين قامت وفتحتله الباب وشافته واقف قدامها مولع وراح مسكها عشان يشدها وياخدها معاه بره, والبنات تصرخ, خالتي صباح صحيت وجريت بسرعة تسحب منه البنات وصرخت فيه انت بتعمل إيه, وبقت تشد

من ناحية وهو يشد من ناحية وهي تصرخ والناس كلها صحيت ومنهم أمه
ومسابش البنت غير لما أمه صرخت وقالتله ارجع مكانك ومتجيش هنا
تاني.

بعدها نجيب بدأ ينتقم من أخواته الثلاثه اللي سابوه بولع وخافوا يساعده,
هما مكانوش ساكنين معانا في نفس الحارة, ثاني يوم سمعنا إنهم لقوا ابن
أخوه ولع في الشارع قدام بيتهم والنار مسكت فيه ولما جريوا بيه على
المستشفى قالهم إن عم نجيب ظهر قدامي وقال لي هولع فيك زي ما حصل
معاي عشان أبوك السبب ولع فيا وبعدين اختفى.

الابن لحقوه وبعد كام سنة اتجوز وخلف وابنه حصل فيه زي ما حصل
معاه, قاله عمو نجيب اللي في الصورة ظهر ولع فيا وقال لي كذا وكذا وبعدين
الطفل مات وأبوه مات بعده على طول.

أخوات نجيب كل واحد فيهم مات ابنه, الأول ابنه مات في حادثة عربية
والثاني أبوه داس عليه بالعربية وهو راجع بضره ومشافوش, وأخواته
قالوا إن نجيب راجع ينتقم منا.

وفي ليلة سمعنا صوت خالتي ثريا وهي بتصرخ وتقول الحقونا البيت ولع
بيننا, الناس كلها صحيت وحاولوا يطفوا البيت وثرثريا واقفة بتصرخ وأولادها
في حضنها وهي بتقول نجيب جالي وقالوا هولع فيكي ومش هسيبك, أم
نجيب قالتلها عمل فيكي كذا ليه؟

قالتلها عشان في الليلة اللي ولع فيها كان بينادي على اسمي وسط الأسماء
وأنا قولتلها ملش دعوة ما تولع أنا مالي, واهو دلوقتي جاي ينتقم مني.

محدث قدر يطفى بيّتها, النار أكلته كله والعجبية إن بيّتها بس من وسط البيوت اللي ولع, البيتين اللي لازقين في من ناحية اليمين والشمال النار حتى ملمستهمش.

فضلت الحارة على الوضع دا من وأنا عندي 5 سنين لحد ما بقى عندي 12 سنة, وكانوا يقولولنا متخافوش هو بينادي عليكوا عشان يخوفكوا بس لكن مش هيأذيكوا. لكننا كنا بنخاف حتى بعد ما كبرنا, كنا نخاف ندخل الحارة حتى في الصبح.

والنور كمان كان بيقطع عندنا كثير وفي يوم دخلت الحارة والنور قاطع وكنت معديه قدام بيت عم نجيب وفجأة شوفته أمه وهي فاتحه الباب والنار مولعه في البيت كله من جوه ولما شافتني راحت قفلت الباب, وحصلت حوادث كثيره ثاني لحد ما أبويا قرر نطلع ونسيب الحارة, وباقي الناس

برضو كان اللي يلاقي فرصة منهم إنه يسيب الحارة كان يطلع ويسيبها
ومير جعلهاش تاني.

انتهت

"الحكاية العشرون"

أنا متأكدة إن اللي بيموت محروق بيطلعه عفريت في نفس المكان اللي
مات فيه, وكمان بيحاول ياذي اللي قتل أو يطفش الناس من المكان
وبيظهر لهم ويخوفهم, والقصة دي أنا شوفتها بعيني محدش حكالي.

سنة 1993 كنا ساكنين في مدينة من المدن الجديدة وقتها, كنا في الدور الأول والشقة اللي جمب شقتنا كانت لواحدة اسمها طنط أمينة وجوزها عم فريد, للأسف الاتنين مكانوش بيخلفوا وبعد فترة طنط أمينة قررت تتبنى طفل اسمه محمد, ومن بعدها بدأت تحصل مشاكل بينها وبين جوزها وكنا دايما نسمعهم بيتخانقوا وصوتهم كان عالي, كان رافض الولد وشرط يقبله إنها تكتب الشقة باسمه وإلا هيتخلص من الطفل.

هي كمان رفضت والمشاكل زادت بقت يوميا لحد ما في يوم كنت أنا وأخواتي الصغيرين في البيت وبابا وماما كانوا في الشغل, سمعنا صوت صراخ بس مكتوم, دورنا مفيش حاجه ورحنا البلكونة برضو مفيش حاجه وفجأة عم فريد خرج من شقته وهو بيطلب المساعدة من الناس ويقولهم الحقوا أمينة ولعت في نفسها.

خواتي دخلوا الشقة وأنا فضلت واقفة وشوفت طنط أمينة وهي بتخرج من الشقة وشبه متفحمة ومفيهاش أي ملامحة باينة, أنا عرفتھا من الحلق اللي لا يساه في ودنها, وقعت تقول بصوت واطي بصعوبة منك لله يا فريد, كررتها مرتين تلاته وسكتت.

كانت الناس وقتھا اتلمت والإسعاف جات خدوها وجلدها كان لازق في البلاط من كتر ما هو ساح, وجات الشرطة وحققوا في الموضوع وعم فريد اتحبس كام يوم وبعدين طلع, وطردها الطفل اللي اتبنوه وهو اتجوز مرات أخوه المتوفى.

برضو كانت بتحصل مشاكل ونسمع صوت خناقات وزعيق وتخبيط, والشقة بقت تولع لوحدها كذا مرة, ومرات عم فريد كانت بتحكينا إنها بتشوف عفريته أمينة وهي بتطلع من الحمام والنار ماسكه فيها وتدور على فريد في الشقة ولما متلاقيهوش بتدخل الحمام تاني وهي بتصرخ.

وفي مرة برضو عم فريد كان لوحده في الشقة وسمعناه يبصرخ ويجري
بره الشقة وهو بيقول أمينة ظهر تلي وعائزه تقتلني.

وفي ليلة أختي كانت سهرانة لوحدها بالليل بتتفرج على التلفزيون، وفجأة
سمعت طنط أمينة بتنادي عليها وتقولها تعالي، اختي جاتلها صدمة نفسية
وفضلنا شهور نعالجها.

وفي يوم النار ولعت تحت بلكونة عم فريد بدون سبب ولما خرجنا نشوف
اللي حصل شوفت طنط أمينة وهي واقفة وسط النار وبتتوعد فريد وبتقوله
مش هسيبك يا فريد ومن بعدها عم فريد باع الشقة ورجع لبلده.

اللي اشتروا الشقة كمان حصلت معاهم مواقف كتير مرعبة والنتيجة إن مالكة الشقة أصيبت بشلل تام وعدم النطق وبعد رحلة علاج طويلة حالتها تحسنت وأول حاجه قالتها إنها في مرة كانت هتدخل الحمام وأول ما فتحتة شافت واحدة قاعدة والنار ماسكة فيها وراحت صرخت فيها وقالتلها اطلعوا بره الشقة بتاعتي.

احنا بعدها بفترة الحمد لله سبنا المكان وانقطعت عننا أخبار الشقة دي.

انتهت

"الحكاية الحادية والعشرون"

فيه عفريت صغير بيطلعي غير البنت اللي حكيتلكوا عنها واللي كنت بشوفها في السطح ومهما حاولت اتكلم معاها أو اسألها عايزه إيه مكانتش بتجاوب غير باسمي بس وهي بتهمس بيه وتكرره.

العفريت دا ظهرلي أول مرة وأنا نايم في الدور الثالث في الشقة بتاعتي، كنت بشطبها جديد ولسه على المحارة، الكلام دا كان حوالي الساعة 2 بالليل.

كان الجو شتا وقفلت كل الشبابيك من البرد وكنت حاطط فرش على الأرض ونمت واتغطيت باللحاف لحد وشي، مخليتش حاجه من جسمي مكشوفة، وفجأة قبل ما أنام حسيت بهوا شديد جدا واللحاف اللي كان دافي فجأة بقى تلج.

فجأة وأنا مستغرب من اللي بيحصل راح اللحاف اتسحب مني ولقيت حاجه قصيرة بتجري عليا من ناحية رجلي وطلعت على رجلي وجسمي لحد ما وصلت لدماعي وأنا مش مستوعب اللي بيحصل مع إن الدنيا كانت ضلمة شويه لكن كنت شايف كل حاجه, شلل تام وجسمي مربوط وبحاول أصرخ لكن بدون فائدة.

حاولت أزق لكن برضو مكنتش قادر, وبعد شويه اختفى وقدرت اتحكم في جسمي, قمت وقرات قرآن كتير وقولت أكيد كابوس, وسحبت اللحاف عليا تاني وغطيت جسمي كله, أنا من النوع اللي لما بيتغطى مبسبش حته من جسمي مكشوفة, وأول ما غمضت نفس اللي حصل اتكرر تاني, بعد ما غمضتها بثواني بس, بقيت متشنج وجسمي مكسر زي ماكون شغالي بقالى مية سنة, قومت مفزوع وأنا هتجنن من الغيظ, الساعة كانت 4 الفجر وأنا عندي شغل الساعة 6 الصبح, وقررت إنى امثل إنى هنام لكن مش هغمض عيني.

اتغطيت باللاحاف لحد وشي لكن مغمضتش عيني فضلت مفتح, وبعد ثواني
حسيت اللحاف بيتسحب مني وأول ما حسيت بكدا رحت راميه من عليا
وبصيت ناحية رجلي لقيت عفريت حجمه صغير جدا حوالي خمسين سنتي,
شفته بعيني يعني مكنتش نايم أو كان كابوس زي ما كنت فاكّر, طلع على
جسمي بسرعة وكان خفيف جدا وراح قاعد على كتفي, ومقدرتش اتحرك
بعدها, أعصابي كلها سابت, وفقدت السيطرة على جسمي, وبعدها بساعتين
صحيت وعضمي كله متكسر وأسناني مضغوطة على بعض جامد وكانت
واجعاني جدا.

برضو من المواقف الثانية اللي مستحيل أنساها لما كنت نايم على السطح
كالعادة سمعت صوت في أوضة من الأوض اللي على السطح قومت
أشوف فيه إيه وعرفت الأوضة اللي جاي منها الصوت, طبعا الدنيا ضلمه
ومفيهاش نور فتحت الباب وبصيت مفيش حاجه كله سواد في سواد,
اتقدمت جوه الأوضة وطلعت تليفوني النوكيا اللي بكشاف وشغلته ودخلت

كام خطوة للداخل وببص ورايا لقيت الباب بيتقفّل لوحده مع كل خطوة
أخطيها يتقفّل جزء منه.

جريت على الباب عشان ألحقه قبل ما يتقفّل لإنّي حسيت وقتها بخوف
الصراحة وفي اللحظة اللي لفيت فيها ناحية الباب جات حاجه من ورايا
وراحت ضربتني في ضهري جامد, كإن راجل ضخم وضربني برجله في
نص ضهري, من قوة الضربة اترميت على وشي بره الأوضة وحلفت مانا
طالع أنام فوق السطح تاني.

وفي يوم برضو كنت راجع من شغلي بعد الضهر كانت الساعة حوالي
واحدة ونص, فدخلت أوضة أبويا أنام, قفلت الباب واطرميت على السرير
من التعب, وباصص في السقف كدا ولمحت طيف نور جاي من ناحية
رجلي, ببص كدا لآخر السرير شوفت عفريت صغير عمال ينط كدا من
عند رجلي عشان أشوف وشه, متخيلين المشهد, عفريت بينط كإنه طفل
صغير وعائزني أشوفه, كان يادوب بارتفاع السرير.

أنا اترعبت وقتها, كان عبارة عن هيكل عظمي وعليه طبقة من الجلد,
حاجه رفيعة جدا, طلع على السرير زي ما الأطفال بيطلعوا بصعوبة وأنا
من هول المنظر كنت ثابت زي ما يكون فيلم رعب بشوفه قدامي, طلع
على السرير واتقدم خطوة والثانية وأنا عيني مبلقله فيه ومش عارف اعمل
إيه من الصدمة, جري عليا وبكل قوته مسكني من رقبتى.

أنا صرخت وفضلت أنادي على أبويا وأخويا وأي حد اسمه ييجي على
لساني, ومجرد ما أوكرة الباب بدأت تتفتح راح سابني وجري ناحية
الدولاب واختفى.

دخلوا عليا وهما يقولوا فيه إيه ومخضوضين رحت حكيثلهم اللي حصل,
فضلوا يضحكوا كالعادة ومكانوش مصدقيني وأنا من بعدها حلفت ما
أحكيهم حاجة ثاني مع إن بتحصل معايا حاجات كثير زي دي.

وعلى فكرة أنا عندي 24 سنة والموقف الأخير دا بالذات خلى شعري في
النص كله أبيض مع إني في الأول مكانش فيه ولا شعراية بيضه فيا.

ومازالت بتحصل معايا مواقف رعب زي كذا وأكثر.

قصة حقيقية

انتهت

"الحكاية الثانية والعشرون"

في القرية بتاعتي في عفرينة بتطلع للمزارعين والست دي كانوا عارفينها قبل ما تتقتل وكان ليهم مواقف كتير معاها ويمكن غالبيتهم كانوا السبب في موتها ولو بطريقة غير مباشرة.

الست دي كانت من القرية اللي ورانا، وكان عقلها خفيف أو مجنونة فكانت بتظهر للمزارعين في أوقات مش متوقعة فكانوا بتخضوا منها، واحد مثلا يكون بيسقي الزرع بالليل ويسمع صوت بيتحرك في الزرع وبعد ما الخوف يركبه يكتشف إنها هي، أوقات مثلا يسمعو واحدة بتبكي ومش لاقيين مصدر الصوت وبعد ما يمروا بدقايق رعب يلاقوها هي، انزعجوا من الموضوع وشكوا منها لأهلها اللي حاولوا يسيطروا عليها لكنها كانت برضو بتهرب منهم، لحد ما في يوم لقوا بطنها كبيرة وحامل ومع انزعاج الناس منها قرروا يخلصوا عليها ومن هنا بدأت اللعنة.

القرية بتاعتي واللي وراها بيربط بينهم طريق اسفلتي قديم كدا, طريق صغير بالكاد يكفي للعربيات الكاروا والجمال والست دي عفريتتها بقت تطلع في الطريق دا.

واحد سواق بيحكي إنه كان راجع بالليل وجاي من القرية اللي ورانا وعلى الطريق دا شاف ست ومعاها طفل صغير في إيدها بيشاوروله يوقف, استغرب وجود واحدة ست في الطريق دا في الساعة المتأخرة دي, وقلها وقالته خدني في طريقك.

السواق بيقول مكنتش مطمئن لما ركبت جمبي وكنت حاسس بالخوف لكن مركزتش وكملت في طريقي وقبل ما نوصل للقرية قالتلي نزلني هنا, طول الطريق كنت باصص قدامي مع إني كنت حابب ابص عليها واشوف ملامحها, واستغلّيت الوقت اللي بتنزل فيه من العربية وبصيت بطرف عيني عليها لقيت وشها عبارة عن مجموعة تعابين متشابكين مع بعض

وملامحها مرعبة جدا, كان فاضلها ثواني وتنزل حاولت بقدر المستطاع
امسك أعصابي لحد ما نزلت وقفلت الباب ورحت دايس بنزين على أقصى
سرعة وهربت من المكان ولما بصيت في المراية أشوفها راحت فين لقيتها
اختفت.

اتنين مزارعين برضو كانوا مع بعض في الليل بيسقوا مع بعض وبيتونسوا
وكدا وفجأة وهما ماشيين لقوا الظل بتاعهم بدل من اتنين بقى ثلاثة بصوا
لبعض مش فاهمين اللي بيحصل وفجأة الأرض من تحتهم بقت لينه وحسوا
برجليهم بتغرس فيها, واحد فيهم جري والثاني رجله اتسحبت لتحت وحس
بايد ماسكاها وبتسحبه لتحت, وبعد معافرة ومعاناة صاحبوا قدر يسحبه
وبعدين سمعوا صوت واحدة بتضحك وكانت نفس صوت ضحكة الست دي
قبل ما تموت لإنهم كانوا عارفينها وعارفين ضحكتها.

ناس تاني كمان قالوا إنهم بالليل بيشفوا ست ماشية وسط الزرع لابسه
أسود وممكن تفضل على الحال دا كتير لكن لو حد نده عليها بتختفي، أما
بقى اللي مبيكونش عارف ويبروحها يشوف هي مين بيبلاقي نفسه تايه في
الغيط ومهما حاول يخرج منها مبيعرفش، وبيفضل على الحالة دي ساعتين
تلاثة لحد ما يعرف يخرج.

وفيه حكاية برضو قالها عم رمضان، راجل كبير في البلد ومعروف إنه
ملوش في الهزار أو الكذب والحوارات، بيقول كنت في الشتا ولسه في
الغيط بقفل المياه والدنيا هادية مفيش لا صوت ولا حركة وفجأة وهو ماشي
سمع صوت خطوات بتمشي وراه في الطين، لما يتحرك بتتحرك معاه ولما
يقف بتقف، قال مين؟ محدش رد عليه كمل مشي والخطوات رجعت تمشي
معاه بس أبطأ من المرة اللي فانتت كان اللي وراه كان مستتي.

قرر يبص وراه ولما لف شاف ست واقفه بعيد عنه شويه, لا بتقرب ولا
بتمشي ولا بتتحرك, سألها انتي تايهة؟ هزت راسها بمعنى أيوه.

قالها الطريق من هناك وشاورلها بإيده

الست رفعت إيدها هي كمان وشاورت في نفس الاتجاه.

وفضلت واقفة متحركتش, عم رمضان حس بعدم الارتياح من اللي بيحصل
ولف يكمل طريقه وبعد خطوتين سمع صوتها واطي جدا ببسأله الأرض
دي بتاعتك؟

وقف وقالها بتاعة ربنا.

قالتله بصوت حزين وأنا مدفونة فيها. ولما لف بسرعة لقاهما اختفت.

انتهت

"الحكاية الثالثة والعشرون"

كان فيه عفريت ساكن معانا أيام الدراسة, وكنا عارفين إنه عفريت ومتقبلين الموضوع عادي, وكمان كنا بنحاول نشوفه لما يتواصل معانا لكن محبش يظهر لنا نفسه أبدا.

كل الحكايات اللي قريتوها عن ناس كانوا عايشين مع عفريت وهما مش عارفين حكايات جميلة وكل حاجه وبتحصل, لكن حكايتي أنا غريبة ولذيذة في نفس الوقت.

أنا مهندس وفي السنة الأخيرة قررت أنا وواحد صاحبي إننا نأخذ شقة لوحدها كذا, تكون صغيرة وبعيدة عن زحمة شقق الطلبة اللي بتكون عبارة عن سوق وقت الامتحانات, ولأن طبعي وطبعه بنحب الهدوء قررنا نأخذ شقة لوحدها.

شقة صغيرة فيها اوضتين وصالة صغيرة كذا والأمور كانت طبيعية وتام, لكن اللي مش طبيعي هو اللي هحكيلكوا عنه دلوقتي.

طبعا كل واحد فينا ساكن في أوضة لوحده, أنا كنت اصحى من النوم والبس واطبط حالي وألاحظ إنه لسه مصحيش ولا سمعت صوته في الصالة ولا أي حاجه, في اليوم الأول رحته الأوضة خبطت عليه وسمعت صوته بيقول أيوه؟ سألته مش نازل الكلية النهاردا ولا إيه؟ قال لي لا مش نازل.

سبته ونزلت رحت الكلية واتفاجئ إنه هناك, بصيت عليه وتنحت لقيته
برضو باصصلي ومنتح زي ما يكون مستغرب من وجودي, ثاني يوم
برضو مشوفقوش طلع من الأوضة يعني مصحيش ولما رحت لقيته هناك
في الكلية وبرضو باصصلي ومستغرب.

لحد ما في يوم قالي ياعم لو مش عايز تنزل معايا قولي, لكن متلفش وتدور
وتقولي مش نازل وألافيك نزلت, كلامه دهشني وصدمني في نفس الوقت
لإن كان المفروض أنا اللي أقوله كدا وكمان اسأله بيوصل قبلي إزاي؟

قولته أنا اللي المفروض أقولك كدا وخصوصا إني بصحيك واسألك رايح
الكلية ولالا وانت تقولي لا وأجي ألافك هنا, فتح بقة من الصدمة وقالي لا
أنا اللي باجي اخبط عليك واسألك رايح الكلية ولالا تقولي لا.

أنا وهو سكتنا شوية عشان نفهم اللي بيحصل معنا, خصوصا إني مش
هكذب عليه وهو مش هيكذب عليا احنا ساكنين مع بعض 3 سنين قبل كدا
وعارفين بعض كويس جدا, ومكناش فاهمين اللي بيحصل دا بس أقرب
تفسير إنه جن ساكن معنا ويعمل فينا المقابل دي.

فقررنا في نفس اليوم نروح لصاحب الشقة ونسأله عن اللي موجود فيها,
مكناش ناويين نسيبها لإننا بطبعنا مش بنخاف وفي نفس الوقت لو سبناها
صعب نلاقي حاجه زي وتكون قريبة من الكلية لإن الشقق كلها أكيد
اتسكنت خلاص.

زرنا صاحب الشقة وقعدنا معاه وشربنا الشاي وسط نظراته اللي مستغربة
وفي نفس الوقت متوقعة اللي هنقوله واللي هنسأل عنه, كان مترقب جدا
لحد ما قولتله بص ياعم فلان احنا مش هنسيب الشقة هنكمل السنة فيها, بس
عايز اسألك سؤال الشقة فيها حاجه مش طبيعية صح؟

اتردد وقال مش طبيعية إزاي وهو بيداري شيء ظهر وواضح في عينه,
قولتله احنا مش هنسيب السكن زي ما قولتلك بس قولنا انت الشقة فيها إيه؟

قالى مفيهاش حاجة بس احنا كنا بنسمع أصوات بعض مع إن الواحد مننا
بيكون بره وبنسمع صوته فى أوضته لما ننادي عليه واحنا عارفين إنه بره
واتأكدنا لما نتصل بيه ونسمع صوت العربيات فى الشارع جنبه مثلا أو فى
المترو وبعدها لو كلمناه نسمع صوته فى أوضته، فقررت أأجر الشقة
وبسعرها اسكن بره لإننا عائلة وعندنا أطفال ومش هيعرفوا يعيشوا فى
الجو دا.

ابتسمناله وكلمنا الشاي وزى ما وعدناه رجعنا الشقة كلمنا باقى السنة فيها.

وبدأنا نشغل الجن دا زي ما كان بيشتغلنا، الصبح اتصل بصاحبي أقوله لما
تنزل رنلى أو ابعتلى رسالة، وبعد ما اعرف إنه نزل أقوم وأنا بمثل إنى
مش عارف واخبط عليه وأسأله مش هتروح الكلية النهاردا؟ يروح الجن
يقولى لا مش هروح روح انت. أكمل كلام معاه واسأله عن أى حاجة تانى

ولما يرد عليا وفي وسط الكلام اروح فاتح الباب بسرعة عشان أشوفه مثلا
بس الصوت بيختفي فجأة.

صاحبي برضو كان بيعمل زيي كذا ويفتح باب أوضتي بسرعة عشان
يشوفه لكن صوتي كان بيختفي بمجرد ما يفتح الباب, ولما الجن عرف إننا
عرفنا بمقاش يعمل الحركة دي معنا, لحد ما في يوم واحد صاحبنا جالنا
في وقت متأخر ليلة خميس وقرر يبات معنا, ليلتها بات على الكنبه قدام
التلفزيون في الصالة وتاني يوم حاولنا نصحيه لصلاة الجمعة لكنه بسبب
سهره مرضيش يصحى, ولما رجعنا من الصلاة لقيناه قاعد على الكنبه
وبمجرد ما فتحنا الباب اتخض وبص فينا وهو مش مصدق, سألناه مالك؟
قالنا أنا من شوية خبط عليكما انتوا الاتنين عشان ننزل نصلي وكل واحد
فيكوا قالي إنه مش نازل وأنا كسلت زيكم وقعدت مكاني متحركتش من
وقتها, انتوا خرجتوا امتى وازاي؟

بصينا لبعض وضحكنا ومسكتش غير لما حكينا له اللي معانا في الشقة,
وتاني يوم الخبر انتشر في الكلية كلها والحمد لله محدش فكر يزرونا تاني.

انتهت

"الحكاية الرابعة والعشرون"

نساء كثير في ايام النفاس بعد الولادة مباشرة بتحصل معاهم مواقف مرعبة, أحيانا يحسوا بيها وأحيانا بتحس بيها أمهاتهم لأنهم يكونوا ملازمينهم خلال فترة النفاس, مش بس عشان يساعدهم لا, عشان كمان يحموهم من اللي ممكن يشوفوه.

قرأت وسمعت عن ستات كثير حصل معاهم كدا, واحدة شافت ضل بيتحرك جمب السرير, واحدة تانية كانت بتسمع حد بينده باسمها في الحمام, وفيه اللي كانت تحس بايد باردة بتمسح على جرح القيصري مع إن مفيش حد في الأوضة.

صوت بيطلع بالليل وانتي لوحديك والبيت كله ساكت

كل واحدة ولدت كانت فاكدة إن اللي حصل معاها حالة خاصة

لكن ميعرفوش إن معظمهم بتحصل معاها مواقف شبه دي، وأكيد بعض منكم عارفين الكلام دا كويس أو سمعوا بيه من أقاربهم أو أخواتهم.

القصة دي حقيقية لمتابعة من اليمن بتحكي عن أيام ما بعد الولادة وبتقول:

اتزوجت وأنا عمري 18 سنة، وخلفت ابني البكري بعد ولادة قيصري
وكنيت في بيت أبويا، والموقف دا حصل بعد شهرين من الولادة كنت لسه
خلالهم موجودة في بيت أهلي عشان يراعوني ما بعد الولادة وعشان كمان
أمي تساعدني وتعلمني ازاي اتصرف مع الببسي، لأنني كنت بخاف اشيله
غلط مثلا، ومبعرفش اغسله ولا ارضعه غير بوجود أمي، وكل دا طبيعي
عشان دي أول مرة أبقى أم فمحتاجه رعاية خاصة.

بعد شهرين من الولادة كنت نائمة في أوضتي وفي نص الليل أُمي دخلت عليا وقالتلي يلا عشان تروحي الحمام تغيري هدومك وتغتسلي عشان جرح العملية يلم, وقالتلني كمان إنها سخنت المياه ودخلتها الحمام. وكملت وقالت إنها هتغسل البيبي وتغيرله البامبرز لحد ما أنا اخلّص.

بس صوت أُمي كان فيه نبرة مختلفة بشكل بسيط جدا
وكمان كانت أول مرة تدخل عليا وهي ملثمة ومداريه وشها.

قومت ورحت الحمام ولما دخلت حسيت الهوا بقى ثقيل جدا وكان فيه بخار ماء قوي, ولأن وقتها مفيش دي وسخانات فكانت المياه بتتخط في سطل كبير, قرّبت السطل عشان اتشطف واعقم جرح العملية زي ما بعمل كل ليلة واتفاجأت إن السطل مفيهوش مياه سخنة والمياه باردة عادي, بس مكنتش فاهمة البخار دا جاي منين.

ناديت على أمي عشان أسألها المياة السخنة فين لإن ممكن تكون سخنتها
ونسيت تدخلهالي الحمام لكن مفيش رد, فاضطريت استحمى بمياه بادرة
وفي نص الاستحمام فجأة شعر جسمي كله وقف بشكل واضح وقلبي قال
لي فيه حاجه غلط, اللي بيحصل معايا دا مش طبيعي وأول مرة يحصل.

لقيت وشي عشان اشوف مراية الحمام متغطيه ولا لا لإنني عمتي وجدتي
زمان كانوا يقولولي لما تقفلي في الحمام حطي هدومك على المراية, ولحد
النهاردا بعمل كدا, المهم لقيت هدومي على المراية فعلا.

حاولت اهدي نفسي وبدأت البس ملابسي النظيفة وفجأة اللبة بتاعة الحمام
انفكت ووقعت على الأرض انفجرت وعملت صوت قوي, اتخضيت فوق

ما تتصوروا ومش عارفة اوصفلكوا شعوري وقتها بعد ما الحمام بقى ظلام دامس.

استنيت ثواني بحاول آخذ نفسي واستجمع قوتي ودعيت في سرّي حد ييجي ياخذني من الحمام لإن أعصابي كانت خلاص انهارت.

محدثش ظهر حتى أُمي اللي المفروض انها صاحبة وبتلبّس البيبي وتغيرله أكيد سمعت صوت الانفجار والمفروض تيجي تطمّن عليا لكن محدش جي.

كنت عارفة إن الحركة دي متاحيش غير منهم, لإن مرات أبويا كانت دايمًا تقول إن بيتنا فيه حاجه وفضلت تقول كدا وتحكي حاجات بتحصل معاها لحد ما أبويا خدما تعيش في بيت تاني.

المهم فجأة وانا في وسط الرعب دا لقيت طمانينة نزلت على قلبي
وأعصابي هدأت فجأة, شعور جميل برضو مش عارفه اوصفهالكوا, يمكن
كان بنفس قوة شعوري بالخوف اللي كان من شوية.

وسمعت اختي الصغيرة اللي عرسها كان من ثلاث شهور بتناديني من بره
الحمام وبعدين دخلت عليا وهي بتسمي الله, استغربت ازاي جات وامتي,
المفروض هي وزوجها مسافرين! لكن خوفي خلاني فرحت إنها جات
تساعدني ومفكرتش في باقي التفاصيل, قالتلي سمّي الله وخدي بالك من
الزجاج الواقع على الأرض مينفعش تدوسي عليه.

اختي كانت ريحتها ريحان, والريحان واضح جدا فيها, أنا بحب الريحان
قوي.

سألتها انتي جيتي من السفر امتي وجيتي البيت امتي؟

قعدت اسألها على أخبارها وأخبار زوجها وهي كانت مشغولة انها تسندني
وتكلمي باقي اللبس لحد ما وصلنا باب غرفتي اللي المفروض إن أمي فيها
وبتغير للبيبي عشان اتفاجئ إنها مقفولة والبيبي متغطي بالبطانية الثقيلة
وبيصرخ من شدة البكا ووشه أحمر.

لقيت وشي ناحية الباب لقيت اختي واقفة وبتقولي احمدي ربنا محصلش
حاجه وبتبصلي وتبتسم.

كملت اهتمام بالبيبي ولما بصيت ورايا تاني لقيت اختي اختفت.

رحت على غرفة أمي لقيتها نائمة في الديوانية بملايس البيت من كتر التعب
والشقا طول اليوم لأن اليوم دا كان آخر يوم ليا في البيت وبنسميه في اليمن
بيوم الوفاء, وخلال اليوم بنعزم قرايبنا وكدا يعني وأمي من كتر التعب
نامت.

صحيّتها وحكيّتها اللي حصل وهي ترفيني وتقولي انتي شكلك سخنتي
وبتهلوسي, أختك وزوجها لسه مسافرين ومحدث منهم دخل بيتنا.

بتحصل معايا مواقف كتير مشابهة لحد ما اتعودت ولما احكي لحد ما
بيصدقنيش.

أبويا الوحيد اللي بيصدقني..

انتهت

"الحكاية الخامسة والعشرون"

هحكي حكايتي ومش عارفة إذا كنتوا هتصدقوها ولا لا, بس قبل ما احكيها هقولكوا موقف حصل معايا من يومين بالظبط, أنا من النوع اللي بينام بعد المغرب على طول وحاليا قاعدة في الشقة لوحدي, طلعت على السرير وبستعد للنوم وفجأة سمعت صوت دوشة وكركة في الصالة مع إنني عايشة لوحدي, قومت خرجت من الأوضة عشان اشوف فيه إيه واتفاجيء إن في الصالة فيه واحدة ست سمرا رفيعة واقفة قدام الحمام, شعرها منكوش وحاطه حاجه كدا حوالين وسطها عشان ترفع هدومها عن المياه ومشغله الغسالة بتاعتي وواقفة قدام الحمام بتزق لطفل صغير عنده حوالي ثلاث سنين وبتقوله اقلع الهدوم وهاتها وهو بيقلعها وهي بتاخدها منه وترميها في الغسالة, كمان فيه أوضة جمب الحمام كانوا فاتحينها والواد الصغير دخل فيها بعد ما قلع كل هدومه وأنا واقفة مذهولة بتفرج عليهم.

أول ما لاحظوا وجودي فجأة لقيت غيمة سودا انحطت فوق عيني
ومشوفتش حاجه ثاني بعدها , اتسندت على الحيطان وأنا خايفة لحد ما
وصلت السرير وأنا مرعوبة وبقول لنفسي أنا اتعميت ولا إيه!

لحد ما وصلت السرير وقعدت مش عارفه اتصرف إزاي والغيمة بدأت
بالتدريج تزوح من قدام عيني وبدأت اشوف من جديد والصوت سكت مرة
واحدة.

بعد دقائق الصوت رجع من ثاني زي أول مرة, أنا خوفت أقوم اشوفهم
احسن الغيمة ترجع ثاني وفي نفس الوقت قاعدة لوحدي وخايفه وفي وسط
حيرتي وتفكيري اغمى عليا ونمت.

موقف ثاني كمان حصل معايا في الأوضة اللي جمب الحمام, اللي الواد الصغير دخل فيها, في البداية أنا كنت بنام في الأوضة دي, المهم وأنا في الشقة سمعت باب الشقة بيتفتح فانا افكرت إنها أمي أو أختي لإن معاهم المفتاح, وبعد ثواني سمعت أمي بتنادي عليا..

خرجت سمعتها بتكلمني لكن مش شايفها..

الصوت جاي من قدامي كان بيني وبينها كام متر لكن مفيش حاجه ظاهرة!

أمي كانت حرفيا معايا في الشقة وتكلمني صوت من غير صورة!

خوفت وفجأة حسيت بحاجه مسكتني وكتفتني وأقسم بالله كنت صاحية وفي كامل وعيي, يعني مش بحلم ولا تهيؤات أو كوابيس.

صوت أمي بقى يكلمني تاني وينادي عليا عليا وأنا بحاول أكلمها بس بقي
كان مقفول غصب عني كإن حد حاطط إيدته عليه, لحد ما بقي اتفك وعرفت
اتكلم وقولتلها انتي فين؟ قالتلي أنا قدامك أهو, بقولها مش شايفاك, تقولي
أنا قاعده قدامك أهو على الكرسي (الكرسي دا كان جمب الأوضة اللي
بحكيلكوا عنها) هي كانت المفروض قاعدة عليه على حسب كلامها وأنا
مش شايفها.

سبحان الله شيء إلهي قالي أقرأ آية الكرسي, حاولت اقراها بس لسانى كان
تقيل أوي ومش راضي ينطق, فضلت اضغك على نفسي وأحاول لحد ما
بدأت أقرأ وخلال القراءة كنت بشوف حاجه سودا واقفة على باب الأوضة
ولما خلصت قراءة الحاجة دي اختفت والأوضة فجأة بقت مقفولة مع إنها
طول الموقف كانت مفتوحة!

جسمي فك خالص وبقيت قادرة اتحكم فيه كليا , ورجعت أعصابي لطبيعتها.

طلعت التليفون واتصلت بأمي سألتها انتي جيتي عندي من شوية؟

قالتلي لا مجتش عندك فيه حاجه حصلت معاكي؟ قولتلها لا بس سمعت صوتك ودورت عليك مليتكيش فافتكرتك جيتي ومشيتي, قالتلي لا مجتش وقفلت معاها.

أنا اسمي مريم, عندي 37 سنة وهكيلكوا قصتي من أولها, من أول ما كنت طفلة وبيجيلي طائر أبيض ياخدني على ضهره ويلف بيا العالم, واسافر كل البلاد, ممكن تفتكروني بتوهم بس اقروا حكايتي على إنها قصة خيالية وبعدين احكموا بنفسكوا.

أنا واحدة من اللي نزلوا تحت الأرض, أكيد ناس كثير منكوا سمعت عن
حكايات لأشخاص نزلوا تحت الأرض وخطفهم الجن واختفوا بالأيام
وبعدين رجعوا تاني, أنا هحكيلكوا اللي بيحصل معاهم لأنه حصل معايا,
هحكيلكم اللي بنشوف إيه تحت والموضوع بيتم إزاي.

أول ليلة شوفت فيها الجن كانت في الشتا, كنت صغيرة وقتها وعندي 8
سنين, كنت نايمة في أوضتي على سريري وحسيت بحاجه بتسحب البطانية
من عليا وتنزل لتحت السرير, كإن فيه واحد مستخبي تحت السرير
وبيسحب البطانية ناحيته, مكنتش اعرف إن فيه جن وعفاريت والكلام دا.

افتكرتهم اخواتي وبيهزروا معايا, وتاني يوم رحت اشتكيت لابويا وأخويا
وأختي حلفوا إن محدش منهم دخل أوضتي, أبويا قالي يمكن كنتي نايمة أو
بتحلمي, والموضوع عدا.

لما وصلت 14 سنة بدأ يحصل تواصل والمعرفة بيني وبينهم خصوصا إن البيت بتاعنا فيه آثار وحد منهم ملازمي.

كنت بكون نائمة على السرير عادي وييجوا بالليل حد منهم يسحب رجلي لتحت وأنا اسحبها منهم, ويحاولوا وأنا أحاول لحد ما قررت اعمل معاهم اتفاق.

كنت بحكي لأهلي بس محدش منهم كان بيصدقني وقررت اعمل اتفاق معاهم لإنهم كانوا عابزين مني أنزل معاهم تحت الأرض واقعد معاهم على طول!

بس أنا رفضت وعرضت عليهم أنزل معاهم واطلع تاني مفضلش دايمًا تحت.

كنت اسمعهم يقولولي انتي مكانش مش هنا, انتي مكانك معانا تحت وهتبقى
الملكة بتاعتنا ولازم تنزلي تعيشي معانا, احنا خليناكي تعيشي فوق 14 سنة
وجي الوقت اللي تنزل تكلمي حياتك معانا تحت.

لكن أنا كنت ارفض واقولهم شرطي الوحيد للنزول معاكوا اني اخرج تاني
فوق الأرض وفي نفس اليوم يعني مغيبش عن أهلي أبدا.

غابوا فترة من الزمن محدش فيهم بقى يكلمني لحد ما ظهوروا تاني وقالوا
إنهم موافقين وبدأت رحلتي معاهم يوميا, من نص الليل لحد قبل الفجر.

أول ليلة نزلت معاهم وعشان اوضحلكوا الصورة تحت, كل حاجه بتكون
لونها أسود شفاف, أسود بس معالمه واضحة, وعلى يميني شوفت منهم اللي
بيسجد لي (استغفر الله العظيم) وعلى شمالي بينحيلي, وفي آخر الطريق
كان فيه كرسي من ذهب وجمبه تاج, بصيت على نفسي لقيتني لابسه

ملابس خفيفة كذا وتصميمها زي تصميم ملابس المصريين القدماء أو شبههم.

قعدت على الكرسي وواحد منهم حط التاج على راسي وتوجوني ملكة. وبعدين طلعت فوق الأرض تاني.

منزلتش تاني غير لما يكون في قضايا مهمة المفروض أحكم فيها أو يستشيروني فيها, وفي كل مرة انزل الوضع بيكون زي ما هو على يميني ساجدين وعلى شمالي منحنيين وفي الآخر كرسي بروح اقعد عليه واتنين واقفين جمبي, وواحدة واقفة ورايا وهي المسؤولة عن حمايتي وخلال 3 سنين ونص نزلت 3 مرات بس.

المصاييب بدأت تحصل معايا من بعد ما اتجوزت لإنهم كانوا رافضين الزواج وعايزين افضل كدا معايم على طول لإن الملكة بتاعتهم مينفعش تتجوز, ومن ضمن المشاكل والحمد لله على قضاء ربنا طبعاً إني لحد دلوقتي مخلفتش, عندي 37 سنة ومتجوزة من وقت ما كان عمري 18 سنة ومفيش خلفه مع إني أنا وزوجي روحنا لدكاترة كتير ومفيش مني أو منه أي مشاكل تمنع حدوث الحمل.

كانوا يقولولي في المنام إني مش هخلف, ولو اتجوزت هتطلق وفعلاً انا اتطلقت بعد ما اتجوزت بيومين, واتجوزت جوزي ثاني, وبقينا اعاند فيهم.

مكنتش بخاف منهم لكن لما بقيت اسمع عن قصص الناس مع الجن والعفاريت بدأت اخاف منهم واعرف طباعهم اللي بيتعاملوا بيها مع غيري من الناس.

كانت بتحصل مشاكل معتادة, تعب في الجسم, مشاكل مع جوزي, وكنت
بنقل مع جوزي نعيش في القاهرة وأحيانا نرجع نعيش في الصعيد.

وفي مرة سكنت في شقة في القاهرة هي مسكونة أصلا وبدأت أشوف فيها
حاجات جديد, مثلا في مرة شوفت واحدة لابسة اسود طلعت من الأوضة
دخلت المطبخ!

مرة ثانية شوفت طفل صغير بيحبي على الأرض!

في يوم لقيت عيل صغير بيصحيني عنده حوالي أربع سنين فقولتله انت
مين يا عسل, قالي انا ابن فلان وقالي اسم واحد من الجن, كان واقف جنب
السرير وانا نايمه ومدياله ضهري ولما قالي كدا لفيت ناحيته عشان اكمل
كلام معاه لقيتيه اختفى!

كمان كان معايا تعبان ساكن في منور الشقة وكل يوم يخطلي على شباك
المطبخ السلك.

لحد ما قررت ادخل عالم الروحانيات واتعلّمه, وكنت بشوف شيوخ كثير
في المنام, بيظهرولي وبيكون الواحد فيهم طالع منه نور قوي جدا ويقولولي
تعالى زورينا, بس أنا بصراحة مكنتش بروح.

شيوخ كثير من الأموات كنت بشوفهم وهما واقفين جمبي وأنا صاحبة
عادي وبيطلبوا مني أزور الأضرحة بتاعتهم ومكنتش بروح, وبصراحة أنا
معايا حاجه كويسة جدا بتصحيني أيام صلاة الفجر, والحمد لله من وأنا
عندي 7 سنين وأنا مواظبة على الصلاة لحد دلوقتي ودا فضل من ربنا
الحمد لله.

بس طبعا اللي بيحصل معايا ووجودهم بيبقى شيء متعب ومجهد
للأعصاب, خصوصا إن قاعدة وحدي في الشقة حاليا وزوجي مسافر من
حوالي 7 سنين منزلش.

بشوفهم ويظهرولي على هيئة قطط, وأحيانا تعابين بتظهر لمدة ثانية وتختفي, أنا مربيه قطط معايا في البيت فكنت بشوفهم يتخانقوا مع القطط بتاعتي سواء وهما ظاهرين أو كنت بشوف القطط بتاعتي بتخانق مع شيء غير موجود وأحيانا بعد الخناقة بشوفهم مجروحين وفيه آثار خناقة فعلا, لدرجة إني في يوم كنت ممددة على السرير وقطة من القطط بتاعتي كانت نائمة على الكرسي وفجأة شوفتها وقفت وبصت على حاجه جمبي ونكشت شعرها ونطّط على حاجه جمبي أنا مش شايفها, بعدها أنا زعقت وطلبت منهم يخرجوا بره الأوضة.

في مرة كمان كنت بصلي وخلصت صلاة وقاعدة مكاني وشوفت القط بتاعي واقف وباصص ومركز على ركن من الأركان, باصص قوي ومركز جدا, بصيت في المكان اللي باصص عليه وركزت زيه وفجأة شوفت تعبان ظهر واختفى في نفس الثانية بس القط بتاعي كان خايف منه أو خايف يهجم عليه لكنه كان شايفه وأنا كمان كنت شايفاه.

دا غير طبعاً إن محدش بيعرف يخبي عني حاجه سر, يعني بعرف اللي في
نفسك أو بتقول إيه جواك, زي حكاية الحاسة السادسة كدا, كمان لو حد
اتكلم عني من ورا ضهري وقال كلام وحش الكلام دا بيوصلني وكنت
بعرف هو كان قاعد فين وبينكلم مع مين, وبشوف نفسي واقفه جمبهم لكن
مش شايفيني كنت بكون متواجدة بشكل أثيري كدا مش عارفة إذا كنتوا
هتفهموا قصدي ولا لا..

حتى الجن لما كنت بحاربه كنت بننقل بشكل أثيري وفي أزمنة مختلفة
وكان بيجيلي طائر كبير لونه أبيض جميل ياخدني على ضهره ويلف بيا
العالم ولا اقولكوا سيبكوا من الحته دي عشان محدش هيصدقني فيها.

ولما كنت بحارب الجن كنت بحاربه بأية الكرسي حتى ساعات كنت
بصحى وأنا بقولها بصوت عالي ولو كان حد مثلاً جمبي بعد ما اصحى

يقولي انتي كنتي بتتكلمي وانتي نايمة وساعات كنتي بتتكلمي بلغة مش مفهومة! وساعات اعمل حركات بايدي وانا نايمة كإني بتخانق مع حد ولما يسألوني مالك شوفتي إيه؟ كنت بقولهم إنه كابوس عادي.

كمان لما بيكون حد هيموت في العيلة كنت بشوف كدا في أحلامي قبل ما يحصل, وفي ليلة شوفت بنات عمتي لابسين اسود وواقفين حوالين السرير عندنا, صحيت من النوم قابلت ماما قولتلها حد منكوا يروح لعمتي عشان شكلها تعبانه وهتموت وبمجرد ما خلصت الكلمة تليفون أمي رن وقالها إن عمتي اتوفت.

برضو الستات اللي بتكون حامل وهي مش عارفه كنت بشوف كدا في أحلامي وكلامي يطلع صح فعلا, وساعات كنت بقولهم هتولدوا ولد أو بنت, وواحدة قريبتنا وهي حامل في الشهر الثاني قولتلها انتي حامل في توأم ولد وبنت ووالله لما ولدت كانوا ولد وبنت.

نسيت اقولكوا إن بعد زواجي بسنتين كدا في 2009 كنت واخذه الكمبيوتر من ابن اختي وقاعدة في الشقة بتاعتي وبتسلى على الكمبيوتر, وفي يوم بفتح في الملفات, فتحت ملف لقيت ملف فتحته لقيت ملف ثاني لحد ما وصلت لملف مكتوب فيه "ملف سري" فتحته لقيت كتاب شكل المعارف.

وحابه اشرحلوكوا اللي قريته في الكتاب أو اللي شوفته فيه بس مينفعش لكن اللي شاف الكتاب فيكوا أو قلب فيه هيعرف إنني صادقة, وفجأة سمعت صوت زلزال جوه الأوضة, زلزال بالمعنى الحرفي وسمعت صوت الدولاب وكمان مراية التسيريحة سمعتها بتهتهد في الأرض, مكننش مصدقة قومت رحت الأوضة لقيت مراية التسيريحة واقعة على الأرض مع إن كل الكريمات والعطور اللي على التسيريحة متلمستش, يعني المراية حد رفعها لفوق وهبدها على الأرض.

وقفت مش مصدقة اللي شايفاه وأول حاجه عملتها إني جريت على الكمبيوتر حذفت الكتاب وبعدين رحت لسلة المحذوفات حذفته كمان من هناك لإني اتأكدت إن قراءتي للكتاب حضّرت حاجه بدون ما اعرف وبسببه حصل اللي حصل دا.

أوقات اكون ماشيه في الصلاة اللي مفيهاش حاجه وفجأة حاجه توقعني على وشي كان واحد قاعد ومادد رجله وانا اتخبطت فيها ووقعت.

أوقات كمان كنت بكون ماشية على السجاد وأحس إن دوست على حاجه زي لعب الأطفال الصغيرة اللي بتكون مرميه على الأرض مع إن معنديش لعب أطفال ولا أطفال حتى, بس من وقتها اتأكدت إني حضرت قبيلة كاملة لما قرئت في الكتاب دا, حتى ابن اختي بيعرف في الحاجات دي وأكدلي كلامي.

في مرة كمان كنت قاعدة بتفرج على التليفزيون وحسيت بحد بينفخ هوا سخن في رقبتى رحت قومت جريت على أوضتى.

في يوم كمان كنت غاسلة السجاد وحاطه مكانه حصير وسمعت صوت حد بيتحرك على الحصير وبالتدريج الصوت بدأ يزيد, تعرفوا صوت حافر الحيوان لما يتحرك على الحصير ويعمل شخوله كدا, أهو كان كدا بالضبط.

جوزي كان وقتها معايا فبقوله قوم شوف فيه إيه بره بس مكانش مصدقني ويقول نامي مفيش حاجه, قام بص في الصالة والمطبخ والحمام وكل مكان وملقاش أي حاجه والصوت اختفى بعدها وسمعتش حاجه تاني.

دا غير إن دايمًا الكهربا واللمبات بتاعة المطبخ والحمام بيوظوا, وأوقات كمان احس بحاجه سخنة واقفة في ضهري ولما حكيت لابن اخويا قالي سيبي الشقة لأنهم اتحضرروا في الشقة نفسها ومش هينقلوا معاكى, وفعلًا نقلت منها وبطلت تحصل معايا المواقف دي في الشقة الجديد.

لكن الحاجات اللي بتحصل معايا من وقت ما كان عمري 14 سنة لسه موجودة لكن بتحصل على فترات, يعني تقدرنا تقولوا لسه عايشه معاهم وعايشين معايا

انتهت.

"الحكاية السادسة والعشرون"

اللي هتقروه دلوقتي يعتبر قصة حقيقية ممكن العقل ميصدقهاش لكن صدقوني العقل لوحده مش مقياس على وجود الشيء وإمكانية حدوثه من عدمه, واحفظوا الجملة دي كويس عشان هتحتاجوها كتير..

أنا أب لأسرة جميلة مكونة من بنتين وزوجة, قررت أنا وزوجتي إننا نغير غرفة النوم ونجيب غرفة جديدة من معرض موبيليا كنوع يعني من التجديد, رحنا واتفرجنا على أوضة عجبتنا واشتريناها والنجار جي ركبها والأمور تمام وزى الفل لحد ما فات أول أسبوع.

بعد أسبوع بالظبط بقينا نسمع صوت خربشة منتظم وخطب جاي من
الدولاب, قولت يمكن يكون فار, بس بعدها رفضت الفكرة لإن بناتي معاهم
قطط واستحالة فار يدخل يعيش جوه الشقة خصوصا إن الخربشة
والخطبات اتكرروا أكثر من مرة!

فتشيت الدولاء وكل جزء فيه ومراتي شالت منه الملابس ورجعتها ثاني
ملقينا ش أي فار ولا حاجه توضح سبب الخربشة والخطب اللي بنسمعهم
باستمرار!

أول موقف حصل معنا كان مع بنتي, كانت بتلعب جمب الدولاب وكان
مفتوح وقتها وغصب عنها وقعت جواه, سمعناها بتصرخ ولما جرينا عليها
شوفنا إيدها متخربشة جامد لدرجة إن الحادث دا فات عليه أربع سنين ولسه
آثار الخربشة موجود على ذراع بنتي, فتشنا الدولاب ثاني وبرضو بدون
نتيجة!

وقت الصيف بنتجمّع كلنا في غرفة نومي عشان فيها التكييف, كنت أنا وزوجتي وبنتي الصغيرة نايمين على السرير وبنتي الكبيرة قاعدة على مرتبة جنب السرير في مواجهة الدولاب ومعاها التابلت بتلعب عليه, معرفش إيه خلّاني قلّقت ورفعت راسي بصيت على بنتي الكبيرة واتفاجئ بوجود حاجه بيضة صغيرة قاعدة جنب بنتي أو وراها كذا وبتبص معاها على التابلت, وبنتي مش شايفها ولا حاسه بوجودها أو واخده بالها منها, الحاجه دي بمجرد ما حسّت إني شوقتها راحت اتسحبت بشويش ودخلت الدولاب وكأنها خلاص رجعت مكانها.

ومن وقتها بدأت الظهور بشكل علني, طفلة جميلة صغيرة بصفيرة على شكل ديل حصان بتجري تدخل الدولاب لما أنا ومراتي نشوفها, لكن بتلعب مع البنات عادي وأنا ومراتي قلبنا قوي الحمد لله واتعايشنا مع الموضوع.

في رمضان الماضي المدام كانت وقت الفطار متعودة تعمل عصير كثير وتحط المتبقي في المطبخ عشان لو حد عايز يشرب يعني زي مانتوا عارفين أهمية العصير للصايم وكدا، فكانت لما تدخل المطبخ تاني تلاقي العصير خلص أو اتشرب جزء منه، في البداية كانت فاكره البنات هما اللي بيشربوه لكن فيه يوم لفته خلص من غير ما البنات يدخلوا المطبخ، وقتها كانوا لسه قاعدين قصاد التلفزيون من بعد الافطار، وأنا فهمت اللي فيها.

تاني يوم دخلت المطبخ قبل الفطار بدقايق وجبت كوباية عصير وقطعة دجاج صغيرة وقولت بصوت عالي فطار أهو، وأنا أسف والله مكنتش اعرف إنك بتصومي معانا، وسبتهم في المطبخ ورجعت الصالة عشان نفطر وبعد نص ساعة رجعت المطبخ تاني لقيت العصير نصه مشروب وقطعة الدجاج اختفت فقولت الحمد لله إنها طلعت مسلمة.

اتعودنا على وجودها خصوصا إنها مش مؤذية وساعات بتحرك حاجات خفيفة من مكانها والبنات مش بيخافوا منها بس اكتشفت إنها بتحب اللحوم

والأسماء والعصاير فقط، وأوقات لما زوجتي تكون بتطبخ وتتأخر في التحضير بتسمع صوت تخبيط جامد في الدولاب كأنها بتقول أنا جعانة.

حصلت بعض المواقف كذا معايا ومع زوجتي والأولاد، في يوم كنت قاعد لوحدي في البيت بتفرج على ماتش الزمالك ومطقي النور كله مفيش بس غير نور الشاشة اللي شغال، وعندي المطبخ فاتح على الريسبشن وفجأة لمحت بطرف عيني بنت صغيرة بديل حصانة واقفة قدام باب المطبخ بتبص عليا، قومت جريت وراها راحت دخلت المطبخ واختفت!

اتضايقت ودخلت أنا، وبنتي بتحكي إنها يومها رجعت مع مامتها بعد ما اشتروا حاجات وكانت جايه عشان تفرجني عليهم، كانت كبيرة وقتها وعندها 12 سنة، فتحت باب الأوضة وهي مندفعة مرة واحدة شافت كائن صغير على شكل بنت فوق راسي مباشرة عندها حمرا بشكل غير طبيعي وبصت لبنتي بغضب، بنتي من الخوف مقدرتش تصرخ ورجعت لورا

خطوات واغمى عليها بس مراتي كانت وراها ولحققتها, ولما فاقت حكّت لنا
اللي شافته.

حلمت بعدها إن قاعد في الريسبشن وهي ظهرتلي فقومت جريت وراها
والمرة دي مسكتها, وبمجرد ما بقت في إيدي فجأة اتحولت وبقت بنت
عندها عشرين سنة, قولتلها عاوزه مننا إيه؟ ارتبكت وقالتي أنا مهندسة
واسمي سحر واتقتلت وعاوزاك تساعدني وقالت شوية تفاصيل تاني مش
فاكرهم وبعدها صحيت.

أختي كمان جات قعدت معانا يومين هي وأولادها وشافت حاجات مرعبة
لحد دلوقتي رافضه تحكي لي شافت إيه ومدخلتش بيتنا تاني.

حتى بنتي الصغيرة شافتها, في يوم كانت بتلعب في البلكونة بعد العشا
وأما لقتها داخله تجري وبتقول روبنزا واقفة على سور البلكونة ويمكن

تقع, روبنزا دي شخصية كرتونية أكيد عارفينها, والغريب إن بنتي وصفتها
بالظبط زي ما بنشوفها احنا.

انتهت

أعمال أخرى للكاتب:

-داخل مقبرة الفرعون.

-القصاص.

-حكايات يجهلها العلم.

رابط الفيس بوك

<https://www.facebook.com/Gamal.Hefney>

